











遊志續編



江蘇古籍出





四庫未收書提要

學經室外集卷三

遊志續編二卷提要

元陶宗儀撰宗儀有國風尊經四庫全書已著錄是編繼宋陳仁玉遊志而作所載多唐宋元人遊覽之作自樊宗師柳公權元結而下凡四十有八家選擇精審並足以資考證書中有存其目而其書未經採入者若李格非之洛陽名園記范至能之驂鸞錄吳船錄後人遂疑為未成之書案朱彝尊云宗儀所著各書有裨史學此其一也



遊志續編目錄

南村居士陶宗儀九成

卷上

絳守居園池記

樊宗師

蓮花峰

柳公權

七泉銘序

元結

石魚湖詩序

陽華巖銘序

朝陽巖銘序

九疑圖序

右谿記

寒亭記

題趙千里述古圖

鄭天民

遊玉華山記

張嶠

卧遊錄

六條

呂祖謙

玉磧雜書

五條

葉夢得

洛陽名園記

未抄

李格非

騷鸞錄

未抄

范至能

吳船錄

未抄

桂海虞衡志

楚樂亭記

鄭獬

閔古泉記

陸游

南園記

率會

呂希哲

西征記

盧襄

西京隱居記

康譽之

會友人游山檄

林昉

隱趣

韓澆

遊洞靈詩序

尤袤

百丈山記

朱熹

東郭居士南園記

黃庭堅

遊信州玉山小巖記

曾鞏

武昌九曲亭記

遊韓平原故園

□□□

游西山記

劉祁

游林慮西山記

遊龍山記

麻革

北使記 劉祁

西遊記 顧文淵

鑑湖上已分韻詩序

鄧牧

西湖上已分韻詩序

白鹿山房記

鳳洲觴詠序 俞鎮

卷下

石臺紀遊序

黃潛

楊氏池堂宴集詩序

戴表元

重遊杜曲靈巖詩序

陳德永

遊虎邱山詩序

王蒙

竹林宴集詩序

劉基

謝氏北墅八詠序

孫作

東園十三詠序

錢惟善

遊石湖記

楊維禎

遊玉峯詩序

桃園雅集圖志

遊分湖記

遊張公洞詩序

遊橫澤記

遊千山記

續蘭亭詩序

劉仁本

小孤山一柱亭記

虞集

國子監後圃賞梨花樂府序

吳張高風詩序

逍奧山人詩序

陳堯衡

紀遊

鄭元祐

九峰春遊序

楊基

游機山記

貢師泰

游千山記

桃花磧脩楔詩序

宋濂

平福堂記

劉會孟

宛溪南遊詩序

戴表元

志遊

王逢

臯亭行記

游超山龍湫記

海上遊記

楊景義

金華北山游記

吳師道

北山後遊記

婁敬洞記 王蒙

遊山記 貝瓊

遊鍾山記 宋濂

遊鍾山記 孫作

遊采石蛾眉亭詩序

合翠亭記

游冶亭記 孫作

游山詩序

127 11 243 38

11

遊志續編卷上

南村居士陶宗儀九成

絳守居園池記

樊宗師

絳即東雍為守理所稟參實沈分氣蓄兩河潤有陶唐
冀遺風餘思晉韓魏之相剝剖世說揔其土田士人令
無磽雜擾宜得地形勝瀉水施法豈新田又蒙猥不可
居州地或自有興廢人因得附為奢儉將為守悅致平
理歟抑侈心耗物害時歟自將失敦窮華終披夷不可
知陣婢汝孤顛口瓦倔渠元武踞守居割有北自甲
辛苞大池泓橫硤旁潭中癸次木腔瀑三丈餘涎玉沫

珠子午梁貫亭曰洄連虹霓雄雌穹鞠觀蜃時恨胡島

坻淹淹委委莎靡縵蘿薈翠蔓紅刺相拂綴南連軒井

陣中湧曰香承守寢眸思西南有門曰虎豹左畫虎搏

立萬力千氣底發蜃匿地努肩腦口牙快抗電火雷風

黑山震將合右胡人翦黃帑元於累珠丹碧錦襖身刀囊

韉撾緇白豹元斑飲距掌胛意相得東南有亭曰新前

含頷曰槐有槐肩器虛護霽鬱陰後頤渠決決緣池西直

南折廡赴可宴可衙又東騫渠曰望月又東騫窮角池

研雲曰柏有柏蒼官青士擁立與槐朋友巉陰洽色北

俯渠憧憧來刮級回西巽隅或作陽疑隅字間黃原珖天汾水

鈎帶白言謁行旦艮間遠岡青紫近樓臺井間點畫察

可四時合奇士觀雲峯霜露雨雪所為發生收斂賦歌

詩正東曰蒼塘蹲瀕西濟望瑤翻碧潄光文切鏤紱深

撓撓收窮正北曰風隄乘攜左右隄勢北回股努埽計

捩力計就墉銜渠畝池南楯楹景怪爚蛟龍鈎牽寶龜靈

蠹猛薄文文章章陰欲合呼墊恬呼歟烟漬靄聚桃李蕙蘭神

君仙人衣裳雅冶可會脫赤熱西北曰鼇蛭仄原開哈

儲虛明茫茫鬼眼頌耳可大客旅鍾鼓樂提鵬挈鷺伯

弼池豪渠憎乖憐圍正西曰白濱蒼深黎素女雪舞百

佾水翠披唧唧郭厘千幅迎西引東上長厓扶橫埭日或作

自卯酉樵途鴈徑幽委蟲鳥聲無人風日燈火之晝夜

漏刻詭婉毀魚化大小亭餌池渠間走池隄上亭後前

陴乘墉如連山羣峰擁地高下如原隰谿壑水引古自

源三十里鑿高槽絕竇墉為池溝沼渠瀑淙潺終出汨

汨于筆切音骨非街衙畦町阡陌間入汾巨樹木資土悍水沮

將預宗族盛茂旁蔭遠映錦繡交果枝香晚麗絕他郡考

其亭臺沼池之增蓋豪王才侯襲以奇意相勝至今過

客尚往往有指可創起處余退常吁後其能無果有不

否補建者池由于煬反者雅文安薛雅裴文安也發土築臺為

拒幾附於汙宮水本於正平軌病井涵生物瘠引古沃

澣人便幾附於河渠烏乎為附於河渠則可為附於汙宮其可書以薦後君子長慶三年五月十七日記

蓮花峰

柳公權

王得臣癸巳歲從鼎臣兄自汝入秦冬十二月宿於北華之野孤泉店到時日晚勢尚早鼎臣乃與予同登南坡蘭若訪僧曰義海氣韻甚清談吐亦雅中夜圍爐因話三峰事海曰去年初秋有士人風格峻整麻衣芒屨荷笠而來祈宿者問其所至姓氏誰何答曰元冲姓王來自天姥隱遯好奇遊陟諸山名迹盡東南之美矣惟華山有蓮花峰之秀異未覩今則方俟一登海晒之謂

曰茲山峭拔若削自非馭風馮雲無有去理元冲曰賢人勿謂天不可昇但慮無其志耳僕知華陽川中有路志其幽尋焉海觀其辭氣壯厲亦然之元冲曰某明日去某日當屈山趾計其五千仞爲一旬之程亦足矣既上當燐烟爲信至時可來桃林南望發笈取一藥壺并火金懷之而去海書之壁及期先一日至桃林宿明日平曉嶽色清明無纖翳佇立數息間有白煙一道歛起蓮花峰頭海秘之二旬而元冲至曰前者入川中尋微徑縈紆至峯下憇一宿方登初登也雖險峻猶可重足一跡困則伏石庵中暮亦如之既及峯三分之一則壁

立青嶂莓苔冷滑石縫縱橫劣容半足以死誓志作氣而登時遇石髮垂下接之以昇果一旬而及峰頂頂廣約百畝中有池亦數畝菡萏方盛濃碧鮮妍四旁則巨檜喬松竦擢霄漢奇花芳草不可識池側有破鐵舟觸之則碎周覽已及取火金敲之揉枯蓼以承之大本亦有朽仆者拉其枝幹爍火焉既而循池玩花將折數蒂又思靈境不可瀆只采取落葉數片及鐵舟寸許乃下下之危峻復倍於陟海不覺前席執元冲手曰君固三清之奇士也不然何能臻茲於是元冲盡以蓮葉鐵贈海明日負笈而去莫知所終

七泉銘序

元

結次山

道州東郭有泉七穴或吐於淵竇或繁願方於嵌臼皆澄

願方

於嵌臼皆澄

流清漪旋泓相奏又有叢石欹缺為之島嶼殊怪相異

不可名狀此邦豈世無好事者邪而今自古荒之乃脩

其水木為休暇之處每至泉上便思老焉於戲凡人心

清惠而必忠孝守方直終不惑也故命五泉其一曰惠

惠泉次曰洙忠泉次曰濤孝泉次曰汾

泉

次日濤

考

泉坊

亾甫

泉渣

力挂

泉銘之泉

上欲來者飲漱其流而有所感發者矣留一泉命曰漫泉蓋欲自旌漫浪不厭歡醉者也一泉出山東故命之曰東泉引來垂流更復殊異各刻銘以記之

石魚湖詩序

漣泉南上有獨石在水中狀如游魚魚凹之脩之可以
踞舉酒水涯四匝多歌石相連石上堪人坐水能浮小
舫載酒又能繞石魚洄流乃命湖曰石魚湖鐫銘於湖
上顯示來者又作詩以歌之

陽華巖銘序

道州江華縣東南六七里有回山南

一作東

面峻秀下有

大巖巖當陽端故以陽華名之吾遊處山林幾三十年
所見泉石如陽華殊異而可家者未也故作名稱之縣
大夫瞿令問藝兼篆籀俾依石經刻之巖下

朝陽巖銘序

永泰丙午中自春陵詣都使計兵至零陵愛其郭中有
水石之異泊舟尋之得巖與洞此邦之勝也自古荒之
而無名稱以其東向遂以朝陽命焉前刺史獨孤恤為
吾剪闢荆莽後攝刺史實必為吾剏制茅閣於是朝陽
水石始有勝絕之名已而刻銘巖下將示來世

九疑圖記

九疑山方二千餘里四州各近一隅世稱九峯相似望
而疑之謂之九疑亦云舜登九峯疑禹而悲從臣有作
九悲之歌因謂之九疑九峯殊極高大遠望皆可見也

彼如嵩華之峻峙衡岱之方廣在九峯之下磊磊然如布碁石者可以百數中峯之下水無魚鼈林無鳥獸如蟬蠅之類聽之亦無往往見大谷長川平田深淵杉松百圍榕栝並之青莎白沙洞穴丹崖寒泉飛流異竹雜花回映之處似藏人家實有九水出於中山四水流灌於南海五水北注合為洞庭若度其高卑比洞庭南海之岸直上可二三百里不知海內之山如九疑者幾焉或曰若然者茲山何不列於五嶽對曰五帝之前封疆尚隘衡山作嶽已出荒服今九疑之南萬里臣妾國門東望不見涯際西行幾里未盡邊陲當合以九疑為南

嶽以崑崙為西嶽衡華之輩聽逸者占為山封君表作
園囿耳但苦當世議者拘限常情牽引古制不能有所
改創也如何故圖九峯略載山谷傳於好事以旌異之
如山中之往迹峯洞之名稱為人所傳說者並隨方題
記庶幾觀者易知時永泰丙午中也

右谿記

道州城西百餘步有小谿南流數十步合營谿水抵兩
岸悉皆怪石欹嵌盤屈不可名狀清流觸石洄懸激注
佳木異竹垂陰相蔭此谿若在山野則宜逸民退士之
所遊處在人間可為都邑之勝景靜者之林亭而置州

已來無人賞愛徘徊谿上為之悵然乃疏鑿蕪穢俾為
亭宇植松與桂兼之香草以裨形勝為谿在州右遂命
之曰右谿刻銘石上彰示來者

寒亭記

在江華縣

永泰丙午中巡屬縣至江華縣大夫瞿令問咨曰縣南
水石相望之可愛相傳不可登臨俾求之得洞穴而
入棧險以通之始得構茅亭於石上及亭成也所以階
檻憑空下臨長江軒楹雲端上齊絕顛若旦暮景氣烟
靄異色蒼蒼石壙含映水木欲名斯亭狀類不得敢請
名之表示來世于是於亭上為商之曰今大暑登之疑

天時將寒炎熱之地而清涼可安不合命之曰寒亭歟
乃為寒亭作記刻之亭背

題趙千里述古圖

鄭天民 先覺

述古圖效唐小李將軍為著色泉石雲物草木花竹皆
妙絕動人而人物秀發各圖其像自有林泉風味無一
點塵埃氣信於此為不凡也卷首四人環坐勘書臺中
鋪白番錦褥烏帽黃道服捉筆而書者為東坡先生仙
桃巾紫氅而喜觀者為王晉卿幅巾青衣手按方几而
凝竚者丹陽蔡天啟捉椅而視者為李端叔後有二女
雲鬟翠飾持蕉扇侍立自然富貴風韻者晉卿家姬也

雙松盤鬱上有凌霄纏絡紅綠相間下有大石牀陳設古器玉卮瑤琴芭蕉圍繞坐石盤上道帽紫袍右手支頤左手執卷而觀畫者為蘇子由幅巾繭衣手執蕉筴而熟視者為黃魯直幅巾野褐據橫卷畫淵明歸去來圖者為李伯時披巾青服撫肩而立者為晁无咎跪而捉石觀畫者為張文潛道巾素衣按膝而俯視者為鄭靖老後有童子執口壽杖而立二人坐於盤根古檜下有蘭蕙芬馥幅巾青衣袖手而側聽者為秦少游琴尾冠紫衣而摘阮者為陳碧虛幅巾深衣昂首題石者為米元章袖手而仰觀者為王仲至前有鬚頭頑童捧古

斫而侍立後有□橋竹徑繚繞于清溪深處翠陰茂密
中有袈裟坐蒲團而說無生論者為圓通大士旁有幅
巾褐衣按石而諦聽者為劉巨濟二人並坐於怪石之
上下有湍激淙流於大谿之中水石潺湲風竹相吞爐
烟方裊幽蘭自馨人間清曠之樂不過乎此嗟乎洵湧
於利名之域而不知退者豈易得此樂哉自東坡而下
凡十六人以文章議論博學辨識英辭妙墨好古多聞
豪氣雄才絕俗之資復有羽流之冠方袍之宗名動四
方一時豪傑卓然高致師表千古後之覽者不獨圖畫
之可觀亦足以彷彿其人耳丙申歲五月十三日六友

居士福唐鄭天民先覺題之卷末以貽同志云

遊玉華山記

張 嶠子望

繇宜君縣西南行四十里有山夾道而來者玉華也其南曰野火谷有石常然望之如爨烟而莫知其所自也野火之西曰鳳皇谷則唐置宮之故地也蓋其初有九殿五門而可記其名與處者六其正殿為玉華其上為排雲又其上為慶雲其正門為南風南風之東為太子之居其殿曰耀和門曰嘉禮知其名而失其處者一曰金飈門也今其尺垣隻瓦無有存者過而覽之但見野田荒草而榛荆也其西曰珊瑚谷蓋嘗有別殿在焉珊

瑚之北曰蘭芝谷昔太宗詔沙門元奘者譯經於此其
 始曰肅成殿後廢而為寺云中有石巖嶄然天成下有
 鑿室可容數十人有泉懸焉勢若飛雨有松十八環其
 側皆生石上高可十尋端如植筆其西且南有厓曰駐
 鑿其始入也雙壁屹然如削石而成既至其處若視瓮
 側有泉飛而下如懸布如噴珠其名曰水簾稍北有厓
 與泉亦若是而差小焉治平三年夏五月丁巳余與六
 人來遊乃相與坐石蔭松聽泉而飲之已而覽故宮以
 徘徊問遺事於田老方蹢然不欲歸而余與六人者或
 有官守或以事牽其勢不可久留饒宿而遂去然而相

視有不足之色余謂之言曰夫山林泉石之樂奇偉之遊常在乎窮僻之處而去人迹甚遠故必為野僧方士與夫幽潛之人所據而有也然幽潛之人知好之而力不足以營之惟佛老之說可以動人故其徒常獨有力而危亭廣廈眺覽之娛莫不為其所先也夫以有唐之盛窮天下之富建宮於此隨而廢沒而杜甫乃其時人過之且有悲傷之感至或形於歌詩獨寺僧之徒更相傳而不息迄於今而尚存則雖天下之力亦有屈於此歟以太宗之賢致治之美宜其愈久而彌傳也今問諸遺老無所稱道而彼元奘者特一浮屠耳然說者至為

荒誕難知之語以增大其事豈人之情常樂於放僻而易忘於中正哉又豈物之盛衰興廢亦各有時而此特其盛時也歟斯可為之太息也若夫太宗之賢天下之力猶不能長有此也則吾曹可以一寓目而足矣又何必以不久留為恨哉然荒屋窮谷之崎危廢宮頽址之蕭條雖累歲月未嘗有一二人遊焉而余與六人者同時而來亦可謂之盛哉六人者余兄子堅弟崕與太原石繼和公美河東郎几康伯溫陵陳說君豫西河冀上之冠卿也壬申熒陽張嶠子望記上之書李玉鐫

卧遊錄

呂祖謙伯恭

宗少文好山水愛遠遊西涉荆巫南登衡岳因結宇衡山有尚平之志以疾還江陵歎曰老疾俱至名山恐難遍覩澄懷觀道卧以遊之凡所遊歷皆圖之於室謂人曰撫琴動操欲令衆山皆響

元豐六年十月十二日夜解衣欲睡月色入戶欣然起行念無與樂者遂至承天寺尋張懷民懷民亦未寢相與步於中庭庭中積水空明水中藻荇縱橫蓋竹柏影也何夜無月何處無竹柏影但少閒人如吾兩人耳登州蓬萊閣上望海如鏡面與天相際忽有如黑豆數點者郡人云海船至矣不一炊久已至閣下

嶺南氣候不齊吾嘗云菊花開時乃重陽涼天佳月即中秋不須以日月斷也今歲九月殘暑方退既望之後月出愈遲然余嘗夜起登合江樓或與客遊豐湖入栖禪寺叩羅浮道院登逍遙堂逮曉乃歸杜子美云四更山吐月殘夜水明樓此殆古今絕唱也

紹聖二年三月四日詹使君邀余遊白水山佛跡寺浴於湯泉風於懸瀑之下登中嶺望瀑所從出出山肩輿却行觀山且與客語晚休於荔浦之上曳杖松陰之下荔子累累如芡實矣父老指以示余曰是可食公能攜酒復來乎意欣然許之

今日遊白水佛跡山山上布水三十仞雷輶電散未易
名狀大略如項羽破章邯時也

慈湖陳氏草堂瀑流出兩山間落於堂後如懸布崩雪
如風中雲如羣鶴

玉礪雜書

葉夢得少蘊

張元之晉吳興太守嘗為吳興山墟名一卷其記卞山
云峻絕非清秋爽月不見其頂徐陵孝義寺碑云高卞
蒼蒼上聞天語此山在吳興諸山雖最高然其上平日
視之固了了不至如元之所稱也惟天將雲雨氣輒先
自獅子巖出既霽雲歸亦如之土人常以此候雨霽之

節頗驗為差異耳顧長生三吳記言以卞和采玉處得名此固非是惟周處風土記以為望之似冠弁此似得之

有山處常患無水雖有水而涸集不時亦不足貴此山左右兩大礪右自大鵬歷圓證寺少折而東經先大夫塋前復折而西最盛左自桃花鵑歷趙氏墓西至玲瓏山背又經朱氏墓南復折而西雖不及右礪之盛然冬夏亦未嘗竭二水皆會於石橋之下合流西出即張規所名浮空潭也壬寅癸卯之間冬春不雨連數月溪流減七尺城中井泉多竭而二泉獨如故朱氏小樓正在

石橋下疊石束澗流跨橋其上與石橋相直殊可喜五月十一日既雨渝旬始霽與客往過之衆流參會自石橋奔衝而下雷奔電激坐語幾不相聞客有嘗至廬山三峽橋者以為絕似但差小耳明日夜月出復再往景氣清潤天無片雲覆流叢竹交翳月光與竹飈鏢相照射濺流及衣裾不覺至夜分乃歸吾山居來得此殆無幾也

吳興記載張文規會昌中為守嘗至此山見山泉清徹乃令積石為隄以貯水名曰浮空潭取謝靈運詩空水共澄鮮之語潭滿空噴薄有奇狀於孤島上建亭曰思

洛以水似伊洛之色思洛南有小山松桂交映建亭曰
泣玉此地今皆為朱氏所有物色其處尚歷歷可見吾
政和間初至此時自石橋下水皆漫流草木交塞水行
蒙翳中不復知佳處嘗語朱氏子尚可按圖追脩文規
故事宣和辛丑秋自許昌還則朱氏傍橋作小樓即吾
所名怡雲者疊石東澗流跨橋其上下為橫隄匯水浮
空潭遂依然在目思洛泣玉山亦闕其趾矣他日二亭
更成吾鄰有此杖策往來不遠數百步間安知非吾有
也

玲瓏山在朱氏草堂之東山嵌空奇峻略如錢唐南屏

有洞曰歸雲篆名道士張有書也上有石梁濶三尺許
橫絕兩石間朱氏子云相傳為定心石傍有杜牧題名
云前湖州刺史大中五年八月八日來按題名記牧以
大中四年除守五年召為考功郎中以郭勤代之應是
此時也又有益之獨遊年月名氏留題思洛亭不知為
何人思洛舊址今為荊棘苔蘚封翳不可盡見癸卯三
月十六日余在山間葛魯卿率林彥振劉無言莫彥平
來相遇俾無言書名石上云

癸卯七月十二夜天氣稍涼月色如霜雪余寓居溪堂
當苔雪兩谿之會適自山中還葛魯卿亟相過因同泛

舟掠白蘋亭度甘棠橋至魚樂亭少留步而叩門呼莫
彥平尚未寢天無片雲夜氣澄澈星斗爛然俯仰上下
微風時至毛髮森動莫居三面臨水為城中居第之勝
夾徑老柳參天百餘尺環以蓮蕩人行柳影荷氣中時
聞跳魚潑刺水上復口彥平刺舟逆水而上月正午徐
行至南郭門而還魯卿得華亭客餉白酒色如潼乳持
以飲我旋呼兵以小舟吹笛相尾道傍居人聞笛聲亦
有吹而相應者酒盡抵岸已四鼓矣因謂魯卿不知袁
宏牛渚李太白采石亦復過此乎古今勝事但以流傳
為美誦詠不暇安知古人亦人耳其所登覽不在天上

而不能自營之而況其他然今夕之景海內非無湖有湖之地此樂非吾三人亦不能也

洛陽名園記

李格非

文叔
山東人

驂鸞錄

范成大

至能

吳船錄

桂海虞衡志

余嘗評桂山之奇宜為天下第一士大夫落南者少往往不知而聞者亦不能信余生東吳而北撫幽薊南宅交廣西使岷峨之下三方皆走萬里所至無不登覽太行常山衡岳廬阜皆崇高雄厚雖有諸峯之名政亦魁

然大山峰云者蓋強名之其最號奇秀莫如池之九華歛之黃山括之仙都溫之雁蕩夔之巫峽此天下同珍之者然皆數峯而止耳又在荒絕僻遠之瀕非几杖間可得且所以能拔乎其萃者必因重岡複嶺之勢盤亘而起其發也有自來桂之千峯皆旁無延緣悉自平地崛起特立玉笋瑤簪森列無際其怪且多如此誠當為天下第一頃嘗圖寄吳中故人山皆中空故峰下多佳巖洞有名可紀者三十餘所皆去城不過七八里近者三二里一日可以遍至今推其尤者記其略

讀書巖在獨秀峰下峰直郡治後旁無坡阜突起千丈

峰止石屋有便房石榻石牖如環堵之室

伏波巖在灘江濱突然而起且千丈下有洞可容二十榻穿鑿通透戶牖旁出有懸如柱去地一線不合俗云馬伏波試劍石前浸江濱波浪洶湧日夜漱啗之疊綵巖在八桂堂後支徑登山大半有大洞曲轉穿出山背

白龍洞在南溪平地半山中龕然大石屋由屋右壁入洞行半途有小石屋

劉仙巖在白龍洞之陽仙人劉仲遠所居也石室高寒出半山間

華景洞高廣如十間屋洞門亦然

水月洞在宜山之麓其半枕江天然剏刻作大洞門透
徹山背頂高數十丈其形正圓望之端正如大月輪
江別派流貫洞中踞石弄水如坐捲蓬大橋下

龍隱洞 龍隱巖皆在七星山脚支江中汎舟至石壁
下有大洞門高可百丈鼓棹而入仰視洞頂有龍迹
矢矯若印泥然其長竟洞舟行僅一箭許別有洞門
可出巖在洞側山半有小寺即巖為佛堂不復屋

雉巖亦江濱獨山有小洞洞門下臨灘江

立魚峰在西山後雄偉高峻如植立一魚餘峰甚多皆

蒼石刻削

棲霞洞在七星山七星山七峯位置如北斗又一小峯在旁曰輔星石洞在山半腹入石門下行百餘級得平地可坐數十人旁有兩路其一西行兩壁石液凝沍玉雪晶瑩頂高數十丈路濶亦三四丈如行通衢中頓足曳杖彭鏗有鼓鐘聲蓋洞之下又有洞焉半里遇大壑不可進一路北行俯俛而入數步則寬廣兩旁十許丈鐘乳垂下纂纂凡乳牀必因石脈方茁不自頑石出也進里餘所見益奇又行食頃則多岐遊者恐迷途不敢進云通九疑山也

元風洞去棲霞旁數百步風自洞中出寒如冰雪

元字本胡

滑切

魯公洞舊名冷水巖山根石門砢然入門石橋甚華曾丞相子宣所作有澗水莫知所從來自洞中右旋東流橋下復自右入莫知所往或謂湫流入於江也度橋有仙田數畝過田路窄且溼俯視石罅尺餘匍匐而進旋復高曠可通棲霞

屏風巖在平地斷山峭壁之下入洞門上下左右高廣百餘丈中有平地可宴百客仰視鐘乳牀森然倒垂者甚多躡石磴五十級有石穴通明逗穴而出則山

川城郭恍然無際余因其處作壺天觀雨命其洞曰
空明

隱山六洞皆在西湖中隱山之上
一曰朝陽二曰夕陽
三曰南華四曰北牖五曰嘉蓮六曰白雀泛湖泊舟
自西北登先至南華出洞而西至夕陽洞有石門可
出至北牖出洞十許步至朝陽又西至白雀穴口隘
狹側身入有穴通嘉蓮西湖之外既有四山繞之碧
玉數十峯倒影水面固已奇絕而湖心又浸隱山諸
洞之外別有奇峰繪畫所不及荷花時有汎舟故事
勝賞甲於西南

北潛洞在隱山之北中有石室石臺石果之屬石果作荔枝胡桃棗栗之形人來取玩之或以釘盤相問遺南潛洞在西湖中羅家山之上

佛子巖亦名鍾隱巖去城十里號最遠一山萃起莽蒼中山腰有上中下三洞下洞最廣中洞明敞高百丈許上洞差窄一小寺就洞中結架因石屋為堂室虛秀洞去城差遠大石室面平野室左右皆有徑隧冬數十百步穿透兩旁亦臨平野

以上所紀皆附郭可日涉者餘外邑巖洞尚多不可悉到興安乳洞最奇余罷郡時過之上中下亦三洞此

洞與棲霞相甲乙他洞不及也陽朔亦有繡山羅漢白
鶴華蓋珠明五洞皆奇又聞容州都嶠有三洞天融州
有靈巖真仙洞世傳不下桂林但皆在瘴地士大夫尤
罕到

楚樂亭記

鄭 獬 毅夫

余之樂於此者其奚樂邪余樂與荆人遊也春意盛時
草木怒生乾坤如藻繪於是荆人出遊乎西渚之上佳
客聯騎美酒滿車高絃悲管嘲噉乎後先荆人攜壺從
之翠幙紅幃接連春水之濱亦如五色畫圖臨流而張
之清歌嘽而窈渺妙舞旋而低回更相獻酬迭為賓主

婆婆乎若御鴻鵠而飛也日未夕予已熟醉乎席間游
人往往相枕而卧於飛花芳草之上於此時泰山裂而
吾不知其為壓也滄海決而吾不知其為溺也茫乎陶
然果何所也其為至樂之鄉乎而予為赫胥氏之臣乎
而游者為大庭氏之民乎忽然而寐遽然而寤神定而
思則予猶為荊州之守也而游者猶為荊州之民也至
其大適則人焉知予不為赫胥之臣而遊者不為大庭
氏之民乎自予來荊幸連歲大稔美稻湧地而出雞蟲
厭食之洞夷匍匐自遂於林巢山穴之間不敢跋而北
望里閭無巾篋之盜都市罕鐵鑠之誅兼此數者遂能

容刺史之不才得以放浪於尊酒之間而得其真樂一
有不幸即吾樂事敗矣鑄心救過之不暇尚何能抵掌
掀髯為一笑適哉故予之樂於荆者又適丁其時之可
樂然予之為樂荆人能知之故予言其樂以名渚之南
亭則他日荆人來遊者將又曰昔吾刺史嘗樂於此

閱古泉記

陸 游 務觀

太師平原王韓公府之西繚山而上五步一磴十步一
壑厓如伏龜徑如驚蛇大石礧礧或如地踊以立或如
翔空而下或翩如將奮或森如欲搏名藹碩果更出互
見壽簾怪蔓羅絡蒙密地多桂竹秋而華敷夏而穉解

至者應接不暇及左顧右盼則呀然而江橫陳豁然而湖自獻天造地設非人力能為者其尤勝絕之地曰閱古泉在溜玉亭之西繚以翠麓覆以美蔭又以其東向故浴海之日既望之月泉輒先得之袤三尺深不知其幾也霖雨不溢久旱不涸其甘飴蜜其寒冰雪泓止明靜可鑑髮須而遊塵墮葉若有神物呵護屏除者朝暮雨暘無時不鏡如也泉上有小亭亭中置瓢可飲可濯尤於烹茗釀酒為宜他名泉皆莫逮公常與客相羊泉上酌以飲客游年最老獨盡一瓢公顧而喜曰君為我記此泉使後知吾輩之遊亦一勝也游按泉之石壁有

唐開成五年道士諸葛鑑元八分書題名蓋此泉湮伏弗耀者幾四百年公乃復發之而閱古蓋先忠獻王以名堂者則泉可謂遇矣游起於告老之後視道士為有愧其視泉尤有愧也幸旦暮得復歸故山幅巾短褐從公一酌此泉而行尚能賦之嘉泰三年四月記

南園記

慶元三年二月丙午慈福有旨以別園賜今少師平原郡王韓公其地實武林之東麓而西湖之水滙於其下天造地設極湖山之美公既受命葺為南園因其自然輔以雅趣方公之始至也前瞻却視左顧右盼而規模

定因高就下通室去蔽而物象列奇葩美木爭效於前
清泉秀石若顧若揖於是飛觀傑閣虛堂廣廈上足以
陳俎豆下足以奏金石者莫不畢備升而高明顯敬如
蛻塵垢入而窈窕邃深疑於無窮既成悉取先侍中魏
忠獻王之詩句而名之堂最大者曰許閒其射廳曰和
容其臺曰寒碧其門曰藏春其閣曰凌風其積石為山
曰西湖洞天其瀦水藝稻為囿為場為牧羊牛畜雁鷺
之地曰歸耕之莊其他因其實而命之名堂之名則曰
夾芳曰豁望曰鮮霞曰矜春曰歲寒曰忘機曰照香曰
堆錦曰清芬曰紅香亭之名則曰遠塵曰幽翠曰多稼

自紹興已來王公將相之園林相望莫能及南園之髣髴者云云

率會

呂希哲 原明

溫公得請西京留臺優游多暇訪求河南境內佳山水窮盡幽勝倦於登覽乃與耆老六七人時會城中名園古寺且為之約果實不過口品肴膳不過五品酒則無筭命之曰率會亦曰真率會文潞公時守洛欲求附名於其間溫公為其貴顯弗納一日潞公伺其會具盛饌直造焉溫公笑而延之戲曰俗却此會矣相與懽飲亦一時之盛事也

西征記

盧 襄 贊元

余嘗謂人生以七尺男子軀為天地中最靈物造化者剖裂元氣取其精英而與之使呼吸至和發露天光超然出於塵垢之外苟甘心瓶罌如醯雞然老且死是造化棄物耳寧不愧古人以桑弧蓬矢射天地四方而示其有志哉余欲長遊遠睇窮極天下壯麗奇偉卓絕之處南窮滄溟北抵幽都東折若木之枝西奄濛汜之谷頂摩太清轍環八埏以助夫造物所以予余者生抱此志二十三年矣更念衢為小邦處會稽姑蔑之地山川形勢不足為天下偉觀居嘗病是不足廣吾胸中之氣

去年秋舉郡計鄉老里大夫推余為冠今年求試春官
擔簦裹糧走數千里雖風俗形勢不出吳越江淮之近
而山川之勝槩前賢之遺迹亦已多矣姑紀所遊之畧
云

吳越之地牽牛織女之分野泰伯句踐之故墟有鑿山
煮海之利三江五湖之險亦江東之都會也獨衢東接
甌閩西連婺女自衢歷婺至新定曰睦歛三江之水會
合於亭下有山隆然直壓其首如渴鰲怒鯨奮迅鱗鬣
奔而衝水之狀上有桐君祠乃戴永飛仙之地祥氛瑞
氣氤氲四薄鶴駕往矣靈蹤儼然自祠而西有羣山蜿

蜿蜒如兩蛇對走於平野之上三江之水並流於兩間驚
波鬪馳秀壁雙峙上有東漢嚴子陵之釣臺孤峯特操
聳立千仞奔走名利汨沒為塵垢中客者一過其下清
風襲人毛髮為豎使人有芥視功名之意自釣臺而西
曰浙江羣水赴焉衆山截焉海門二峯屹然孤立頃間
巨聲轟轟磕驚裂地軸如雷霆之奔擊萬軍之決怒天吳
爵躍水怪萬狀擁銀山而瀉天漢意其子胥之魂尚含
屬鏤之怨怒而激為此乎抑江神海若以為不如是不
足以震天地之威乎抑形勢使然而自為此奔突乎竊
悲子胥之忠腸義骨感激發憤欲身存國家饒鋒射人

卒誅誅死真天下奇男子有不幸者如此也自浙江艤
舟古岸下登其上曰杭州橫控列城為國大藩乘熊軾
而建隼旗者必王公大人非州刺史郡太守二千石比
也觀閩商海賈舟車輻輳犀貝魚鹽駢羅其中龍山據
其首西湖盤其腹天隱聳其膺胥邱卧其背樓臺上下
如錦繡圖被髮文身者閩粵之舊俗也水犀射首者戰
國之餘勇也金隄玉渠虛臺廣榭者錢氏之故基也霓
裳羽衣綽約靡曼者蘇小之遺態也故過其地者必駐
軾焉自杭而西至嘉禾曰秀州自秀而西登吳江橋如
長虹欲舒橫絕水面左瞰太湖一望千里篙工柁師風

謳雨吟征人動江鄉之悲游女弄采蓮之歌思昔拂袖
去國扁舟五湖者鷓鴣子之遠游也蓴羹半糝鱸魚自
香者張季鷹之□□也行歌長吟興屬水雲者陸魯望
之嘉遯也後人高之亦祠堂於笠澤之右自吳江橋而
西至姑蘇曰蘇州余求其所謂姑蘇臺者有遺址存焉
父老尚能言之今天祐我宋統一寰宇四方遠近無敢
有據土地擁甲兵效戰國競驛相依者是臺也今雖版
籍入於王府亦亡國之餘辱使當時知范蠡之有謀悟
句踐之嘗膽俯取忠言却西子而不顧斬宰嚭以謝三
軍則江山之王氣猶存而東門之懸晴不袂矣言訖涕

數行下余亦悵然而悲父老作歌嗚嗚余和之曰秋風
起兮鴻雁歸秋月明兮白雲飛吊往古兮一沾衣自姑
蘇至毗陵曰常州自常州至京口曰潤州謁水府祠渡
楊子江登金山見巨浪拍天鯨鯢出沒蜃樓駕空朱碧
相照呼雲吸霧一息萬態紛紛紜紜不可名狀遂沿楊
子江至儀真曰真州見江皋有巍然古宇長廊複壁間
有所謂小龍之祠試造觀之有小蛇盤旋几案上朱鱗
火鬣目赫赫有異光尸祝指曰此非虬螭蟒蜥之儔伍
也喜則俯首搖尾僅可玩弄稍怒則搖撼塊闕翻海摧
岳而後已所以艤舟而禱者袂相屬焉自儀真至維揚

曰揚州自維揚至山陽曰楚州至淮陰登韓信廟使人
扼吭太息思昔帶長劍游五陵俛首出惡少年跨下氣
帖帖然不敢喘何其弱也及其登壇佩大將軍印虜魏
豹滅項羽斬成安君泝水上名動諸侯南面稱孤又何
壯也觀其用兵制勝神授鬼畫出入古兵法中言取楚
三策如指諸掌何其智也烏盡弓藏兔死狗烹雲夢之
擒未幾而死於婦人之手又何其愚也自淮陰出龜山
汎長淮入汴口曰泗州青蓮寶宇連櫓曲桷雄視眈眈
以窮土木之壯麗浮圖屹立若柱擎天汴水者出於崑
崙黃河之源濁浪奔馳自上而下與淮俱流數千里間

清濁異色久則與俱如涇渭然隋大業間煬帝所以浚
闢使達於揚州者不過事游幸耳錦帆未張而神器移
膏血未乾而生民瘠天怨神怒假手於唐今則東南歲
漕上給於京師者數千百艘舳艫相銜朝暮不絕蓋有
害於一時而利於千百載之下者天以隋為吾宋王業
之資也遂上所謂黃金隄與友生對坐古柳下感今悼
昔賦詩以哀之自泗州抵宿州歷南京至雍邱乃張許
二公保障江淮之地也昔□□□□我嵩岱哆然四
顧有橫吞天下之志二公提孤兵挫強虜扼東南咽喉
以江淮財賦濟中興非古烈丈夫疇能哉吾見其悲風

擊地林木怒號意者南霽雲之嗚咽也古木蒼瘦怪石
孤聳意者雷萬春之壁立也殘陽滿地餘霞一抹則愛
妾之血肉尚在也寒鴉悲鳴林鳥爭飛則侍童之精魂
猶存也自雍邱之陳留乃漢張子房所封之壤也觀其
以經世之畧出為王者師功成名遂翻然從赤松子遊
亦可謂豪傑之士矣鄙夫漢庭之臣甘心鼎鑊視死而
不顧胡不謝去朝市而從子房遊也自陳留至大梁曰
汴州始禹畫為豫周封為魏卽鄘之始都楚漢之戰場
今為開封府是為京師也思昔戰功之初壯士之悲吟
戰馬之嘶風九江舞陽披長劍而叱咤之地今則萬國

之朝會集馬昔之鋒鏑交加兩虎並隅而相睨轅門刀
斗羅黃戟而擁千刃以備掩襲之虞者今則萬方之玉
帛赴馬昔之荒蹊斷塹猩鼯狐兔之窟宅朝風號而暮
雨悲今則龍樓鳳閣正玉繩而方紫極馬昔之白葦蕭
蕭有螭頭馬鬣之象過其下者莫不酸鼻出涕今則龍
池鳳沼集水嬉而競娛樂馬以至虞韶夏獲犧琴瑤鍾
者太常作也神虬龍馬氎罽龜貝者異方貢也天球河
圖赤雁白魚者瑞物賓也丹禁紫宇格羆烈羆者上林
樂也黑貂鐵脚突騎勇也虎翼龍驤戰士驕也飛廬連
櫓居人繁也輦金橐玉大賈至也樓櫓相望雉堞新也

法象穹極帝闕隆也鵷行鷺列百官入也龍墀日角天
王朝也環流積餼置博士而列羣書則庠序之設嚴也
重趼負笈起草萊而扣帝閭則羣賢之樂而來遊也至
於其餘不可殫記

西京隱居記

康譽之叔聞

宣和間楊可試可弼可輔兄弟讀書精通數明風角鳥
占雲祲孤虛之術於兵書尤邃三人皆名將也自燕山
回語先人曰吾數載前在西京山中遇老人語甚款老
人頗相喜勸余勿仕隱去可也余問何地可隱老人曰
欲知之否乃引余入山有大穴焉老人先入楊從之穴

漸小扶服以入約三四十步即漸寬又三四十步出穴
即土田雞犬陶冶居民大聚落也至一家其人來迎笑
謂老人久不來矣老人謂曰此公欲來能相容否對曰
此中地濶而民居鮮少常欲人來居而不可得敢不容
邪乃以酒相飲酒味薄而醇其香郁烈人間所無且殺
雞為黍意極勤至語楊曰速來居此不幸天下亂以一
丸泥封穴則人何得而至又曰此間居民雖異姓然皆
信厚和睦同氣不若也故能同居苟志趣不同疑間爭
奪則皆不願其來今吾觀子神氣骨相非貴官即名士
也老人肯相引至此則子必賢者矣吾此間凡衣服飲

食牛畜絲纊麻枲之屬皆不私藏與衆均之故可同處
子果來勿攜金珠錦繡珍異等物在此皆無用且起爭
端徒手而來可也指一家曰彼來亦未久有綺縠珠璣
之屬衆焚之所享者惟米薪魚肉蔬果此殊不缺也惟
計口授地以耕以蠶不可取衣食於他人耳楊謝從之
又戒曰子來或遲則閉穴矣迫暮與老人同出今吾兄
弟皆休官以往矣公能相從否於是三楊自中山歸洛
乃盡捐橐箱所有易絲與布綿絹先寄穴中人後聞可
試幅巾布袍賣卜二弟築室山中不出俟天下果擾攘
則共入穴自是聲不相聞先人嘗遣人至築室之地訪

之則屋已三易主三楊所向不可得而知也及紹興和好之成金人歸我三京余至京師訪舊居忽有人問此有康通判居否出一書相示則楊手札也書中致問吾家意極殷勤且云余居於此飲食安寢終日無一毫事何必更求仙乎公能來甚善余報以先人沒於辛亥歲家今居宜興伺三京帖然則奉老母以還先生不忘先人再能寄聲以拊諸孤則可以訪先生於清靜境中矣未幾金人渝盟余顛頓還江南自是不復通問

會友人遊山檄

林 昉 旦翁

人有殘縑敗素繪一山一水愛之若寶售之必千金至

於日與真景會則略不加喜母乃貴偽而賤真邪求樂之真今日政在吾輩春雪既霽春風既和或坐釣於鷗邊或行歌於犢外百年瞬息惟樂幾何有核杯盤隨意所命母以豐約拘也檄書馳告盍勇而前

隱趣

韓

澆

仲止

長松怪石去墟落不下一二十里鳥徑緣厓涉水於草莽間數四左右兩三家相望雞犬之聲相聞竹籬茅舍燕處其中蘭菊藝之臨水時種梅桃霜月春風自有餘思兒童婢僕皆布衣短褐以給薪水釀春酒而飲之案無雜書莊周太元楚辭黃庭陰符楞嚴圓覺數十卷而

已杖藜躡履往來窮谷大川聽流水看激湍鑒激潭陟
危嶠坐茂樹探幽壑升高峰顧不樂而死乎

遊洞靈詩序

尤 袤 遂初

舟次侍季父伯兄遊洞靈步行五里夾道皆喬木參天
鶴巢其上若笑若咳澗水瀲灩鳴聲甚悲殆不類人間
世入洞宮覽前賢留題徘徊久之由石徑里許達於洞
洞深數十丈磴道險絕俯僂僅可下寬廣容數百人大
石離立或下聳欲落若劍盾矛戟相撐拄若薨棟連地
崛起而不斷若虎豹蹲伏俯踞而拏攫中有小門持炬
乃得入丹竈井壇存焉由石罅而上皆竒石怪形無窮

其狀旁行屈曲益深遠不可到其陽有懸厓滴乳水水流澗谷乍細乍大自成宮商橫澗得小閣可憇朱藤纏絡厓上丹花藪藪下墜芬香襲人毛髮凜然欲少留而大風作遂歸余遊山川多矣茲遊最可紀因成五百字貽我同志以備他日觀覽焉

百丈山記

朱熹

登百丈山三里許右俯絕壑左控垂厓疊石為磴十餘級乃得度山之勝蓋自此始循級而東即得小礀石梁跨於其上皆蒼藤古木雖盛夏亭午無暑氣水皆清澈自高淙下其聲濺濺然度石梁循兩厓曲折而上得山

門小屋三間不能容十許人然前瞰澗水後臨石池風來兩峽間終日不絕門內跨池又為石梁度而北躡石梯數級入菴菴繞老屋數間卑庳迫隘無足觀獨其西閣為勝水自西閣中循石罅奔射出閣下南與東谷水並注池中自池而出乃為前所謂小澗者閣據其上流當水石峻激相搏處最為可玩乃壁其後無所睹獨夜卧其上則枕席之下終夕潺潺久而益悲為可愛耳出山門而東十許步得石臺下臨峭壁深昧險絕於林薄間東南望見瀑布自前巖穴漢湧而出投空下數十丈其沫乃如散珠噴霧日光燭之璀璨奪目不可正視臺

當山西南缺前揖蘆山一峰獨秀出而數百里間峰巒
高下亦皆歷歷在眼日薄西山餘光橫照紫翠重疊不
可殫數旦起下視白雲滿川如海波起伏而遠近諸山
出其中者皆若飛浮來往或湧或沒頃刻萬變臺東徑
斷鄉人鑿石容磴以度而作神祠於其東水旱禱焉畏
險者或不敢度然山之可觀者至是則亦窮矣余與劉
充父平父呂叔敬表弟徐周賓游之既皆賦詩以紀其
勝余又叙次其詳如此而其最可觀者石磴小礪山門
石臺西閣瀑布也因各列為小詩以識其處呈同游諸
君又以告夫欲往而未能者

東郭居士南園記

黃庭堅

以道觀分於蘄巖之上則獨居而樂以身觀國於蓬草之間則獨思而憂士之處汙行以辭祿而友朋見絕自聾盲以避世而妻子不知況其遠者乎東郭居士嘗學於東西南北所與游處半世公卿而東郭終不偶駕而折軸不能無悶往而道塞不能無愠退而伏於田里與野老並鋤灌園乘屋不以有涯之生而遂無隄之欲久而遽然獨覺釋然自笑問學之澤雖不加於民而孝友移於子弟文章之報雖不華於身而輝光發於草木於是白首肆志而無彈冠之心所居類市隱也摠其地曰

南園於竹中作堂曰清玉歲寒木落而視其色風行雪
墮而聽其聲其感人也深矣據羣山之會作亭曰翠光
逼而視之土石磊砢繚以松楠遠而望之攬空成色下
與黼黻文章同觀其曰翠微者草木金石之氣耶其曰
山光者日月風露之景邪不足以給人之欲而山林之
士甘心焉不知其所以然而然也因高作閣曰冠霞鮑
明遠詩所謂冠霞登練閣鮮玉飲椒庭者也蟬蛻於市
朝之溷濁翳心亨之葉而乾沒之輩不能窺是臞儒之
仙意也其晏居之齋曰樂靜蓋取兵家陰符之書曰至
樂性餘至靜則廉陰符則吾未之學也然以予說之行

險者躁而常憂居易者靜而常樂則東郭之所養可知矣其經行之亭曰浩然委而去之其亡者莎雞之羽逐而取之其折者大鵬之翼通而萬物皆授職窮而萬物不能撓豈在彼哉由是觀之東郭似聞道者也東郭聞若言也曰我安能及道抑君子所謂困於心衡於慮而後作者也我為子家壻軒冕不及門子之姑氏懟我才者數矣殆其能同樂於邱園今十年矣可盡記子之言我將劓諸南園之石他日御以如臯雖不獲雉尚其一笑哉予笑曰士之窮乃至於是夫於是乎書東郭之鄉族名字曰新昌曾子飛作記者豫章黃庭堅

游信州玉山小巖記

曾 鞏

去縣治所東南二十五里有山秀特卓詭介然出於羣峰之表下有浮圖幽邃冲靜棟宇樸約無緣飾刻鏤而與俗絕遠遊其間真若排闥闔登閭風追伯僑羨門而與之馳騁翩翩然有超忽荒籊烟外之意景祐二年家尊受詔為是邑宰僕侍偕來至未周歲居甚無事思有以遠覽為塵外之樂者得是小巖焉其狀畧曰距寺西南隅四十步有奇踰小橋西北至於巖下隆然而有門初若隘局不可通者入其中闢而益廣其道盤屈嶮嶢而無光明隆超俯降登陟艱難甚乃命僕人秉燭破其

曉翳昧默羣而入焉其石之異有重碧聳翠崛然本於
下而起者有勢依理合峨然覆於空而存者有鱗疊羽
綴委其旁而列者有壁峭刃攢繚其隅而倚者森然巍
然瓌瑋竒怪與珉珉甚遠探其穴犬牙之峙視其形若
圭壁聯植綴若瞻浮雲枝匣葉麗錯置旁列乎空曠駭
若窺武庫巉然見戈甲藁委並擁乎王府行十餘步上
下有水聲潺然若急鳴玉而趨者非絲竹也而聽之者
心平氣舒訝乎韶濩之奏有忘形絕累之趣益知軒冕
而榮者為其外恬靜而居者為其內又行二十餘步至
於西北隅有若架危構虛成宮殿而宅浮圖之像者上

蔽下承中曠然甚夷其下有鍾乳圍五六人凝而欲滴者若簷溜垂空合而外結積而廣者若聚雪委平厓側崇而未淺膩如酥凝分如瓜形垂如蓋張色若海波風聚而為沫食之咄吻津舌異若蔗漿露蕊殫乎美味說者云可以安躬輔氣頤津休神為不死之藥自始通至於其深飈發衆竅當之愴然體清飈振忽怒反煬為冷幽蟲伏蛇往往鳴息其下又行三十餘步狀益奇詭而石上俛壓乃可前人甚疲而恐懼者益衆僕固求窮其終而不我從遂相與復還噫嘻使我遺泉石之勝而不得遠騁周視良可惜也是日之會者叔父易豐伯洪伯

氏肇成之繹世昌仲氏年子進宰元輔其名皆以書於石矣懼其遠而翰墨剝缺也復使僕實其事為記以詒永久烏呼自古述山水者多矣見其瓌美幽麗而多謔之神明之為者其言怪誕迂謫非戴縑垂紳而遊者所宜尚予不敢知也故於是而獨無取若夫觴豆之豐約絃草之嘲轟皆羈於流俗而不有異非書巖石之本輒復略其辭焉是時景祐三年仲夏五日戊子也

武昌九曲亭記

子瞻遷於齊安齊安無名山而江之南武昌諸山陂陀蔓延澗谷深密中有浮圖精舍西曰西山東曰寒溪依

山臨壑隱蔽松樞蕭然絕俗車馬之跡不至每風止日出江水伏息子瞻策杖載酒浮漁舟亂流而南山中有二三子好客而喜遊聞子瞻至幅巾迎笑相攜徜徉而上窮山之深力極而息掃葉席草酌酒相勞意適忘反往往留宿於山上以此居齊安三年不知其久也然將適西山行遊於松柏之間羊腸九曲而獲少平遊者至此必息倚怪石蔭茂木俯視大江仰口陵阜旁矚溪谷風雲變化林麓向背皆効於左右有廢亭焉其遺址甚狹不足以席衆客其旁古木數十其大皆百圍千尺不可加以斤斧子瞻每至其下輒睥睨終日一旦大風雷

雨拔去其一斥其所據亭得以廣子瞻與客入山視之
笑曰茲欲以成吾亭邪遂相與營之亭成而西山之勝
始具子瞻於是最樂昔予少年從子瞻遊有山可登有
水可浮子瞻未始不褰裳先之有不得至為之悵然移
日至其翩翩獨往逍遙泉石之上擷林卉拾澗實酌水
而飲之見者以為仙也蓋天下之樂無窮而以適意為
悅方其得意萬物無以易之及其既厭未有不洒然自
笑者也譬之飲食雜陳於前要之一飽而同委於腐臭
夫孰知得失之所在惟其無愧於中無責於外而始寓
焉此子瞻之所以有樂於是也

遊韓平原故園

□□□

丁亥九月四日余偕錢菊泉至天慶觀訪褚伯秀遂同道士王盤隱遊寶蓮山韓平原故園山四環皆秀石絕類香林冷泉等處石多穿透蘄絕互相附麗其石有如玉色者聞匠者取之為環珥之類中有石罅杳而深泉涓涓自內流出疑此即所謂閬古泉也罅旁有開成元年六月南岳道士邢令之錢唐縣令錢華題名道士諸葛鑒元書鐫之石上又南石壁上鐫佛像及大字心經甚奇古不知何時為火所燬佛多殘缺又有一洞甚奇山頂一大石墜下旁一石承之如餗飣然又前一巨石

不通路中鑿一門門上橫石梁又有一枯池石壁間皆細波紋不知何年水直至此處然則今之城市皆當深在水底數十丈矣深石為陵非偽言也其餘磴道石池亭館遺址歷歷皆在雖草木殘毀殆盡而山石秀潤可愛大江橫陳於前時正見潮上如足練然其俯視則太廟執政府在焉山頂更覺奇峭必有可喜可噩者以足憊不果往且聞近多虎往往白晝出沒不常遂不能盡討此山之勝故書之以諗好遊者

遊西山記

劉祁京叔

余髫髻間嘗聞先大夫言龍山之勝甲鄉山時幼未能

往其後在南方北望依依每以為歎甲午歲還渾水明年秋八月釋菜於先聖越明日拉友人河陽喬茂松壽卿雲中劉偕德升暨弟郁同遊初出西城日方中望西山而行一二里涉水又前七八里至李谷谷在永安山下流波古木相交仰視之秋色如畫稍東山之腋見厓間一抹碧尤佳村民曰此麻匯也予與二三子杖而詣步漸高並路水聲鏗鏘數股涉水行亂石間里餘忽見青松綠楊蒼蔚中鑿厓而屋既至有僧居因共坐西軒望平原諸峰橫立南顧永安山崕巖獨雄尊斜日秋烟滉蕩百里迫暮留詩而回夜宿李谷遲明上永安山初

入谷路甚艱兩厓夾峙峭峻其石皆跨谷縈路詭怪若
坐卧起立且時聞水聲盤折而上足慄目荒前二三里
忽見一峯突兀孤高樹色青黃紅紫間錯曉日映之錦
鮮束諸小峯側列相附又東一嶺獨嵐翠無日氣真帷
帳間諸人喜快詠詩步益健又前數百步峰轉境又佳
遂各坐大石且在青檜影中石有苔華溼漬繡文口縷
可愛因相與俯視川野倚樹浩歌又前數十步忽聞有
聲如風雨震山又如千人喧笑不已逼視之乃流泉一
派自山下入絕壑穿林絡石雪練飛□竚聽久前至烈
風厓厓險特蓋兩峰最高蒼藤赭蔓蒙冒下有泉源諸

人相謂曰此境絕不可不識即手泉研石各題詩又前數步路益險見西厓間復有泉出流大石上樹影交翬聲鏘鏘微風吹散珠琲四落余曰此石名琴泉又賦詩又前幾二三里樹木叢陰中殿閣屹然四五所蓋玉泉寺也路側皆暗泉行草間瀝瀝如人語言或者披草掀石決其源方去既入寺寺宇歲深且經亂摧毀多厨堂鍾閣雨崩草翳僧寮多壞址獨萬聖殿完麗可觀殿中金碧璀璨溢目又有石羅漢像數百擊之鏗然亦奇緻晚憇僧舍其舍蓋余兒時從大父避亂所居追惟舊事為之惻愴起尋玉泉泉在西南石厓下如井厓間枝溜

滴瀝絡莓苔上有古樹覆蔭頗陰肅因留題殿壁紀予
今昔遊諸人亦各詩其後南上祖堂堂絕高北望神州
在掌上城邑如棋局東則岳神山如屏青松翠柏間隱
隱有樓觀南則羣山迤邐高下淺深異姿秋葉古林色
明艷斜陽照灼金紫滿山堂後有徑上山巔余縱步獨
往徑狹而危捫羅以前望峰端樹木明□度其境必異
銳進百餘步困憊又皆落木梗路遂回然終以為恨北
過法堂觀維摩像堂亦傾漏不完天曛入僧舍既夜月
出清寒逼人予與諸人散步檐外見峯巒萃樹木陰
森禽聲嘲哢相應答仰視星斗磊落與人近皎然天地

如在玉壺中又相與嘯詠約二更方就寢詰旦出戶見
白雲縷縷出東山延布南嶺上狀如飛龍蜿蜒山中露
氣蕭爽回念塵域恍如夢間利火名膏銷鑠淨盡復往
祖堂川原浮靄蒼茫城中青煙萬道俄而瀕洞瀾漫莫
能辨須臾日出東嶺紅霞青雲屬聯滿山草木光炯炯
叢石峭壁呈奇獻異欲動搖如生乃率二三子登北臺
臺並絕頂支一峯緣厓百餘步方至回觀大山峭拔則
蠟然草樹紅碧點綴斑駁西顧諸峰如綵樓相蔽虧陽
光陰氣晦明不一北望平原百里際北嶺外雲中城闕
浮屠如錐金成渾源二郡及諸村落若盤盂羅列田疇

若龜甲開張澗波數處若缺鏡裂素散擲微雲薄霧乍
起乍伏若鮮衣輕袂婆婆又相與賦詩賞歎粥餘別寺
僧遊龍山路自西南往穿枯木翠蔓間里餘過山脊恍
然異境也俯視重峰複嶺秋物凋徧且目極皆山無平
地厓左折徑稍夷厓上多大石或人立或獸呀或禽翔
或鬼攫森悚可畏前至大林林皆青黃紅紫相間櫛密
時時逢怪石睨路狀詭異山風颭至葉落如雨觸石覆
面濛濛飛嵐走翠隱映林影中旋變滅又三四里林窮
有平岡數畝可田下有泉北流又入林益西三四里大
木翳空蔽日樹底有暗泉蒙榛敗葉縈漬微有聲厓轉

而南忽見龍山寺乾機坤秘駢露疊開四面諸峯如踴躍相跂大殿在山腹丹碧湮摧雲堂影室在殿西簷牖亦圯然其規制宏且邃依然南俯深澗澗外皆山相聯下有大林杳窅望莫際遂緣石磴上方丈大室三楹極整鮮西有一徑入樹陰中百餘步至文殊殿殿在孤峰上號捨身厓神像精緻妙絕遠望千巖萬壑絡繹參差樹葉日光爛然五色雖巧筆妙手不能圖且繡蓋其雄麗冠龍山闌外石如掌平其首騫下窺黝黥無底南則清涼五臺歷歷且遙見代郡川西則鄴陽馬邑諸城皆微茫可數諸人嘆息久之稍北往西方丈室在峭巖下

懸柱而脩傍視訝相恐室中讀雷少中詩石刻蓋予從
大父洺州君所書又有予從父懷遠君詩在壁其南境
物不減文殊殿斯須過鍾樓出方丈後上萱草坡寺僧
云每當秋夏交萬花被坡錦繡堆花多金蓮如燈照山
谷又萱草無數故以云又號百花岡惜余來暮不得見
緣坡草滑步旋顛既上立大木間東望峰巒奇秀又南
數步至山巔曠蕩開廓千里目中秋容蒼然羣山齒立
蓋天下絕境也下瞰西方丈在厓中又有大石突空出
德升獨踞而歌余慄不能往忽聞有聲如雷震在文殊
殿西遊氛歛起疑霹靂出礪底諸人駭焉後問之寺僧

乃大木落也。礧礧移時，片雲突涌，垂空恐雨作，乃下飯。餘往西巖，巖在西方丈西，數峯如斬截，巋磊砢相倚。仰觀凜凜，禿人神下有屋三楹，幽潔。前有大石，石上有大樹，陰翳翳，其境物大槩如西方丈前。忽見浮陰四合，微雨落，又飛雲洶湧上走，騰騰然。諸人皆在雲氣中，咫尺相失。未幾，夕日出，光景鮮明，餘雲變化半隱晦。暮歸，方丈見白雲縹緲如帷幔，數十幅自文殊殿東南來，奔馬莫能追其間。樹彩厓姿披露，閃爍怪麗甚。山風擺蕩，林木駭人若天地轟礧，開震矣。夜宿方丈東軒，未寢，開門，月在空，陰氣已開，巖巒樹木殿閣相映，頗悖悚。余行

吟軒外幾夜半方眠自覺襟懷瀟灑意氣雄壯如神仙
中人也曉陰復合余獨曳杖復往文殊殿雲光霧色衝
突勃鬱如元氣中西望川原莽蒼不可見西巖西方丈
皆為烟雨晦藏秋風怒號疑鬼神交戰青林紅葉隱映
乍有無余嘆曰生年三十局促城市間不意今朝見天
地偉觀以寒甚不能久留乘雲氣而回迨雨止復與諸
人往西巖西方丈題詩且談笑良久時日已中別寺僧
而歸復過雲堂見梁秀岩瑀詩字畫亦美遂由舊路東
北往林間殘雨滴衣嵐氣烟霏交走橫鶩皆眷戀不忍
去因共作龍山詩又恐雨復作仍遲疑忽見平川晴色

爛然行至水窟路益北一二里出林回望龍山脊巍峻
與天角又數十步忽見高厓峭壁扶裂分張日光中映
如潑黛如按藍厓間有水光炯然如劍出匣射日四山
樹葉炫人余與二三子健躍歎賞又作詩以紀之自此
無深林大木行黃花紅葉中又二三里行甚苦扳援方
能進忽見孤峰嵌天峰上碕攢擁牛角口鼻軒軒下一
峰腋出如劍諸人不覺失聲稱奇又作詩紀之回顧諸
峰千態萬狀不可殫記路益下三四里至神谷谷中有
泉出石罅浪然其流散漫出山外厓東有神祠祠邊有
樹余與二三子憇祠下題詩天已暮月上隨水聲行又

里餘方出谷又涉水乘月往威謀宿野寺中明旦別壽
卿余三人者歸渾水嗚呼余生山水間故有樂山水心
然南遊二十年所居皆通都大邑無山林嘗迫狹不自
得今因北歸得遊歷故山可勝快哉況干戈未已棲隱
為上行當結屋山中覽天地變化之機而又讀書足以
自娛著書足以自奮浩歌足以自適默坐足以自觀逍
遙澗谷傲睨雲林與造化為徒與烟霞為友雖飯蔬飲
水無愠於中振迹寬心可以出一世之外又何必高車
大蓋駟騎滿前方為大丈夫哉因記

遊林慮西山記

癸卯之冬十月初自蘇門徙居相臺明年秋八月玉峰
魏公自燕適趙東平遂登太山拜闕里將北歸過相臺
會公謂初曰吾聞太行之秀曰黃華曰硤谷爾其從我
一遊乎初曰諾初出安陽郭西四十里渡洹水俗號安
陽河夕宿輔巖邑館翼日同邑中士人尊酒坐池上池
有數泉感沸如玻璃盆涌出萬珠柳陰映翳頗瀟灑南
謁宋韓諫議墳魏公琦父也墳皆老柏參天碑有樓文
則富鄭公弼撰王岐公珪書皆完具旁有浮屠號孝親
院石刻魏公所建院規制宏敞柱皆文石佛像如新茶
坐西寮徜徉竟日遲明西上路皆坡陀岡阜間以樹林

行幾四十里過馬店望林慮諸山若蟻尖若黃華若天
平若缺谷齒立玉峯馬上笑談喜見顏色前涉橫水水
舊有石橋甚巧麗今圯壞紛然晡至林慮山橫峙天西
如城壁相銜爭雄角銳潑黛凝青而高下險夷不一玉
峰曰昔人稱林慮名山信哉暮會邑中士大夫皆曰游
當自黃華始且北而南可也明日遂出北城邑人張君
佩玉偕往西北約二十里入榭林林行一二里入谷兩
厓夾徑徑益東厓大石鱗差馬足行甚艱下皆絕壑頽
洞樹木蓊鬱水聲潺潺使人耳目翛然前觀山勢峭拔
奇偉不覺失聲歎異又一里餘厓豁地平叢竹如雲竹

中堂殿茅亭數處乃黃華古禪刹也今為老氏居道士
數輩來迎解鞍坐覽樂甚殿之石柱刻宋人題名及張
相天覺賦高歡避暑宮詩詩云南北紛紛似奕棋高王
霸業起偏裨情知騎虎非安計豈是青山避暑來音因
憶王翰林子端遊黃華詩蓋此寺廢已久王詩云王母
祠東古佛堂人傳棟宇自隋唐年深寺廢無人往滿谷
西風栗葉黃飯餘屏騎乘杖屨以西涉小溪行約一二
里山益奇巔峯嶄岫回互揜映千萬狀不可紀山端有
小峰扶出如立指號仙人峰遇佳處輒坐樹下石聽流
泉漱玉鳥語應人回視向來塵土中便如隔世又前數

武地平可耕厓腋有草庵且闌籬種菜芋亦道士舍西
上路浸高又二里餘陟峻阪號公主關有厓號梳洗樓
意其為前代帝子游衍跡漢武帝女弟封隆慮公主豈
此邪阪皆巨石為堡砦摧裂無蹊徑捫蘿以登又里餘
路窮大巖合若環屏幃稍南孤峯削成拔地劃出號挂
鏡臺臺西樹林間望見山脊玉龍蜿蜒下垂搖曳有聲
迫視之懸泉也相與啗吒因列坐臺址方石縱觀蓋泉
自石門而下初勢甚微已而散布半空特詭異其始來
也如飄風扇雪瀰漫一天少焉如驟雨落雲淋漓萬壑
或如飛練千尺騰擲不收又如珠簾百幅聯翩下墜乍

散乍聚乍緩乍急乍去乍來乍鉅乍細霏微滴瀝濺面
洒肌浩蕩鏗錡驚心動魄可以起壯志可以醒醉魄可
以洗塵紛可以平宿憤亦天下偉觀也下瀦為潭口泓
湛碧水瑩鏡明向之水聲皆其流派迨出山而洑不知
其所往此又異也步至巖東北有大龕如列屋可坐數
十人尋繹昔年題名在龕壁玉峯健嘆以為東遊未嘗
見此移時緬懷趙武靈王登黃華之上與肥義謀胡服
騎射教百姓以強其國亦一時雄傑張君曰泉之上有
路坦平直抵天平望絕壁有石竅曰青龍洞尾蓋門在
天平也其中閭黝多水東北有高歡避暑宮殿址尚存

且有碑以路絕不能到又曰高歡葬此山石巖中鐵索
紉其棺嘗有人見之祁舊讀司馬氏通鑑云高歡薨虛
葬漳水西潛鑿成安鼓山為穴約其柩而塞之蓋距此
不遠與所傳小異張又言此山佳處甚多惜不能遍歷
日斜由舊路而東石壁而堂石像浮圖精緻行三四里
路忽分張云由南而往殊勝厓轉三潭灩出大石間相
通號疊研皆流泉所瀦細流布石上縈紆明澈潭水口
口黝碧云有蛟龍居共坐潭側嘯詠仰山俯泉極快愜
南有古祠破裂號王母祠祠壁石刻云仙人王津葬母
於此號仙人冢土人祠以祈福祠前大木九今餘一焉

趙巖闢光弼來遊趙鎮侍行蓋宋宣和間人也字畫不
凡東有龍祠頗整完中石刻紀異南則地復曠濶行荒
榛蔓草中里餘復抵寺舍會日已暮騎出山顧念勝游
如在天上歸而寢不寐明發邑中士大夫讌集作一日
留會姚公茂諸君南來相約同遊猷谷日吳出南城三
十里入櫛林林比黃華頗大林行四五里入山路比黃
華頗夷谷亦曠樹木繁鉅水聲比黃華差小渡溪至寶
嚴寺寺在竹間舊有名剎冠一方遭亂惟二浮圖在大
殿經閣址宛然新構功未畢其南厓號五松亭亭亡止
餘一松王子端記之碑陰刻劉治中濤詩濤亦聞人東

北石屋號戒猴洞洞中浮屠石像及諸佛經刻在石起
高齊峯端有檐薨隱隱號金門寺云有僧居路險林深
遊者早到會坐西軒軒外竹成林流泉琅琅踰軒入竹
如簷溜聲不絕東南山缺瞰川原雖峭密不及黃華而
宏邃有過之者寺有浴室放泉以燒旦入浴神體爽繼
飯餘讀張天覺聖燈圖記及邇德舉寺碑文頃之復杖
屨西上厓北轉有大石方丈餘雪瑩掌平枕溪號石席
上刻杜相公美所作銘云溪石齒齒溪水潺潺鳴玉跳
珠水流石間娟娟溪月泠泠溪風風吟松梢月湛杯中
欲醉而歌既醉而卧悠悠千古浮雲之過克相人辭清

婉字畫亦適逸可愛即共坐賦詩起而前山特變化出
奇林益深密時時佇立從容霜已降樹林有改色者於
青翠中間見紅葉如春華又清泉白石舉步如圖畫天
風卒至樹聲與泉聲雜如笙竽環珮交鳴又若琴瑟未
終鐘鼓迭起日光下遠林陰蘿陰璫瓏斑駁龍蛇篆隸
交余數人者坐其間談道論文自謂雖此世捨攘亦片
日如仙耳又三四里路窮巖合勢如黃華山巖巔飛瀑
下流亦如黃華水山疑樓閣刻畫削蠟裁金水則絡繹
縈綿千絲萬絡乃共坐泉間容與天晴月明映玩逾佳
珠網玉旒搖動半天外晶熒閃爍姿態橫生濺雪跳冰

潭面蜂起又相與賦詩道其事巖下多大石細流穿石罅金鐵聲舊有亭號知勝王子端作記今無餘迹歸途題大石龕晚出山與公茂諸君別第以不到天平為恨還宿林慮雨留三日九月朔霽還相臺越重九之明日東北行四十里宿鄴鎮鎮古鄴地有曹魏所口銅雀金虎冰井三臺故基暮登臺置酒西望太行所謂黃華硤谷皆隱約可辨漳水西來如劍如練絡北臺而東蓋河朔勝處也且其地南控大河西連上黨東扼齊魏北負燕趙實天下襟喉此自古英雄如曹袁慕容高氏所以多據依又見故城隱嶙冢累累相望傷時吊古良用慨

然徙倚至曛宿南臺道士舍曉渡漳水別玉峯南歸後
月餘玉峯書來曰爾當為予記之乃援筆識其始末初
居代北鄉中名山已歷遊嘗謂太行魁天下山富奇麗
志欲一覽然非偕鉅公偉人不足稱山之雄玉峯初姑
之夫也高名大節一世所推乃今邂逅得從之遊誠遂
所願方將階此過蘇門扣百巖訪盤谷登天壇西遊河
汾觀砥柱上中條覽太華入秦中以迄天下形勝已與
公有成約會當治行嗟乎世之人皆驅馳智力以金帛
車騎相夸豪而吾儕獨玩心泉石放浪於寂莫之境要
之各有樂未可以為彼是此非至於後世又不知其孰

得失況古之聖賢莫不樂山樂水若夫究地理考土風
辨古今識草木皆不可謂無益於學姑從所好以畢餘
生或有笑其迂僻者亦不得而辭也乙卯春正月之望
謹記

遊龍山記

麻草

信之

余生中條王官五老之下長侍先人西觀太華迤邐東
遊洛因避地家焉如女兒烏權白馬諸峯固已厭登飽
經窮極幽深矣草代以來自雁門逾嶺之北風壤陡異
多山而阻色往往如死灰凡草木亦無粹容嘗切慨歎
南北之分何限此一嶺地脈遽斷絕不相屬如是耶越

既留滯居延吾友渾源劉京叔嘗以詩來盛稱其鄉泉
石林麓之勝渾源實居代北余始而疑之雖然吾友著
書立言斷信於天下後世者必非誇言之也獨恨未嘗
一遊焉今年夏因赴試武川歸道渾水脩謁於玉峯先
生魏公野服蕭然見余於前軒語未周浹驟及是邦諸
山若南山若柏山業已遊矣惟龍山為絕勝姑缺茲以
須諸文士同之子幸來殊可喜乃選日為具拉諸賓友
騎自治城西門行十餘里抵山下山無麓乍入谷未有
奇沿溪曲折行數里草木漸秀潤山聳出嶄然露芒角
水聲鏘然鳴兩峯間心始異之又盤山行十許里四山

忽合若拱而揖環而衛者嘉木奇卉被之葱蒨醲郁風
自木杪起紛披震蕩山與木若相顧而墜者使人神駭
目炫又行數里得泉之泓澄渟滙者焉洑出石罅激而
為迅流者陰木蔭其巔幽草繚其趾賓欲休咸曰莫此
地為宜即下馬披草踞石列坐諸生淪觴以進酒數行
客有指其西大石曰此可識因命余余乃援筆書凡游
者名氏及游之歲月而去又行十許里大抵一峯一盤
一溪一曲山勢益奇峭樹木益多杉檜枯柏而無他凡
木也溪花種種金間玉錯芬香入鼻幽遠可愛木蘿松
鬣胃人衣袖又縈紆行數里得岡之高遽陟而上馬力

殆不能勝行茂林下又五里兩嶺無歧中得浮屠之居
曰大雲寺有僧數輩來迎延入館於寺之東軒林巒樹
石櫛比楯立皆在几席之下憇過午謁主僧英公相與
步西嶺過文殊巖巖前長松數本挺立有磴懸焉下瞰
無底之壑危峰怪石巔岼巧鬪試一臨之毛骨森豎南
望五臺諸峰若相聯絡無間斷西北而望峰豁而川明
村塘井邑隱約微茫如棊局然徜徉者久之黃緣入西
方丈觀故侯同知運使雷君詩石及京叔諸人留題回
乃經北嶺登萱草坡蓋龍山絕頂也嶺勢峻絕無路可
步草而往深弱且滑甚扳條捫蘿疲極乃得登四望羣

木皆翠杉蒼檜凌雲千尺與山無窮此龍山勝槩之大
全也降乃復坐文殊巖下置酒小酌日既入輕烟浮雲
與暝色會少焉月出寒陰微明散布石上松聲憐然自
萬壑來客皆竦視寂聽覺境逾清思逾遠已而相與言
曰世其有樂於此者歟酒醺談辯蠡起各主其家山為
勝如郭主太華劉主茲余主王官五老更嘲迭難不少
屈玉峯坐上坐亦怡然一笑詩所謂善戲謔兮不為虐
兮政如是也至二鼓乃歸卧東軒明旦復來各有詩識
於石迨午飯主僧丈室已乃循嶺而東徑甚微木甚茂
密僅可通馬行又五里至玉泉寺山勢漸頗隘樹木稍

稀濶顧非龍山比寺西峯曰望景臺險甚主僧導客以
登歷嶽峯坐磐石其旁諸峯羅列或偃或立或將仆墜
或屬而合或離而分賈竒獻異不一狀北望川口最寬
舒金城原野分畫條列歷歷可數桑乾一水紆繞如玦
觀覽曠達此玉泉勝處也從此歸路僉不可騎皆步而
下重谿峻嶺愈出愈有抵暮乃得平地宿李氏山家卧
念茲遊之富與夫昔之所經見而不能寐若太華之雄
尊五老之巧秀女几之婉嚴烏權白馬之端重茲山固
無之至於奧密淵邃樹林蒼蔚繁阜不一而得則茲山
亦其可少哉人之情大抵得於此而遺於彼用於所見

而不用於所未見此通患也今中書令湛然公紀西域事稱金山之秀李子微貽友書論和林之勝有過於中州者不知天壤之間六合之內復有幾龍山也因觀山於是乎有得徒以文思淺狹且遊之亟無以發山水之秘異時當同二三友幅巾藁杖于于而行遇佳輒留以筆札自隨隨得隨紀庶幾茲山之髣髴云己亥歲七夕後三日王官麻草為之記

北使記

劉祁

興定四年七月詔遣禮部侍郎吾古孫仲端使於北朝翰林待制安庭珍副之至五年十月復命吾古孫謂余

曰僕身使萬里亘天之西其所游歷甚異喜事者不可不知也公其記之自四年冬十二月初出北界行西北向地浸高並夏國前七八千里山之東水盡東山之西水亦西地浸下又前四五千里地甚燠歷城百餘皆非漢名訪其人云有磨里奚磨可里紇里迄斯乃蠻航里瑰古途馬合魯諸番族居焉又幾萬里至回紇國之益離城即回紇王所都時已四月上旬矣大契丹大石者在回紇中昔大石林麻遼族也太祖愛其俊辯賜之妻而陰蓄異志因從西征挈其孥亡入山後鳩集羣紇徑西北逐水草居行數載抵陰山雪石不得前乃屏車以

駝負輜重入回鶻攘其地而國焉日益強僭號德宗立三十餘年死其子襲號仁宗死其女弟甘氏攝政姦殺其夫國亂誅仁宗次子立以用非其人政荒為回紇所滅今其國人無幾衣服悉回紇也其回紇國地廣袤際西不見疆畛四五月百草枯如冬其山暑伏有蓄雪日出而燠日入而寒至六月衾猶綿夏不雨迨秋而雨百草始萌及冬川野如春卉木再華其人種類甚衆其鬢髯拳如毛而緇黃淺深不一面惟見眼鼻其嗜好亦異有沒速魯蠻回紇者性殘忍肉手殺而噉雖齋亦酒脯自若有遺里諸回紇者頗柔懦不喜殺遇齋則不肉食

有印都回紇者色黑而性愿其餘不可殫紀其國主闍
侍選印都中之黔而陋者火漫其面焉其國人皆邑居
無村落覆土而屋梁柱檐楹皆雕木窻牖瓶器皆白琉
璃金銀珠玉布帛絲枲極廣弓矢車服甲仗器皿甚異
甃甃為橋舟如梭然惟桑五穀頗類中國種樹亦人力
其鹽產於山釀蒲萄為酒瓜有重六十觔者海棠色殊
佳有葱蒜美而香其獸則駝而孤峯牛有口脊羊而大
尾又有獅象孔雀水牛野驢有蛇四跖有惡蟲狀如蜘蛛
中人必號而死其餘禽獸草木魚蟲千態萬狀俱非
中國所有山曰塔必斯罕者方五六十里葱翠如屏檜

木成林山足而泉其俗衣縞素袒無左右腰必帶其衣
衾茵膜悉羊毳也其毳植於地其食則胡餅湯餅而魚
肉焉其婦人衣白面亦衣止外其目間有髯者並業歌
舞音樂其織紵裁縫皆男子為之亦有倡優百戲其書
契約束並回紇字筆葦其管言語不與中國通人死不
焚葬無棺槨比殮必西其首其僧皆髮寺無繪塑經語
亦不通惟和沙洲寺像如中國誦漢字佛書余曰嘻異
哉公之行也昔張騫蘇武銜漢命使絕域皆歷年始歸
其艱難困苦僅以身免而公以蒼生之命挺身入不測
之敵萬里沙漠嘻笑而還氣宇恢然殊不見衰悴憂憾

之態蓋其忠義之氣素貯乎胸中故踐□□間若不出
閨閭然身名偕完森動當世凜乎真烈丈夫哉視彼二
子亦無愧故余樂為之書以備他日史官采云

西遊記

顧文琛 淵白

至治癸亥之八月余舟泝洞庭而西輕風送帆凡二日
抵武陵益西岫愈狹水愈急又二日至桃源登山由小
口入稍上乃桃川萬壽宮宮有道士數十實先代命祀
兵後燬於火荒落殊甚廡下載黑虎巡廊事甚怪疑亦
黃冠輩張大其說問道士避秦洞何在道士指山下洞
云去路已迷人無得入者宮側有徑蓋瞿童得仙處巨

木十圍中空童嘗趺坐其中後竟從木頂飛去晚泊舟宿山下明日舟人買竹置百文牽問其故云自此以上灘之大者三十六灘之小者不可悉數又明日遂行兩岸山聳立有山臨溪極峻而竅人語輒應石散亂出水中遙望有如伏獮者有如疊席者有如枯木倚空者有如龜魚昂首者有如蓮花浮水而出者有如人跂立而凝望者水底石有如棋枰而斷裂有文者有如牛馬卧者有如舟覆者有如沙囊墜水中者有如蟻蠕相粘者大抵舟行石間水與水鬪激湍高累尺篙人盡死相與撐拄然後得達稍弛舟輒却其順流而來者雖迅疾可

喜然觸石破舟者亦時有之自武陵至此凡三驛始至
清浪灘灘長三十里武陵至辰沅水之險惡者惟此為
最灘上即壺頭山山形如瓠壺山頂有伏波將軍祠俗
稱馬王廟伏波征五溪蠻嘗困於此今其俗甚嚴奉之
伏波傳亦載賊乘高鼓譟水疾船不得上以今想像之
誠可畏爾又數十里有椎灘相傳馬王椎碎此石殆不
足信道中山有如圉疑所謂石廩峰者亦此類有如屋
廬突起有如刀劍林立山形可怪皆平生所未見計自
武陵行八日始抵辰州陽治在山上有枝江入會溪蓋
五溪蠻所窟宅時出沒為民患州雖宿重兵控遏之不

能杜其害去州一驛盧溪縣縣極凋弊問之故老云去酉溪近蠻數出寇鈔官吏甚苦然縣境諸山特為勝絕所見懸厓峭壁巖刻險峻不可名狀厓半有棺窆焉凡數處皆人迹所不到不知棺從何來冥于此或謂向者洪水未平人或乘船至此以真棺焉然自洪水至今已數千年不知棺何為猶在皆不可曉者又一驛至辰溪縣雖小比盧溪殊勝近縣多山其峭聳特甚者名辛女洞俗傳槃瓠妻所葬故得此名與縣相直者名大酉洞天山下有大酉觀觀之側有善卷先生墓善卷姓名載於南華經人皆疑莊周寓言今得拜其墓武陵圖經亦

載德山為善卷隱處初名善德山後為宣鑒禪師道場
是果有其人非莊周誕妄然陽羨亦有善卷洞天山上
有善卷寺又不知即此人否也自此數程水流稍緩舟
行無恐自辰溪由枝江而入即麻陽縣其地迫蠻洞丹
砂水銀所自出在唐屬辰州故朱砂名辰砂宋析麻陽
隸沅州至今舟路不通自辰溪由大江而上至溆浦即
屈原九章所謂溆浦者尚想三閭大夫被放之後心煩
意亂亦嘗遠遊至此由溆浦而上至黔陽凡三驛復有
沅汨之苦灘號鸛鷁者迅急與清浪無異但不甚長耳
近安江驛有霜厓鶻巢之歲為人所探自山頂以繩束

腰繩至厓半探巢取其口雛飼養以供貢安江又多蓀
芷花極芬郁可愛意屈子所謂沅有芷者指此地也蓋
麻陽乃古夜郎李太白坐永王璘事嘗被竄焉而杜子
美詩有所謂龍標接五溪者龍標即今黔陽山也余作
簿麻陽嘗攝黔陽令故知二邑道里曲折風俗纖悉大
率二縣皆民夷雜居夷有數種其一曰□□□□□□
□苗則三苗之裔也其一曰徭所謂山徭也其一曰猺
猺其一曰狠狠皆槃瓠之種也喜則人怒則獸形容盡
之矣夷人皆好著斑衣以布為尾垂之尻後有銅鼓製
甚精巧狀如鍾以手提之擊地則其響如鼓夷俗祠神

則用之驗以漢史皆合又有山搖笛如笙之狀吹之聲似感栗其弩甚勁皆厥張出入則佩刀帶箭惟入縣邑則否由麻陽縣西南迤邐入蠻洞道中多山林木翳蒼猿哀哀叫其間日或夕行者愁恐夷人伺間以勁弩射猿煮食其肉取其皮貨之山多楠木大者連抱夷人得之剗其中為巨舟謂之舸艚山水大發則放舟而下縣民買以充載民富者或蓄數舟民俗造酒多用秬不用秫鉤藤取之號鉤藤酒疾病信巫不信醫喪葬則椎牛剗豕以食姻黨之來會葬者此皆其俗之異於中土者也然習俗雖獷亦或有願從師讀書者有鬪訟以理論

之或時見聽孔子所謂忠信篤敬可行於蠻貊者於此尤信黔陽邑境稍廣南與武岡邵陽抵界西與渠陽思南為隣山深林密奸宄伏匿有羅孔洞周圍數十里苗人多居之縣有追逮蠻輒旅拒不服洞旁有山其石可為研然亦不能至其頂取之極難邑有黔江樓廢已久余攝令日欲即其址建三賢堂祀屈原其中以馬伏波李太白侑坐庶幾使邑人想慕儒先文學之盛且不專以鬼神為事適會去官遂不果作自武陵至潭陽凡十六驛而道中所見者歷歷可紀方其在險愁怖交集又安能顧山水之勝既履平地回思向之所歷復欲一見

而不可得輒記其事如左庶幾時一展玩以慰心目云爾

鑑湖上已分韻詩序

鄧牧牧心

歲丙申三月三日陳用賓劉邦瑞胡汲古與余舉脩禊故事會於鏡湖一曲舊所謂鴻禧觀今易為寺遙望蘭亭招逸少酬之祝辭云某歲月日敢告晉右將軍王公惟公書法造化胷臆千歲之上不能發其端千歲之下不得方其武彼高才與遠識夫故不待悉數某等薄游會稽俛仰今古撫山川其感慨傷歲月之不與蒹葭演汙用告時序臨風有懷隕涕如雨禮竟主僧持酒出觴

客客亦返觴焉問姓名不告以出循柳陰復飲春波橋上歡甚有浩歌者有瞪目視太虛者有連舉大白不置者遊船自禹穴返出橋下仰見咸驚以為異人間有起望喧笑亦不暇恤或感慨言曰樂哉茲遊豈減永和時乎此去蘭亭不一舍而近風景猶昔之風景山川猶昔之山川井邑城郭雖時有變更亦豈大異昔日之井邑城郭邪天運無情忽其千載晉人風流蘊藉庸可復見方其流連觴咏俛仰興懷已知今日有感於其言者矣後之視今政為我輩發詎知千載後復有高曠如我輩者舉酒相酌其人謂誰哉其言謂何哉於是相顧歎息

余解之曰不然千萬世一日之積也千萬人一氣之分也死死生生於天地間如閱傳舍來者不得不往往者不得不來憧憧而未已也又安知晉人不復為我輩我輩不嘗為晉人也哉而以死生為大者前此猶未悟耳於是四人相顧而笑相扶持而下分韻賦詩舟中

西湖上已分韻詩序

今年春余東遊上越三月三日越人士有事蘭亭右軍祠余謝不往適同館人泛舟鏡湖上強與俱飲醉分韻既為之序越數日有自杭歸為余言濟南周公謹領東西州客十有四人脩禊事西湖以子不及與怏怏而已

余笑曰杭越相去僅百里其在太虛中不翅同處一毫
端我醉此若醉彼何與不與有邪又越月歸杭公謹出
所賦詩亦俾余序追思醉越時坐念西州故人其樂其
悲弗得知也西州故人念我獨得知其樂其悲乎哉別
未久也去未遠也其不相知若是則夫方生而知死足
悲既死而知生足樂豈通論邪一歎一生瞬息間耳其
不相知又若是晉人去我千歲矣不知我決矣我去晉
人亦千歲矣不知晉人審矣今日風流縕藉與永和數
子同乎否乎以地觀之越不知杭杭不知越以人觀之
生不知死死不知生以世觀之今不知古古不知今則

通志卷一
君與我握手而笑生之類也分袂以往死之類也古人所以歎別離之難乎天運易流人生有終會面之不可常也詩云詩云詩云乎哉又惡知杭越所不能限生死所不能化古今所不能移則無俟於詩者

白鹿山房記

大滌洞天發天目盤礴苕溪陽形勢最浙右自古有道來遊來居仙去可數然山中泉石勝處率多北向向南而勝者惟白鹿一山是山為大滌中峰升天壇在其上其下石室按舊志晉許遠遊真君作壇煉丹丹成天上白鹿迎去所以名山也唐吳貞節天師美文辭與太白

齊名嘗構石室為藏書地逮尸解宣城語弟子當還天
柱石室此石室所以著也宋陸永仲王元素朱復常諸
君相繼於此得道著益甚自永仲築舍隸洞霄宮俯仰
二百年興廢不一僅蹊徑存大德甲辰沈君介石住山
登覽悽愴追前脩而弗返吊遺蹟其將湮規營高居以
待畸士顧土木繁興力有未暇於是徐君和甫贊曰屋
無儉奢取足蔽風雨郭文舉其人豈以苦覆為嫌邪否
則食粟而已居之廣廈奚益乃作數楹石室顯雖門館
庖湢不過具體前睨天柱後負升天壇龍鳳二洞左路
所從入栖真洞右望而見之四周山勢若屏障環合下

五巨松翼然拱立薰風足以徂暑愛日足以避寒雪晨
月夜莫茲境為絕庶幾方外高躅肯息焉時鄧牧適留
山中孟君集虛為附屋後偏介兩石若樓船而方使得
遂棲隱志乃益命工發土得奇石五六有箕踞傲岸衣
襟離披而頂汙者有若越禹陵窆石若可縣者有若蠡
房螳封封穴交錯者有若初連圻者其首離立趾則若
屬其斷有加補綴若人為者曠古珍藏坐致目睫而牧
與之居欲扣不能言從將不能從欲棄復自不忍去則
憮然曰有是哉夫石山川之精秀融結翳蔽土壤不知
幾何年一旦有識者發之有力者拔之始得為人境絕

觀與天地不朽人獨無是秀且精乎日為情欲之土所翳事物之壤所蔽相發者無識自拔者無力以至於晦昧而終仰望晉唐宋而作者如虎鼠如鵬鷃不我相謀曾不若一石之有契也方歎息弗置有問名屋因循其本曰白鹿山房次第其語為記

鳳洲觴詠序

俞 鎮伯貞

金鳳洲在臨江郡城南蓋山水登臨之會舟楫往來之衝也西則崇岡隱天真郡址以前抱東則閣口橫野市仙壇而後闢南則紫淦之川玉笥之峽聯絡章貢蠻商海賈之所趨焉北則道體之堂麗澤之樓續繹沂泗章

甫逢掖之所居焉乃至順癸酉維莫之春王筇曾君紹
維來自澄湖拉廬陵劉性劉羅章表尚賓太原王誠恩
江聶守道清江蕭惠孫安城趙申瑾載酒洲上相與騁
懷遊目焉期不至者清江劉從龍西域海東雲淦陽何
仲謙也飲既樂甚於是分韻屬客各賦詩以述之是歲
之冬劉從龍為圖以紀之又明年秋持以示嘉興俞鎮
俾為文以序之想是日也春陽載熙水碧山翠揚舠戾
止席地就列冠巾戔戔邊豆楚楚談辯交作酬酢無算
仰歸鴻之天氣俯潛魚之川騰叩舷舒嘯則波瀾為之
起湧操筆攝思則烟雲為之下集既乃悵美人之不來

感良會之難再此時此景固已與圖之所寫詩之所賦俱陳迹矣而人心之樂則未始不與山水相無窮也蓋余亦嘗樂是洲矣惜不得諸賢與之俱為之獨立長眺冥想六合徙倚踟躕者久之於心終不忘今也得披圖誦詩追憶往事以序諸賢之樂焉能不動於中哉是知山水登臨固人情之所同欲而聚散離合亦理勢之所必至故求得山水之形於目則獨往以自適不若羣遊以相娛求得山水之性於心則羣遊以相娛又不若與山水相忘而為一昔孔子之論仁智嘗以樂山樂水言矣而動靜者其體樂壽者其效也諸賢欲永茲樂於無

窮知是求之則其性得矣豈直觴詠乎哉

遊志續編卷上

遊志續編卷下

南村居士陶宗儀九成

石臺紀游序

黃潛晉卿

寧海多大山其高或俯視雲雨名於仙經地志者天門
閭風丹邱桐柏而南田號為福地好事者率病其幽遠
險絕莫適至顧獨喜遊石臺石臺距縣治僅五里所山
皆土阜非有奇岩峭峰水泉花藥竹箭之美由山足緣
陂陀蛇行穿灌莽而上至其脊乃得巨石五六相積壓
如累器物其頂上隆然方正而平劣可坐十人旁眺四
山屏幃離立東北山缺處海霞島露縹緲可睹也臺之

勝止是特以卑近而易即凡觀遊者恒用為稱首余佐
縣之又明年始合耆俊之士登斯臺抉剔蔽翳求昔人
之遺刻既滂滅不可識唯慶元諸老題詠故在徘徊久
之望東麓杉松蒼翠間甍桷隱隱或曰是謂南園道院
乃歛而休焉因相與飲酒賦詩抵暮而去蓋忘其為山
之卑地之近也孰使予樂焉而無志乎其高且遠者非
茲臺也邪然予聞古君子雖甚陋必有游息之物以養
其觀眺而發其意慮卑高近遠物之不齊者也夫苟無
累於物斯異方而同得也詩所以志茲遊之得序而歸
之南園以為石臺故事

楊氏池堂燕集詩序

戴表元

帥初

丙戌之春山陰徐天祐斯萬王沂孫聖與戴表元帥初
台陳方申夫番洪師中中行皆客于杭先是雪周密公
謹與楊承之大受有連依之居杭大受和武恭王諸孫
其居之苑籞多引外湖之泉以為池泉流環回斗折涓
涓然縈穿徑間林篁覆之禽魚飛游雖在城市而其山
溪之觀而流觴曲水者諸泉之最著者也公謹樂而安
之久之大受昆弟捐其餘地之西偏使自營列口第以
居公謹遂亦為杭人杭人之有文者仇遠仁近白珽廷
王屠約存博張栻仲實孫晉康侯曹良史之才朱棻文

芳日從之遊及是公謹以三月五日將脩蘭亭故事合
居遊之士凡十有四人共燕於曲水客皆諾如約而大
雷雨作自朝達晝不止官途水尺行者病涉十四人之
中其六不至公謹望望然異之起視曲水則既漫而為
壑應而曰余惟客缺是媿若飲豈必曲水哉乃揖其在
者遷酒與有近集于臨池之堂背堂有危樓翼然俯納
衆碧大受又特具禮領客陟之既又復于初公謹大出
所蓄古器物享客為好或膝琴而弦或手矢而壺或目
圖與書而口歌以醉醒莊諧駢諱競洽各不知人世之
有盛衰今古而窮達壯老之歷乎其身也酒半有作而

歌曰茲遊樂哉其有思乎抑亦知夫茲遊之所由起乎
蓋夫茲遊者蘭亭之變蘭亭者鄭國風溱洧之變也鄭
之溱洧在當時小人知慚之而晉之蘭亭在後世君子
以為善也雖然人生而感哀樂之情猶天時之不能廢
于寒暑其廢之有節而導之有故苟使變而不失正則
歲時行樂以盡人事之適豈惟君子雖先王張弛之道
其孰能廢之方晉之未遷故都之氓處五方之中而習
累世之盛男往女袂春游而禊焉固其閭閻妻巷之所
通行也晉之既遷名士大夫倚居而露宿愁苦而嗟咨
有願為盛時故都之氓而不可得也故且駕言出游以寫

我憂而何擇于襖之有吾觀蘭亭一時臨觴援筆之作
率囁嚅喑默如長沮荷蕢冥然而遠懷其能言者不過
達生捐累如莊周脩脩然羨死灰枯骼之適若是者謂
之樂乎非邪今夫諸君之集于斯也宜又不得視晉人
而樂于晉人何邪于是坐中之壯者茫然以思長者愀
然以悲向之歎者欲幡然以辭慨然謹曰事適有所可
也今日之事知飲酒而已非歎所也且我何用遠如古
人盍各為辭以達其志辭之達志莫如詩公謹遂取十
四韻析為之籌使在者人探而賦之不至者授之所探
而徵之得某韻為古體詩若干言得某韻為律詩若干

言羣篇鼎成咸有倫理是庶乎繼晉賢之達而反鄭風之變也已矣因次第聯為巨編而命表元為之序

重游杜曲靈岩詩序

陳德永叔夏

二十有九日是維十月癸卯諸君會文水邱氏北樓上開牖窻眺望正見靈岩杜曲諸峰踴躍奔湊若浮江而來余曰此非吾詩上空洞下蒙密者邪諸君相視而笑各詠其向所為詩以為樂于時坐中客有若盧公載有若姚仲誠有若吳思茂有若趙大中文中思源宗輔元直皆以不獲與前游為歎請更議遊事衆皆許諾又八日辛亥天宇澄穆石路無塵輒相從涉江遵浦北行六

七里至杜曲過宋丞相清獻公故壙憇坐壤垣石上前
游人顧後游人相語或舉首太息或起行榛莽間低回
不能去會公曾孫常卿來相見阮貴常亦來自其家遂
轉而西行陟小坡上列高山儼如端人立絕可愛正北
趨靈岩下岩上有石室空洞容可三四十人洞東偏有
石澗緣山半下隊之石上削如屏泉鋪屏而下餘沫濺
石竅水間鏘然有音前是游此時遇小雨雷鳴輒反今
更持諸君從石室右掖小路曲折斜上行數十百步稍
見平野又西得石田可二十餘畝許側生竹箭無雜樹
蔽虧又北上數十百步至絕頂覺烈風吹人有飄然霞

舉意回瞰南郭下江水宛宛如長蛇行入地中日氣薄
萬瓦閃閃鱗動東北角望見大海如牽一線白衆山皆
伏出地面余歎曰壯哉今日游也諸君無不滿愜者于
是又漸循故路還至石室盡酌所携之酒諸凡後游者
以前所分韻柳河東楚山詩四句下十言為韻再得詩
十篇諸君咸謂余日前詩有翁于二君序今詩子不可
無言余曰古今稱司馬子長文章疏朗有奇氣蓋其得
之名山大川者多果如此言茲游也忘其壯壯驪黃而
布以天機安知非後來盛事乎余不敢辭故書以為續
靈岩後遊詩序

游虎邱山詩序

王蒙叔明

吳郡陸友友仁陸侖明本張雯子昭王蒙叔明共登姑
胥臺視西山出檻下中有奇氣婉婉萃嶽變化靚麗昇
為白雲渺渺動人眉目相與悵望久之遂榜舟抵虎邱
摩挲試劍石類斬瓜截然如劃昔者吳子得純鉤湛盧
豪曹之寶剖浮雲決巨壑揮霍旁午一何雄哉近屬兩
岡坡陀泉木蓊蓊天矯纏鬱怒藤攫搏覆窪井百步徑
始豁為石坂方數畝勢崩下屬南為石湫湫中怪石
離立昂岸如烈士狀北為石壁中為小臺未及登進邱
梵宇下入自東廡右折複道蘇子瞻詩壁石磷璊巧踰

殿陟致爽東眎村墟又東眎城郭北眺山坡有奇松千
株皆蒼鬱莽蓊發幽爽色風駛松顛作波聲魂慄慘若
居海上松外為田疇蒼黃犬齒極水際石西南馳為爽
室率高低就山勢側為劍池晁無咎書石西為石坑在
山上嶄然如方鏡伏檻下瞰色正黑又西為石室降作
即石阪北向還坐石壁下壁拔地數丈峭絕不可攀岩
窅蔽昧仰視白日如飛繩度隙外上有橫樺跨壁為古
木寒淙次陳公樓樓下劍筍口滑稽引水次劍池下臨
積瀦沆養潛池乃神宮獸閤衆爭卧石榻上垂手下掬
滌目漑齒王蒙長歌招隱張子吹赤竹笛為龍虬嘯適

游女艷粧草壁頂其視我輩疑為蛟虬等物蹲蟠穴竇
脩脩然厭世孤咏視彼商羊遊眇變化開合落落不相
著徒聞哀笛激響發越世外耳忽葛可久至明本箕踞
石級對之談禪互相詘遂錯叫嘯生公有知寧不絕倒
已而友仁以溪回松風長為韻時失提鉛槧遂含趣赴
極無所逞云顧盼徘徊乃共歎千載上闔閭以太伯遺
體大作宮室樓觀旌旗舟楫磐礴于此今皆湮滅無聞
且烈烈秦漢為墟以吳方越得失安在哉遂捨去舟回
一二里西入支港復憇金氏墳還棹大溪上轉視山勢
形如巨鼇背負浮圖插霄漢乃思向之所游頃刻如夢

吾黨不自哀乃欲感嘆千古事其不揣甚矣時遊極渥
暖子昭亟飲酒脫巾為迭宕之歌奄忽而醉而卧而酣
忘為小牒托身滄波上吾三人乃亡去囑楫者謾以相
詆張明日笑端既歸而忘其所之王蒙遂述其事而各
寫分韻詩于後云時後至元庚辰二月廿八日也

竹林宴集詩序

劉基
伯溫

基既從左丞公至越而解戎事始得與越士大夫游乃
四月丁巳與嘉興王倫趙郡吳溥會稽王儼王麟華亭
唐虞民曾于黃本之舍主人出酒肴勞客樂甚徙席其
竹林之下主人奉觴酌客而言曰昔司馬氏之臣有飲

于竹林而以賢稱者七人今日之會亦七人其樂同與
彼七人者涵淫以自放袒裸以為達浮誕以為高悖理
傷教以淪天下于口口君子疾之吾當以此為鑒雖然
今日之會文會也必有事以為歡孔子云作者七人矣
或者以魯論所載儀封人晨門荷蕢楚狂接輿長沮桀
溺荷條丈人充之雖不必是而七人者皆士也孔子錄
之本有慕焉盍各引其意以為歌辭以暢余懷不亦可
乎衆應曰諾詞成擊竹而詠之有金玉之聲聽之玲然
飄飄乎有遺世之志泊乎不知其所如也于是比而書
之俾基為之序夫七人東周之隱者也使天下而多隱

者則其為世也可知矣巢父許由其說不經使實有之亦妄人耳烏足以語道傳說呂尚得時而興為隱不卒伯夷叔齊以一身綱紀萬世仲雍自絕以成父志抑下惠直道見黜皆不得已非固欲隱以遠人而忘世也見世之不可為而決息以隱者其惟七人乎儀封人願見孔子其志固異既見而以木鐸喻之可謂善觀聖人而有所感發矣居下位而終不用也悲夫晨門荷簣接輿沮溺丈人之徒能知世之不可而不能識聖人之意故桔而不解宜其是已而非夫子也狂狷之士或可與有為也下車與言則走以避問津則不答度其必反則先

逃之何其矯邪烏乎六子非聖人之倫也磨不磷涅不
溜者天下一人而已六子者豈不自知也哉與其出而
縻于人孰若處而安其心與其進而觚于時孰若退而
全其身隱者之志也我知之矣今予與子之生于斯也
處邪出邪不可得而必也其遇也非有期其合也非有
謀詠歌言懷偶逢其適亦聊以解吾憂也彼放浪沉酒
之流固非吾之所屑而至于遺人羣以自氓則亦豈吾
心之所欲哉至正十四年歲在甲午夏四月括蒼劉基
序

謝氏北墅八詠序

孫作大雅

循城之北舍舟登岸深市塵拂纓冠南望城郭隱如縈帶廓其前為田百畝而抱者九峰山人謝君士英之先墅也門植槐柳竹柏二行逶迤折旋蔭翳蓊鬱蟬嘶鳥鳴不逢一人寂然如行山陰道中而睹脩竹茂林之美者此墅之徑也東為畹畝雜藝花卉紛披蔓行芳香襲人形不可狀名不可數徙倚彌望使人飄飄然有荷鋤入雲遁世忘反之思者藥闌之勝也又東過數十步呀然洞開微波激渚繚以夫容綴以鷗鷺高翔下覽屢去而輒顧者環錦洲之麗也竹樹交雜支徑旁入甚隘而迫忽得寬所彷彿一蓮葉橫於池上時有扣舷而歌若

遺世獨立之士者滄浪之舟也目力未煩足力少怠橫
橋絕波高樹雲聳酒氣氤氲主客推墮醒可以琴醉可
以卧者梧下之石牀也削雲剡王潛德幽光時則酌行
潦之水弔松下之塵誦其文思其人者薦藻之亭也並
墓而西為堂三間仰而望城中之樓觀雉堞如行旅之
冠幘著於垣俯而睹魚泳鳥飛如山林江湖之觸于目
此則山人之廬于親墓而讀書之所至今過客有馳白
雲之遙思歌寒泉之甯沸者清覽之遺意也出而迎客
掃衡門之葉入而呼童煎蒙頂之茶而籠有二鶴攫然
翔於青雲之上悅而集于庭之中者竹裏之異口也寥

聞之間如逃澗谷忽聞有雞犬笑語之聲雜出於茅屋
樹林之外者漁舍之柳村也烟雲之開闔雪月之晦明
泉石草木珠琲的皦四時朝莫無不可觀以故一時勝
士出于吳下者詠之以詩則如摩詰之詩詩中有畫傳
之于畫則如輞川之畫畫如有詩而謝氏八境章章于
士大夫之目矣始山人之先子復齋公以醫遜德嘗以
幅巾杖履樂是而忘歸焉則屬其子曰嘻死即塋我于
是今復齋公墓木拱矣而山人不廢先命日增治之勝
倍於昔予以至正乙未避地吳松竊思目償所謂八境
而未暇也一日山人飲我於滄浪舟上及暮大醉因此

八境之略以遺夫欲睹而未能與其為詩而未解者咸
得以列觀焉又以志余醉態紛紜而其言之甚真也

東園十三詠序

錢惟善

東園華亭陸生隱居也凡內外可以游觀會親友而悅
性情者殆不減蘭亭金谷也然地不盈數畝移石栽樹
鑿石開園各有其所談元講道所當先者則又識其要
領焉故其中堂曰耕學之堂齋曰志壹之齋堂言所志
齋言所養也軒曰水天清意之軒識其所見高潔也軒
之外東行數十步綠溪雜植槐柳就樹陰下橫石為牀
或時坐石上令稚子投竿而漁此釣魚處也有小舟中

置筆牀茶竈酒壺詩卷當月明雪霽時乘興而行鼓滄
浪之曲斯其泛月舟也釣魚處之東南則夫容村也中
堂之後藝瓜果種蔬筍慕漢丈人之後故其畦方也
畦東北有鵑冬月繁花盛開杖策其下以自娛則梅花
鵑也畦之北環以溪溪之上皆種竹竹有徑設石圍基
效唐人之風故自稱竹溪枕溪而高起有閣賓客既退
焚香鼓琴白雲飛來以自怡悅則看雲閣也循東園而
東築小徑至竹之溪架木為橋日送客至橋上見野老
田夫則懽然迎而還故曰候農橋凡內外可吟詠而登
覽者十有三題生之樂于是非徒事乎游觀蓋所見者

遠所志者樂所養者大而適其適耳如是則臨風對月之際尋花問柳之時必有得於吾與點也之氣象豈凡俗人所可企及豈流連光景者可同日語生嘗自號狂狷生不亦宜乎于是諸嘗往來東園者各賦詩以見志可謂和而不流者矣雖蘭亭之勝金谷之美於我何有詩既成什命予叙其端同好事者同觀生名厚字景周

遊石湖記

楊維禎

廬夫

蘇名山水其魁者夫椒震澤其次虎邱劍池靈岩天平石湖楞伽諸山也白樂天守蘇于虎邱一月一游至連五日夜遨遊太湖不以為過以樂天之官守不為文法

窘束而肆志山水之樂如此矧無窘于文法者乎吾黨
之將傳命匹挾乎女伶如容滿蟬態以迹夫樂天氏之
遊者又何過乎至正七年三月三日予既得與吳中張
景雲而下客凡十一人越十有五日又得與吳中顧伯
敏張仲簡西夏高起文張俊德游石湖諸山一月載遊
于樂天迨若過之朝步自鵲橋過百花洲登姑蘇臺余
賦詩臺上曰橫洲草色綠羣腰臺上春泥徑已銷祇有
越來溪上水聲聲猶帶伍胥潮仲簡和云梁燕低飛妬
舞腰春洲寂寂百花銷扁舟不見鷗鷺子空使江城響
怒潮午登舟盤門下主人以暇脯飯客梁揆仲簡出禮

部韻徵聯句而賣謳者來曰周碧蓮氏張錦錦氏笙師
周子奇出十二簧和謳者主曰笙歌麻沸冷生活姑置
遂割烹傳酒令行觴過橫塘至石湖欲抵綠菴石尤風
急甚回舟泊行春橋下換輿登上方五王祠少歇楞伽
寺寺僧晚堂領客觀冽泉登西崦石壇酌酒偕至五王
所晚堂云吳王拜郊臺址也誦唐賢許渾詩且索余詩
余遂和渾詩曰五茸春草野麋來城築金錐亦已摧白
髮老身謾故事五王宮殿是郊臺仲簡和云湖上春雲
挾雨來楞伽山木盡低摧吳王廢冢花如雪猶自吹香
上舞臺少時微雨東來急反舟次主再治酒舟中杯行

無算以各閤果令為多少飲數予于客年最高而飲量最少輒頽然醉去酒散子奇出紙諸客求賦王笙樂府明日余為補玉笙謠一首云云且書遺仲簡同賦是歲丁亥三月十九日辛酉會稽楊維禎述

遊王峰詩序

至正八年春二月十有九日崑山顧君德輝以書來招致余明日抵顧君所又明日命百華舫集賓客自余而次凡六人朝發慧聚寺寺主僧然叟出肅客上神運殿見石甃壁其工夫天然出云此響禪師開山時鬼工所運也遂登王峰峰首昂脊凹狀類馬故俗名馬鞍其印

之石幢然立與雙蘇屠相角者又號文筆峰云東見滄
海晶晶無岸水與天相涵北海樹中見孤嶼隱起蒼蒼
然云此虞山也泰伯之衆所居故名已而大風運石聲
如大波濤衣帽掀舞口然不可立然領客憇翠微閣呼
山丁作茗供觀響師虎化石下山讀孟郊張祜王安石
詩于東壁然作合禮云地由玉峯勝玉峯又由人而勝
自孟張王詩後絕響久矣願吾子有繼焉余諾之西廡
僧應又招憇來青閣盛出佳楮墨求詩余遂書玉峰詩
云大風動落日人立玉峰頭禪將峰虎伏鬼運石羊愁
地平山北顧天斷海東流飈車在何處我欲過瀛洲諸

客各和韻又復聯句用江字窄韻推余首唱客以次分
韻余又疊尾韻成若干句畢顧君錄請序且將錄石壁
左方昔王逸少登烏山顧諸客語曰百年後安知王逸
少與諸卿至此乎吁此羊叔子峴山之口也今吾五六
人俯仰之餘倘無紀述百年後又安知王峯之遊有吾
五六人也遂叙客京兆姚文奐淮海張渥吳郡鄭韶匡
廬于立會稽楊維禎也

二月之廿日樓船下婁江破浪擊長櫓

楊

驚颿簸高杠

海峯搖古色

姚

石樹鳴悲腔躡磴屐齒齒

張

登堂鼓逢

逢地險立孤柱

鄭

天垂開八窻烏升海光浴

于

鳶鵞風

力降番賦夾閨活顧越謠雜吳咤仙樵推髻萃姚胡佛

凹眉厖婆律噴獅鼎楊琉璃照龍缸層軒坐疊浪郊落

筆飛流淙愛此韞石玉豈曰取火缸文脈貫琬玉顧密

韻含瞿缸驅羊欲成石楊種壁得無雙多今文章伯張

萃此禮義邦龍駒誇識陸姚鳳雛亦知龐翠芹掉文舌

顧茜衲折慢幢敏思抽連繭雄心關瓜鏹句神躍冶劍

才捷下水鰲磬聲重寡和鼎力輕羣扛昆渠詩已就誰

謂隴頭瀧楊

桃源雅集圖志

右桃源雅集圖一卷淮海張渥用李龍眠白描體之所

作也桃源主人為昆邱顧德輝氏其人青年好學通文史及音律鐘鼎古器物書名畫品格之辨性尤輕財喜客海內名士未嘗不造桃源所其風采出於流輩者尤為傾倒故至正戊子二月十有九日之會為諸集之冠主客凡十人從者十三人妓奴四人冠鹿皮衣紫綺坐案而探卷者鐵笛道人會稽楊維禎也持鐵笛而侍者翡翠屏也岸香几而雄辨者野航道人楊文舉也沉吟而癡坐搜句于景象外者苕溪漁者郊韶也琴書左右執玉麈從容而色笑者即桃源主人也舒卷而作畫吳門李雲也傍視而指畫者即張渥也席幕北曲肱而枕

石者桃源之仲晉也冠黃冠坐蟠根之上皤然如矮瓠者匡廬山人于立也美衣中束帶而立頤指奴僕治酒事者桃源之子元臣也捧肴核者丁香秀持觴而聽白者小瓊英也一時人品踈通俊朗侍姝執伎皆妍整奔走童隸亦皆馴雅安于矩矱之內觴政流行樂部諧暢碧梧翠竹與青楊爭秀落花芳草與寸情俱飛登口成句落豪成文花月不妖湖山有發是宜斯圖一出為一時名流所慕用也時期而不至者句曲外史張雨永嘉徵君李孝先東海吳克恭毗陵倪瓚天台陳基也夫主客交并文酒賞會代有之矣而稱美于世者僅山陰之

蘭亭洛陽之西園耳金谷龍山而次弗論也然而蘭亭過于清則隘西園過于華則靡清而不隘也華而不靡也若今桃源之集者非歟故余為撰述圖尾使覽者有考焉

游分湖記

至正九年正月十有六日吳江顧君遜既招客遊東林明日復命釣雪舫載聲伎酒具遊分湖客凡七人會稽楊維禎甫里陸宣大梁程翼金陵孫煥青雲王佐吳郡陸恒汝南殷奎妓二人珠簾氏金粟氏也朝出自武陵溪過五子灘二里許北望見鵲巢橋樹顛桃杏與水邊

楊柳緋翠相間長竿旆出緋翠頂主人云是西顧村又
五里所見脩篁喬木蔽虧亭臺于巖洞之上遂解舟維
來秀橋下口問主徑詣亭所亭曰翠岩主人陸君繼善
出肅客憩樂潛文室談樂潛詩有向夕羣動息時聞落
葉聲之句余喜而錄之復引客至嘉樹堂觀先翁手植
百歲棠飲堂上出鐵笛一枝江南後唐物也有刻字云
一枝橫寒玉七點明瑞皇余為作清江引一弄聲勁亮
甚笛闕陸君捩余二弦琴顧君遜亦自起彈十四弦命
金粟氏與孫君煥作十六魔舞飲徹妓蹋歌引客長閑
上度來秀橋至南陸庵班荆坐大樹下珠簾氏用玉蓮

辦令行杯酌主客舟中鼓吹交作兩岸女婦馳逐而觀者如之湖分而半一屬嘉禾一屬姑蘇故名分云舟經龍王廟酌酒龍君借順風果應錦帆一開即抵柳溪過吉祥寺游鮑氏池亭有枯松數千章奇石數十株亭已廢壞翠池及石屋洞尚無恙寺客徐柳邊出陪客談興廢事云池亭前朝鮑節制舊墅也今子孫無噍類惟餘八十老媪不能主乞入寺云登舟出柳溪過登瀛橋十里所北至蘆區為巡官寨寨官李某邀客啜茗徐步過駟通橋月已在青松頂一丈矣遂步月色歸蒼雪所用主人顧君遜武陵溪上花如錦之句分韻賦詩夫水國

之遊衆矣得名者鴟夷子後惟陶水仙儋州禿耳翁鴟夷子先幾去國併陝西家施去智矣而客則未聞禿翁赤壁之樂客有吹洞簫者清矣而妓尚無聞水仙賓客與聲妓俱載客為焦孟之流酒徒耳而觴詠之樂又未聞也觴詠至而聲妓俱又無流連之行今分湖之行是也已其可不有紀述以為後人之慕用乎于是乎書俾刻之蒼雪軒上

游張公洞詩序

至正丙戌立春之明日為人日宿雨早歇草木秀發湖上山如畫余領客駕舟涉大雷澤將訪洞庭諸峰風水

猝作不可舟易與騎行香山尋西施氏藝蘭遺迹遂歷
鳳川晚飯湖汎乘月至張公山宿天申館明日道士姚
致和用藏用邱松澗同登山閱洞洞在張山頂如覆盂
中裂方廣數十丈直下無底谷鉅石閱之曰隅几道士
云昔有長毛仙客從穴入迤邐東南行約二百餘里聞
頂上風雷汹涌及櫓棹乃復得穴出始知是洞庭林屋
山今毛公壇其遺址也洞之石液懸注皆成物象象有
靈官玉女錦屏珠幢藥爐丹竈果老掌迹青螺蹄踪臺
曰香爐峰曰玉節田曰芝田南下小洞曰投龍宋章獻
投金簡玉符獲甘露故云歷前堂轉後窰小罅東漏光

僅容一人前趾後頂牽聯出洞口就石壁題名鐫歲月
復用杜甫句洞口經春長薜蘿分韻賦詩詩成復請余
序余感宋歐陽子之言曰山川登覽得于衣冠仕宦者
不老則病矣非神完氣銳則有不勝其勞者今吾徒六
七人于居閒力足之時江山勝踐惟意是適雖神仙所
居洞天福地亦不得深闔密閤非得歐陽之難而為吾
徒之幸事乎是宜紀詠有述也客為天台葉尚志富春
吳復柯山葉文柯雉城蔣克勤景元儀鳳也余得洞宇
會稽楊維楨叙

遊橫澤記

至正丁亥三月癸卯朔雨甲辰雨乙巳雨歌塗淖不可
馬丙午大晴吳城張景雲買青雀舫蘇臺下約行石湖
道同受約雲邱張仲簡濮陽吳孟思錫山孟季成四明
釋覺元姑蘇張習之夏起元張守中上饒謝君用謝君
舉毗陵張景宜富春吳近仁金華周子奇三山唐明遠
也是日具酒其舟中翌旦舟行出閶門過虹橋歷長蕩
即抵橫澤繫舟水楊岬登顧氏園世傳吳故茂苑也主
人仲仁出御客小酌梅花亭素壁寫丹邱生風篁兩枝
主人徵余題已而移尊錦雲亭木芍藥有半開者曰御
愛黃云復挈酒度橋至壺中林壑亭六出結頂頂製甚

工扁書米元暉主人云是呂保相舊池亭從蜀來者也
登觀石臺憩松巖扁書趙孟頫下穿石室出流觴池揭
石封令水涌行羽觴酌客復西度橋折入浮月橋亭曰
濟月張即之書也主人命作樂侑觴曰南北詩人多留
句于此復徵余作題畢過翠荷亭觀元暉詩蹟入百客
堂手摩天奇石十株念忽感曰適何來何往還從何去
覺元即應聲曰無往無去旁玩杕檜桂柏方竹雜卉及
名盧俊鵲錦雅仙驥之觀未幾主長孟貞來領口別院
酌茗飲移羶酒舟所舟回經虎阜謁吳王光墓再移尊
酌劍池上下山日已暮景雲再治酒舟中命小娃秦聲

行酒令用是日也天朗氣清惠風和暢分十一韻各卷
紙闌韻詩不成者浮大白三明日微雨早作雨止諸客
將再買舟石湖上游靈巖天平余曰興已盡矣景雲曰
酒有餘罌肉有餘豆游可止飲可止乎遂宴景雲家景
宜善作米畫起持筆曰山不必游某請圖靈平山也余
目之曰臥遊景雲復出湘錦卷請寫紀遊一通併侍硯
者曰曹笑春約而不至者三人仲簡孟思季成也

游千山記

華亭地岸海多平原大川其山之聯絡于三泖之陰者
十有三名于海內者九其一曰千山又九之甲也世傳

夫差王冢于將其上故名其形首昂脊弓肩髀礪礪狀
馬又名天馬至正癸卯四月十八日洪生駕黑樓船徼
余出南關汎白龍堆北行過沈涇至皇父林西小溪蛇
行六七里抵山麓命謝公展躡峻磴及半山麻松溪丹
室道士郭常作茗供題詩間更肩輿上絕頂藉盤石踞
坐俯視衆山纍纍如子立膝下佛宮老宇離立于傍瓦
次鱗鱗雜出藂樹間桑邱麥畝連綿錯繡儼如輞川畫
苑也鳥有婆餅焦者時聲于耳冷風鏘然起松雨滴衣
帽使人肌骨慘慄下山生之外氏張景良請移舟旋山
而北若干步斗折三矢地怪石夾挿類剖蚪拔出特起

類跳狼躩豹木皆鸞回鳳翥頂懸碧蘿若縷索下有軒
四程名碧蘿窻掃榻就生窻洞開野香襲人若芝朮良
父梓山公年幾八秩扶藜出肅客已而燕客于軒復出
子女羅拜公躬奉觴為余壽予復觴之曰刼灰一吹閱
十年無地不燼礫公獨在不刼地又時與一輩高人韻
士徜徉水山謂東南之慶人福地非耶于是主客交懽
酒不計量頽然就醉不覺日在牖西是日宿東崦曹氏
元脩精舍明旦莫雲西處士墓放舟山南訪余山衛餓
夫鄭道士不值又沼流經石氏醉癡門解后捉月子李
份徵余飲蠹石軒寄隱生余瑾陪飲賦蠹石詩書于東

窩夜乘月歸凡題某氏某軒某齋舍凡若干所入鐵雅集會稽抱遺叟楊維禎試老陸樂墨書

續蘭亭詩序

劉仁本

東晉山陰蘭亭之會蔚然文物衣冠之盛儀表後世使人景慕不忘也當時在會者瑯邪王友謝安而下凡四十二人臨流觴詠從容文字之娛而王右軍墨迹傳譽無盡豈有異哉蓋寓形寓內即其平居有自然之樂者天理流行人與物共而各得其所也昔魯黜遊孔門胸次直與天地萬物上下同流故其言志以莫春春服既成童冠浴沂舞雩詠歸有聖人氣象仲尼與之垂八百

年而有晉之風流蓋本諸此自是而莫繼焉後唐宋雖
為會于曲江率皆矜麗務為遊觀曾不足以語此者余
有是志久矣適以至正庚子春治師會稽之餘姚州與
山陰隣壤望故迹之邱墟而重為慨歎于是相龍泉之
左麓州署之後山得神禹祕圖之處水出岩罅潄為方
沼疏為流泉卉木藂茂行列紫薇間以篁竹彷彿乎蘭
亭景狀因作雩詠亭以表之維時天氣清淑東風扇和
日景明麗實三月初吉也合甌越來會之士或以官而
居或以兵而戍與夫避地而傷暨遊方之外者若樞密
都事謝理元帥方永鄒陽朱右天台僧白雲以下得四

十二人同脩禊事焉著單袷之衣浮羽觴于曲水或飲或酢或詠或歌徜徉容與咸適性情之正而無舍己爲人之意仍按圖取晉人所詠詩率兩篇若闕一而不足者若兩篇皆不就者第各占其次補之總若干首目曰續蘭亭會殊有得也嗟乎自永和至今上下宇宙間千有八歲遺風絕響而今得與士友俯仰盤桓追陳迹脩墜典講俎豆于干戈之際察鳶魚于天淵之表樂且銜銜夫豈偶然也是雖未能繼志曾點然視昔人則亦庶幾已矣獨未知後之人又能有感于斯否乎會人請記以冠詩端而諸姓名則各因詩以附見如左是日江浙

行省郎中天台劉仁本叙并書江浙行樞密院都事同
郡謝理篆額

郎中劉仁本

都事謝理

鄉貢進士趙倣

天台僧悅白雲

前蕭山主簿朱右

前帥府都事王霖

蕭山教諭朱炯

四明沙門僧阜

前平江儒學正徐昭

祕圖隱者鄭彝

前嘉興路經歷張溥

前兩浙運司知事杜岳

東山僧福報

餘姚學正車權

縉雲教諭楊燧

繁昌教諭宋元僖

防禦元帥方永

翰林應奉李庚孫

前鉛山教授楊瑛

永嘉典史聞人煥

山陰黃本

慈溪主簿黃謙

餘姚景星

四明李復

餘姚張克問

天台僧壽智

丹陽山長劉文彬

餘姚項矩

樞密都事韓諫

靈源僧淨昱

餘姚判官夏韶

餘不賦詩凡十一人

副帥王德華

省宣使楊允

萬戶陳國安

萬戶沈思惠

鎮撫沈德初

建寧教授周溥

無錫教授趙嵩卿

寧州教授鄭大觀

餘姚楊瑀

餘姚鄭桐

童子徐士學

小孤山一柱亭記

虞集

延祐五年集以聖天子之命召吳清幼先生于臨川七月二十八日舟次彭澤明日登小姑山觀其雄特險壯浩然興懷想夫豪傑曠逸名勝之士與凡積幽憤而懷感慨者之登茲山也未有不廓然樂其高明遠大而無

所留滯者矣舊有亭在山半足以納百川于足下覽萬里于一瞬泰然安坐而受之可以終日石級盤旋以上甃結堅縝闡護完固登者忘其險焉蓋故宋江州守臣厲文翁之所築也距今六十三年而守者弗度日就圯廢聚足以涉顛覆是懼至牧羊亭上蕪穢充斥曾不可少徙倚焉是時彭澤邑令咸在亦為赧然愧艱然怒奮然將除而治之問守者則曰非彭澤所治境也乃相與憮然而去明日過安慶府判官李侯維肅集故人也因以告之曰此吾土也吾為子新其亭而更題曰一柱可乎夫所謂一柱者將以卓然獨立無所偏倚而震凌衝

激八面交至終不為之動搖使排天沃日之勢雖極天下之驕悍皆將靡然委順聽令其下而去非茲峰其孰足以當之也邪新亭崢嶸在吾目中矣子當為我記之至池陽求通守周侯南翁為吾書之以來也李侯真定人仕朝廷數十年歷為郎官謂之舊人文雅有高才以直道劉罷自持頗為時輩所忌久之起佐郡人或憤其不足侯不屑也觀其命亭之意亦足以少見其為人矣且一亭之微于郡故非有大損益也到郡未旬日一知其當為即以為已任推而知其當為之大于此者必能有為無疑矣

國子監後圃賞梨花樂府序

至大庚戌之仲春大成殿登歌樂成時雨適至我司業先生樂雅樂之復古顧甘澤之及時于是乎賦喜雨之詩推本歸功于成均之和乃三月辛巳國子監後圃梨花盛開先生率僚吏集林臺之上尊有醴盤有蔬肴載雜陳勸酬交錯飲且半命能琴者作古操一曲禽鳥翔舞雲風低回先生于是歌木蘭之引以寫斯文之至樂而泳聖澤之無窮也明日僚友酌酒而賡之又明日諸生之長酌酒而賡之氣和辭暢洋洋乎盛哉虞集起言曰古之教者必以樂故感其心也深而成其德也易命

大夫者猶與之登高賦詩而觀其能否茲事不聞久矣
今吾師友僚佐乃得以講誦之暇從容詠歌庶幾乎樂
而不淫者亦成均之義也命弟子緝錄為卷以貽諸好
事可覽觀焉謹序

吳張高風圖序

泰定二年春翰林學士臨川先生吳公移疾假寓南城
天寶之宮別館宮中之人因為先生言其教之因起與
今第九代掌教元應張真人之制行堅白也先生曰世
乃有斯人邪乃盡出真人家世鄉里苦節高行孝慈之
迹神明之異求先生為文先生言而天下後世信之未

嘗有不誠之譽也獨于真人欣然命筆具道其所立之
難所至之峻也且有微于時俗者焉他日病愈反手史
館思真人之為人乘輿中車從以門生兒子即天寶而
見焉及門童子辭曰真人深居至靜自中朝貴人大官
至者未嘗敢以告先生勿訝也先生願為從者曰是其
人視走高門懸薄唯恐失一夫者有間矣即命回車蓋
不唯不以為忤而更歎重其不可及自是夏多雨潦規
再往未能也而真人曰秋氣且清吾不可不往謁矣先
生因著芒屨戴臺笠策木杖布褐短寸至膝從弟子一
人服亦如之步至國史院門上馬石上踞坐弟子告閤

人曰真大道張大真人上謁吳學士閤人相顧嘻曰也
日見真人者至容服不若是疑不為通而先生方脩實
錄與同官坐堂上不知也先生之子偶出門見而識之
進問真人何來真人曰吳學士子耶以杖畫地作誠
示之曰還語若翁吾來報謁先生聞之亟出見真人去
矣獨地上字畫在耳咨嗟久之使追及于麗正門南三
里所長歌徐行音韻清暢上出林表追者不敢致辭而
反好事者高二公之風畫為圖以傳觀而托僕叙其事
如此

逍輿山人詩序

陳荏衛

宗遠

浙以東羣山勝絕劖奇歆秀層見疊出相屬而不斷至有以面若眉目為喻者余約居田里未及一往觀之大夫士東遊還者往往出其所詠歌圖畫示余余因得其大都焉天台陶君明元自號逍奧山人謂余曰台之黃巖吾居也十世矣南去四十里所山曰逍奧先生所藏也四世矣又南百里為雁蕩北望天台赤城在有無中而脈絡則自雁蕩袤延而北也計其崇卑廣狹視諸山不啻什一千百竊愛其岡盤麓拱空曲而有所容流水縈紆雲樹陰翳其陽又平行若按可耕可稼由其已小豪強所弗顧子孫得世有而歲者亦孔安焉吾少也春

秋拜掃墓下歲從大父母至焉卒事周行而歷覽濯清
泉翳佳木蓋終日焉休暇復至焉既長也歲從吾大人
至焉二毛也又引諸子而至焉雖行四方未始一日忘
道與草樹嘗若在吾目泉石常若在吾耳而霜露之感
常若在于吾心百歲後又將飾冠巾下從先人于此是
以命為己號而弗疑也客既為之圖當必有為我賦之
者君幸惠叙其事余曰台之山高且大者不可一二計
世傳又或有神仙人居之明元置弗取以所重在此而
不在彼也夫謂樂其所自生而不忘其本者未有過于
明元者也余何敢愛其言而重拂其情也因次明元之

說以復之至正丁亥秋八月攜李陳垚衛宗遠序

紀游

鄭元祐

錢唐湖上舊多行樂處西太乙宮四聖館皆在孤山宋
雖遷僧寺建宮觀于其上而六一泉寺喜鵲寺皆遷北
山亦各擅山水之勝西太乙成後西出斷橋夾蘇公隄
皆植花柳而時時有小亭館可憩息若夫宮之景福之
門迎真之館黃庭之殿結構之巧丹雘之麗真擅蓬萊
道山之勝四聖館雖建于高宗朝其規制相去遠矣余
童兒尚記孤山之陰一山亭在高阜上曰歲寒繚亭皆
古梅亭下臨水曰挹翠閣上下皆拱斗砌成極為宏麗

蓋盧董兩璫以內府錢西太乙宮又能以其餘資建兩閣亦可謂能事楊鍊真伽奪為僧窟今皆一無存荒榛滿目可勝歎哉

錢唐門西出石函橋河西僧三寶者壘石與埽為西番塔舊無有也今四五十年矣塔南即宋放生池舊碑磨去高文虎誤用事所謂夏王道傳商王這鳥獸魚鼈元來是你西去即保叔塔山脚下有大石世傳秦始皇纜船乃喻沙彌勸人脩西方淨業盡又喻彌陀過壩頭行刑日彌陀張大像誦佛號其用心勤矣至鑿纜船石為大佛頭耳竅可坐七人其大可知東臨湖白雲宗寺西

則水月園由山而上則相嚴寺寺西石磴直上則保叔塔也下則多寶寺寺西宋詩人孫花翁墓墓西嘉澤廟祀西湖龍王蘇文忠題和靖處士像結語謂不然配食水仙王一盞寒泉薦秋菊祠西小寺忘其名稍西復陟巘瞿運使廨宇在焉後捨為善住閣其間有山中四時小窻橫幅安樂窩之類其結構皆明敞可喜稍西偏壽星寺寺有寒碧軒蘇文忠公題詩尚在寺稍東陟磴而上為江湖偉觀文忠公所謂一舸鴟夷江海去尚餘君子六千人余嘗與張貞居欲登偉觀則磴道壞不復有其處矣寺西則瑪瑙寺寺南養樂園園中花卉湖石杉

檜尚存臨湖飛樓雄麗賈相養其母夫人車船自其第
茶頃便至園園有悅生堂前亭亭今歸吳中周食省北
出稍西復登巘則玉清宮也宮北戶直上為初陽臺臺
有亭倚亭而望盡得西湖之勝復有屋數間祠葛仙翁
宮西為竹閣寺為六一泉寺為圓明寺寺西則棲霞嶺
嶺下為岳王墳墳南臨湖為褒忠寺寺為其孫毀今遷
寺忠烈廟後岳墳西則沖虛宮宋寧宗老宮人為女冠
所建也宮西為耿家步余先人舊居與宮正相對今屢
易主矣由耿家步而西為東山菴菴有女冠神仙宮火
後僅仿佛耳內附後僧建靜勝寺殊宏壯

九峯春遊記

楊基孟載

至正己亥春基來華亭得劉君用達用和于松江之湄
慰問款候意甚歡二君謂基曰伐木丁丁鳥鳴嚶嚶春
日載陽風暄景融山中之樂雖桃源天台殆莫過之子
能為我遊乎吾將擢小舟期與子偕基欣然就之至鍾
山慎節齋微雨斂霽初旭照樹浮嵐綢緜如蒼烟空青
鳴鳩啼鶯柔和軟滑猶笙簧初調穠華芳蕤深殷淺碧
菰蒲蘭茗披光風而泛晴日高鬟垂螺靚粧丰儀若飄
裾而緩步蕩舟而夷猶危絲促柱宮徵交奏劉君顧謂
基曰人生天地間行樂遊覽殆弗能常山川阻修風雨

晦陰所以放情極懷者有幸有不幸焉吾與子居衆山
之間無風雨以方之川塗以阻之西南諸峰只尺在望
明當與子登絕頂攬奇秀以暢舒沈鬱乃三月十日自
鍾山挈舟西行至千山約故人鍾和伯溫劉敬仲禮郭
衍宗傑暨壽安寺僧壽椿靈谷放船入山北麓折小簡
招錢罷之彥才緣岡迂回過橫雲山以東泊小山隈基
八人舍舟以登攀蘿捫荆幾二百餘步有石巉然出於
山坳拔地矗立高可二十丈嵌岩嶙峋積鐵壁立峭古
苔薜蘿碧膚翠髮深湫下瞰澄泓渟滃衆賓藉草環坐
仲禮援琴鼓鶴舞洞天之調彥才吹洞簫為別鵠之音

幽響振發石裂水涌江風徐來雲影散亂衆賓舉觴命
酌空翠墮地微寒襲人遂攜舟出曲港訪故人史舜民
于山西草堂不值即引船南遊陟昆山絕頂登浮屠望
數百里伯溫蹙聲長嘯山禽驚飛交呼不能休乃據白
石人酌數大觥至玉峯菴僧秋江肅客以入歡若平生
交衆賓坐大檜下命稚子引觴送酒伯溫為雅歌用和
倚而和之時山霏四合陰氛冥飄因叩舷東歸望機山
弔二陸故宅用達辭不能登基七人飲興未已亟還慎
節齋淺醖復酌酬酢無算用和折碧桃人挿一枝就起
舞作小垂衆賓合唱為青天之歌慷慨悲壯音節繁會

少焉靈谷以不勝杯酌先還千山諸賓更飲笑譁比散而日且暮矣周和謂基曰今日之遊其樂不可言願紀其實基語之曰嘗聞之欲不可從樂不可極古人秉燭夜遊亦未嘗不以為戒方今干戈相尋烽火塞塗寡妻孤子顛連而離散者不可數計武將健卒冒矢石被堅厚蚤夜攻擊不休枯骸流膏塗穢原野有無窮之悲吾與子其不念茲乎斯遊之樂吾有所感矣明日吾將適華亭買舟歸省凡同期遊者幸以吾之言告之用和曰然遂次第其事為九峰春遊記

遊機山記

貢師泰 泰甫

環華亭之治皆水四望平疇廣澤紆青繚白而九山逶迤連起東南其最勝者則莫若機山世傳晉陸機讀書其中故以名山勢墮而委風氣完密居人耕種足自給山之東多篋簾之竹其西蒼松翠柏蔚然深秀州人士避地者往往家焉余以失職待罪亦轉山中居孝思菴之西軒軒外入厓窾徑藂茂屈折可至其巔時從野夫樵子憑空眺遠其來雲去鳥下上回翔雖若有以助余心目之寥廓而顧懷姑山漪水松柏不禁則復不勝其悽愴惴慄矣去年此時余方廉問閩南所過富春蘭江爛柯諸山賓客常數十人飲酒賦詩情甚酣暢茲山之

適不減疇昔而聚散憂喜不同豈人情會合固有時耶
久能相從者新安汪仲恭也書而識之庸自觀省亦以
貽仲恭焉

游千山記

余來機山逾月居恒鬱鬱雖率意而行僑日而視其高
深幽曠不暇窮也一日乘小舟緣溪東二里許見連岡
矗矗直走飲溪復昂而拱若神祠佛宇綺繡上下有浮
圖冠其顛者問之千山也山上四望則全吳之勝殆無
遺覽里人周彥英居其麓聞其到遣子從行又東三里
少折而東止宿圓脩寺寺外大竹數萬竿乍入委巷寒

翠落人衣帽凜不可留其後穹堂層軒阻以嵌厓帶以
崇林雜樹蒙密蘿蔓聯綴每風從山下四注叢薄則鱗
羽森動隙光參差鸞鵠舉而蛟龍驤也鳥多鷓鴣鵲鵲
竊脂又有異禽類雅正黑而小終日飛鳴窻戶間若與
人相樂者時余病勢多悸亦為之洒然寺故曹宣慰叔
宣慰入粟萬石得官而家廢子孫因歸之郡人姚氏云

桃花硯脩禊詩序

宋 漁

浦江縣東行二十六里有峰聳然而葱嵬者元麓山也
山之西桃花澗水出焉乃至正丙申三月上巳鄭君彥
貞將脩禊事于澗濱且窮泉石之勝前一夕宿諸賢士

大夫厥明日既出相帥向北行以壺觴隨約二里所始得澗流遂沿澗而入水蝕道幾盡肩不得比先後纍纍如魚貫又三里所夾岸皆桃花山寒花開遲及是始繁旁多髯松入天如青雲忽見鮮艷點濕翠間皦皦欲熱可玩又三十步詭石人立高可十餘尺面正平可坐而簫曰鳳簫臺下有泓泓上石壇廣尋丈可釣聞大雪下時四圍皆瓊樹瑤林益清絕曰釣雪磯西垂蒼壁俯瞰臺磯間女蘿與陵茗輻輳之赤紛綠駭曰翠霞屏又六七步奇石怒出下臨小窪泉冽甚宜飲鶴曰飲鶴川自川導水為蛇行勢前出石壇下鏘鏘作環佩鳴客有

善琴者不樂泉聲之獨清鼓琴與之爭琴聲與泉聲相和絕可聽又五六步水左右屈盤始南逝曰五折泉又四十步從山趾斗折入澗底水匯為潭潭左列石為坐如半月其上危岩墻峙飛泉中瀉遇石角激之泉怒躍起一二尺細沫散潭中點點成暈真若飛雨之驟至仰見青天鏡淨始悟為泉曰飛雨洞洞旁皆山峭石冠其顛遠愛幽邃宜仙人居曰蕊珠岩遙望見之病登陟之勞無往者還至石壇上各敷鞞席夾水而坐呼童拾斷樵取壺中酒溫之實髹觴中觴有舟隨波浮沉雁行下稍前有中斷者有屬聯者方次第取飲時輕颺東來輒

盤旋不進甚至逆流而上若相獻酬狀酒三行年最高
者命列觥翰人皆賦詩二首即有不成罰酒三巨觥衆
欣然如約或閉目潛思或拄頰上視霄漢或與連席者
耳語不休或連筆如風雨且書且歌或按紙伏厓石下
欲寫復止或句有未當搔首蹙額向人或口吻作秋蟲
吟或羣聚蘭坡奪觥爭先或持卷授鄰坐者觀曲肱看
雲而卧皆一一可畫已而詩盡成杯行無算迨罷歸日
已在青松下又明日鄭君以茲游良觀集所賦詩而屬
漁以序漁按韓詩外傳三月上巳桃花水下之時鄭之
舊俗于溱洧兩水之上招魂續魄執蘭草以祓除不祥

今去之二千載雖時異地殊而桃花流水則今猶昔也
其遠裔能合賢士大夫以脩禊事豈或遺風尚有未泯
者哉雖然無以是為也為吾黨者當追浴沂之風舞雩
之詠歎庶幾情與境通樂與道俱而無愧于孔氏之徒
然後無負于七尺之軀矣可不勗哉漁既為序其游歷
之勝而復申以規歲如此他若晉人蘭亭之集多尚清
虛亦無取焉鄭君名鉉彥貞字也

平福堂記

劉會孟

余城居携隱間從二三子步行入深山極樵迹所至無
問幽險規走集乃洞林絕澗之外得平地焉有黃髮丈

人厓居暴日放杖而坐見客驚避茅簷之外就而問焉
子孫滿前問其年九十餘矣自言居僻未嘗見客州邑
城市一無所得至不知盛麗何似問山外大家興替茫
然東西若何指子孫代對惟少年過溪橋外至今以為
戒懼里閭凋謝無可往還近年力衰止門外問何以壽
曰無病故二蔬飯外未省有何藥也予于是喟然謂二
三子曰異哉世間大福德人也南面王樂弗及之矣云

宛溪南游詩序

戴表元

元貞丙申歲之仲秋晦前一日禺中時陪憲使廉侯汎

舟宛溪南游宛溪去山甚遠宣雖山州州人固未嘗有
得見山者而登舟則皆見是日風暄日柔天宇䟽敞麻
姑敬亭之美一一在目舟徐行愈南可二三十里口望
高榆古柳間廬落井井問之旌陽道院也道士遮舟邀
入其藥寮宿人情初脫城郭而得郊村之適意不能無
喜遂宿次早舟人辭以逆流灘高雖用巨艦而口侯本
欲展縱清具不得已虛一舟兼夫併載力牽而上縈紆
百折心寬目緩行坐飲食得與溪山勝處相口溪多文
石時時遇纖奇白潔者取之積如礬山侯有所愛古銅
勺云數百年物侯自挹山泉著勺中以石摩刷不去手

久之文采斑斑然顧之欣笑自得因取勺汲溪注鼎煮茗茗成復以勺飲無美行酒用雙陸左右勝負為律左負則偏酌罰其左右負則偏酌罰其右連勝者亦如其左右偏飲之曰賞雋之酌也由是賓客盡席無不極歡儻從彈琵琶吹笙合舞為侑日下舂舟僅達後潭舍舟徒步行數里至三天洞近洞皆岩屏夾立洞在寺左岩屏中初入豁峙兩扉圖志云隋扶風禪師安禪之地或其時所開鑿既入眈眈如堂隍高可五尺廣可坐二百人上有一大竅正方通天益入又一小竅乃始見三竅又入見二小竅然土人但稱之為三天洞也洞屋聞水

聲鏗鏘然良可人意蓋泉自外入一線縈穿岩石間過洞又為小澗去江南岩石洞往往而有殊未見通伏流有聲如此岩者旁又有風洞但莫知圖志何以云能通禹穴及湘潭也侯預攜小琴名鳳鶻至是坐石彈之音響虛越厓壁欲動諸人震悸不敢淹久而去垂過後潭時小雨即霽至洞幸不沾濕日亦未暝寺僧秉炬燭道然後可入出洞宿寺中山樓寺依山無餘地乘高樓宇累級屈曲蛇行燕蛰雖陟降稍勞而眺覽皆足于時秋深山氣淒厲居之蕭然使之起江湖之思次日復徒步出入至後潭皆舟以順流太駛徘徊停憩尋折山木爪

園留連樹下盡歡劇飲逮夕始還舟露蓬散坐清談浩歌夜絕久猶不忍寐漁燈遠近鷗鷺已宿問同遊嘗溪居者亦不諳此清寂也舟信流抵初宿處與前所虛舟會各以分席即卧遲明睡起身已在宛溪矣九月二日也凡行三日往返百里得詩七首云

志游

王逢

至正庚子十月二日竹林居士董潛邊出吳城西游十餘里舍舟循花鹿白鶴等山度鳳凰峴觀紫牛洞遂登采張監遐觀亭故基斷岡殘壠四顧蔓草五世孫天祐讀書力穡其下忻然接予曰自兵興來學士大夫少有

至此者因題詩壁間由牛圈鵝南行數里得覺林院少
憩既西折百餘步林麓就暝遂止興教寺僧源肅客具
酒饌沾醉乃寢五夜驚聞雨點聲甚繁載聽之蓋鍾振
木葉墜露耳徐起盥櫛源供湯供延坐小軒軒面蒼峭
壁泉玉色瀦壁下僅尋墨許指笑曰是足供千百衆移
時過竹院飯偕眺尤美亭巖崿斗絕捫蘿薦而上仰蓮
花峰殊神秀亂石虎搏人立杉楠楓榆相參錯為丹厓
翠壑天風泠泠迴見鳥背皆使人作凌虛想源云亭右
垂有石扉側開隘迥纔容身中則寬廣時雲上齊若羽
車寶蓋意必靈異所宮又言峰頂俯太湖洞庭光奐滿

面不及登

臯亭行記

自五杭別入支港水縈洄村落若環玦舟中直視居人
房屋室出視空迴田疇從橫際山廿里抵超山勢與臯
亭屬實中斷遠望形格互禁人乃不知舟自斷處行地
愈狹野色如失山近形愈變絕不與向類水松杉篁
篠蔽天乃不復有山惟聞伐木聲人呼聲與空壑中聲
唱和始知山在樹頂山多楊梅地多橘柚蔗芷薯蕷樹
根多翁稚垂釣水支離雜出小石梁丹楯如畫藤蘿罍
罍其上下拂行榜旁有屋數椽翼為東西榮室三重用

茅後松百株皆瘦身長幹前種脩竹數畝密如織徑從竹間不見出入旁舍豁為場水平石級竹樹如無根生水上水旁編竹為籬獨留級取水一人素袍皂幘脩脩然坐竹林上若仰視日者林中羣雞祝祝其一附樹而啼竹繞幽陂中有白荷數本始花上乃有奇木一株葉甚大色政綠素芬幽艷下瞰瀉水花紛落水上如萍周覽久之此心與世若不相累吾安得此山中田一頃若彼屋者一區終今世為臯亭之民乎故詳記之

遊超山龍湫記

余與姑蘓陳惟寅龍華恬靜菴同過北山訪曇華居士

葉克明共游龍湫登山行里許為石磴二百級東折平地至海雲洞岩石翼出秋水瀉其下僅深一尺硿硿崩崩石壁如浪紋疑開闢時洪波蕩滴石浪相抨水漸退則石紋漸成實混沌之迹也天開于子地闢于丑人生于寅數萬年而後有人水者天一所生故獨王耳水殺而後生民日夥洪荒之君相沿又數萬年至堯有洪水蓋四瀆為之灾流委壅障遂至懷山襄陵禹疏鑿決導引其流俾趨之海民始奠居至今四千餘年人受其利者皆神禹之功也南望皋亭諸峰如騎士東趨為黃鸛所勒勢遂回幹北向龍湫如注如謂後騎之未至者墮

其尾此秋黑龍所都嘗見其體橫亘山頂締思其始亦
洪荒之鯀鯀耳積壽而化蛻骨而神虛為雲噴為雨攬
擎翠綃之上甦海內之枯槁鼓舞雷霆于六合之外載
神人物穆乎陰陽之表是則龍之樂也結螭黃壤蟄伏
岩竇沮洳漬乎鱗甲而蜉蝣蟪蛄為之害夫豈龍之樂
哉此海濤山擊之地桑田滄海更相變易人生其中如
飛蠅過牖富貴貧賤奚足較登臨長嘯乃一世之真樂
耳余約惟寅明年花時復同遊此賦詩勒石留名宇宙
間未能否也四人者行吟下山歸圖其狀而記之以寄
姑蘓之好奇者

海上遊記

楊景羲

大車一小車二馬一驢一執鞭策負荷者九人趨而前
導者黃帽曳一挈壺榼從主客後者蒼頭奴一主人騎
領客東出臨青徑踰河梁前行二里許過石碑之原少
選又五里達于馬家橋西出沃野導者告曰是惟廣斥
之濱時潮且盡退車馬及陸無病涉若康莊之平口馳
輪蹄可縱其所之又若蓬萊弱水之清淺可瞬息而達
于丹梯翠壁之間也既至山之麓則休車與馬主人各
遲留延緣回磴盤旋于榛菅中深造高躋得土石之谷
其廣可容數百指而前臨巨浸浪花空翠相與吞吐無

停機風帆出其下一目千里而馮夷擊鼓天吳海若時
或起舞而青天倒影為之兀然立也其最奇者則有沙
磧噴薄之積膠結不可解或如巨石狀青浮藜者黑點
漆班班如纈繡者扣之輒成聲鏗鏗有金石韻醉餘稍
爬梳則疏薄者可俯拾或如三秀之芝或如五色之雲
可置之几席為清淨玩吾方愛而不棄之去又近日晡
向之坦途無沮洳者潮津津欲至矣林鳥亦接翅有歸
者主人速盡罍徹席長嘯而去且與客盟將繼為茲遊
也前峰有老鼠橋橋南有石泓俱未及縱觀則授簡與
客記歲月楊景義實秉載筆時大德癸卯人也

金華北山遊記

吳師道

出金華城西門遙望峭銳孤起蒼翠秀麗者號夫容峯
北山之支也十五里始至其下為智者寺梁靈璫師澤
瓶其下今實名利西偏游覽最勝處亭榭錯峙有曰上
方境界者予所甚愛也蓋自山趾磴道緣磴上至此曠
然平夷有大池可十數畝最後秀巘高出屏抱如畫遊
時且迫暮暝色四合空霏濃翠欲滴坐亭上背出木杪
風水聲在下人語宛轉蒙密間少焉烟斂月出池光淪
漣上下相映發當晝無此景也客高談朗吟響落林谷
逮夜半乃已翌日由智者寺右行取道由三洞陟降岡

麓久乃出兩山間循水行山漸狹水石清峭十數不絕
野人方開逕嶺下便樵採怪藤古木巉崖衝湍皆故道
無有北向所見益奇又數里達金華觀觀流泉橫披圓
青石彌布若鵠卵大者若斗雲磊磊累負離離錯立
楓楠青棕葱蘢幽翳蓋立去洞甚近也三洞者上朝真
中冰壺下雙龍中下二洞皆在觀左下洞者岩口突出
可覆數百人小竇容舟遊者仰卧以入燭之穹然高敞
飛崖流乳列石怪狀為華蓋垂衣涌濤積雪為龍為龜
為狻猊象町者為田方者為牀為鍾鼓可考擊者為研
一眼受滴水以水承之則否他詭異不可悉名決中洞穴

仰天墜石鍵厓罅石欲壓緣險入深如墮壺中飛泉出
岩半數十丈散而為簾下注無底怒聲奔雷使人膽掉
髮豎出宿觀中山雨夜作水聲雜然如啼如嘯歌悲吟
為不寐達旦雨稍止行數里趨朝真重岡複嶺所歷益
高狹徑俯壑萬仞蘿弱苔滑聞前向愈峭乃還遊東西
鹿田二寺鹿田者相傳仙人宋玉女驅鹿以耕山有玉
女墓墓上樹不知名甚奇西寺第一軒前立石森然穿
穴璫瓏類靈壁太湖間以巨竹泉流交其間默成潘公
所憇遺刻多存者東寺留三宿山高驟寒雲霧噴薄門
外迷不見行路室中沉沉咫尺不分人壁題近日吳琳

詩有雲暗雨來疑是晚山深寒在不知春之句似為此
日發相與附火劇譚燒笋引飲而已既晴風日清美野
卉發香山紅澗碧春物爛然林薄鳥鳴嚶嚶摘茶者道
相屬由鹿田五里抵山橋石山挿澗立樹出石上蒼然
同色飛梁絕峽口回頭攢峰懸厓瀑流曲折隱見真絕
徑也久之乃去十里至赤松長松落落彌山率數百歲
物度煉丹山訪二皇君祠問石羊遺迹僅有存者入小
桃源兩厓夾澗奇石剝露緣溪多桃花亭宇相望有流
觴曲水處碧甃底環青莎側被落紅出波上點綴映媚
方列坐小憩數道士攜酒至取觴以浮談辯喧笑恣沾

醉去止寶積觀宿松聲澗響淒然相和如琴笙不絕蓋
晝夜皆然山中所厭聞也明日有懷松楸遂由東關入
城以歸金華為天下名山環亘數百里岩洞泉石之勝
專在山北距余家不再舍而生未之識友人張君子長
約遊屢不果常以為恨至治二年三月子長復遣人邀
余忻然從之起壬申訖戊寅凡七日以兩道險不至朝
真他如安期生石室劉孝標讀書岩暨僧寺可游者以
十數皆不克往然幽絕奇麗之觀所得亦多矣先是約
所至輒賦詩宿金華觀僅一分韻止既歸將追賦焉而
汨沒多故清事復墮渺茫明年余之官高郵秋中行境

內潦災水宿者三月重湖巨陂荒溝斷港瀰漫澆養求
北山卷石塊土不可得而所值士皆鄙陋無一可與語
者况望如子長輩乎坐念昔游彷彿可記者以筆于篇
時一誦之使精神飛越如晤對山水間亦足慰也書其
一以貽子長云歲癸亥十一月十日吳師道識

北山後遊記

至治壬戌之歲予與張君子長遊北山其後無因至焉
年運而往與世益乖山水之嗜益深今年二月六日獨
至靈源草堂訪琳師已出徘徊故處觀公一公止予留
明日同往法清寺觀乳泉又過慈源寺憩水石篁竹間

會而信宿而歸既而子長以書抵予曰黃君晉卿旦夕
來來則約偕至山中予喜甚日候訊至四月丙子會于
草堂琳師出所藏書畫有張公朗清溪圖及宋人墨迹
甚多觀已出坐大池上亭景象清曠即上方境界也丁
丑道前岡之鹿田林徑翳深松石間植有高數尺者西
寺第一軒已燬于火惟岩壁故在登其半以立仰見字
隱隱曰潘紫微者即默成公別一行曰喻子才云二東
寺門徑更新締構有加莫所宿房即向時冥坐雲霧中
者也戊寅早宋仙女墓前一徑可趨朝真予以昔所未
窺奮欲往黃君極言其險絕乃止歷冰壺洞雙龍洞命

未至者入遊憩岩下闕所立碑有云元祐中郡守張公製三洞名按郡志其人名壽者是也旁多鐫石惟趙清獻公最古扣金華觀出循故道還鹿田前趨山橋道旁藥草羅生木異狀多不知名非特仙墓上然也近橋岩弔王端明野書堂故基仰穹厓俯奔澗穿行老樹怪石間幽絕特甚有小徑云由此登岩顛可極目數百里云金華縣亘雖遠絕頂有湖曰徐公湖處正當鹿田之背北為三洞南為橋岩連十數里間雄峭奇麗之觀萃此矣既絕山橋緣澗左行勢漸趨下度五盤嶺稱平夷前出孤銳者夫容峰也下為法喜舊名潛岳潛岳者夫容

別名默成公嘗隨僧飯于寺今髹鉢藏焉直寺門數十步為公墓則榛蕪矣主僧延酌池上夜宿堂宇整潔甚安己卯早登夫容峰嶺未半入貫峰寺竹深磴鳴古屋閨寥登夫容閣殊壯麗王澗師若玠所建者師畫山水甚簡畫必題詩悉有思致既逾嶺下險徑返草堂休焉山行凡四日一公周旋弗置侍而從者黃劉二生也明日庚寅雨遂歸因念至大中與晉卿子長約遊山中弗果後僅與子長來今二十餘年而後踐夙約豈非幸歟第恨其別之遽歷覽之未周而後會之未期也烏乎天下之至樂山水友朋而已使吾二三人者于此營一壑

之樓相與窮年茹山飲泉誦歌謠吟以樂其樂亦無不可者而迫于世故不得以遂雖然今日之樂詎可忘邪故序而記之以附前志之後使覽者亦有以知吾徒之志云爾

右北山記遊詩文一卷金華葉謹翁審言烏傷黃潛晉卿蘭溪吳師道正傳東陽張樞子長釋元一之所作也自至大庚戌距至順癸酉二十有四年間凡屢遊五人者雖不必偕而游必有作妍唱導前清和繼後或緣勝發奇或因事紀實凡登臨之美朋從之樂懷賢悼古之感所以攄一時之興而不泯于異日者

悉于是乎在矣靈源草堂輝禪師及其弟琳公博雅
好文凡吾徒之作前後裒輯無遺者書以示予遂繕
寫成卷而復歸之草堂因念始游時審言年未四十
為最長晉卿次之師道與一公未三十子長未二十
也今壯者老而少之齒已過于昔之長者矣其間濡
墨之異歸出處之殊致佚勞忻戚之不齊可感者何
限幸而相視無恙履屐之力尚強夙好不渝泉石之
樂如故豈偶然哉更二十年未知當復幾游而所得
復幾編僕尚能屢書不一書而已也

婁敬洞記

王蒙

嘗觀留侯傳圮橋進履之事黃石公為神仙鬼物無可疑者余于此併疑留侯之智術實有類于仙鬼非常人之所能為也何以言之當其不受萬金之產為韓報仇求壯士袖鐵椎狙擊始皇帝于博浪沙中夫以秦法之苛暴始皇之猛鷙誅夷禽獮無所不獲留侯獨何術以逃秦之禍哉且商君刻剝多智之士也尸秦之權素矣一旦有罪負笈而逃求民家一宿不可得當是之時秦之號令未出于闕夫以刻剝之商君不能逃秦禍于未盛之日始皇已滅六國一天下海內之民尊秦之帝如天帝畏秦之法若天符懼秦之吏若天吏留侯以多病

之姿挾慙慙之夫負粉骨之罪北不逃于朔東不浮于海獨能逃秦禍于得天下之後向非有鬼隱仙慝之術吾見其參夷勦戮已無遺類又安能嘯傲于齊魯之間卒從高祖破秦報韓也哉此其事章章其可疑者余每欲求其說而不可得近余登泰山頂與劉道士言金液龍虎大還丹之術婁敬洞張德元者頗能知此事遂循泰山西歸行七八十里有山翠律隆起其顛萬石森列村夫導余入其谷中山之左股合于右股形如旋螺中峰如疊三鼓上小下大每鼓高數百尺天尊殿正當石鼓下山椒檜柏與桃李錯生居民百餘家散居林薄中

張德元者年可六十結茅在東崦土園瓦缶瓶儲棗栗
蕭然無一物款余者置酒具飯手出兩卷書畀余觀之
一為混元經一為悟真篇余為畧解數語德元起謝曰
昔在燕日道者為余言餘無人知也余問曰是為婁敬
洞洞固安在曰在左股厓上遂同往觀之洞離地二十
丈乃石壁上一小竅耳藤蘿宵其上不復知有洞德元
曰此中可以避兵故村民聚居于此有葛藟拳跼洞中
鉤而下之兩葛交挽若梯可躡而登洞若厦屋連構十
五里達東厓古人鑿婁敬張子房對坐其中余因恍然
若悟曰我知留侯避秦之說矣婁敬固秦漢間俠客韜

匿林壑留侯為韓報仇時足迹晉衛齊魯之郊凡岩穴
避秦之士固嘗徧見之其狙擊秦也疑先謀于敬機發
而逃則敬為逋主耳不過束身萬仞厓中秦法雖酷孰
從而林捕之是誠留侯鬼隱仙匿之地也高帝入關破
秦有天下留侯乃嘆敬而出之說高皇帝都咸陽帝質
諸留侯對曰婁敬之言是也敬遂一日封君賜姓夫建
都立國天下後世之大計也留侯獨不能為高帝一言
邪特移此策以富貴婁敬而報之耳其挽車販繒皆留
侯之餘術欲使漢廷諸臣不疑耳烏乎非此山不足以
隱婁敬非婁敬不足以匿子房非子房不可以報婁敬

是誠千古之奇迹當時後世人不及知余因偶得于登覽笑談之頃于是睇丹厓之嵯峨仰高峰之繚邈溯往古之窮流發鬼仙之神秘為之感嘆唏噓而紀其遺蹟云

遊山記

貝瓊廷臣

距黃灣二十里山之特起而雄秀者曰鷹窠遊者病其邃而未始一往焉季秋九月萬戶馬侯仲貞脩桓景故事以書招予遂率其季仲新及赤城徐大章錢唐潘仲華金思立循溪而東過葛家嶺彷彿會稽道中獨無竦壁千仞爭雄天姥耳意荒林破冢有古人秘器物文字

可錄者輒引騎而入又東過談家嶺山益奇路益峭棄
乘而徒僕夫前導螳緣而上經無人之境獵者縻絙以
識其出入因得夫徑行犖确石中六七里日亭午至天
禾池池皆石深廣無尋丈春冬不涸歲有禾藥而華華
而實人以為異復舉三百武始至所謂鷹窠者大山巔
然中高旁殺巨海漚其陽秦柱亘其陰怪石虎搏樹皆
合抱山產茶類武夷者有沙門廬其巔因阻而為藩均
而為沼環以蒼筤之竹蓋其幽絕處尤宜雪霽時而海
濱之勝畢効于是矣是日也天高氣清遠見百里之外
沃州之山如青夫容萬朶飛舞而前遂列坐石上引觴

滿酌一笑一談不啻杜少陵之在藍田崔氏莊余恨力
不足以得之為之剪荆棘伐菑翳抗風亭于竹外敞月
榭于泉上以為高人韻士之賞天豈有所待乎酌已復
迂道東出前歌後呼從者趙師善胡琴亟作數曲而林
霏野色蒼蒼莫辨山趾聞流水鳴暗谷中鏘然作佩玦
聲客或俯而飲或濯而下求其派實出鷹窠而梗于亂
石大木故其利不能遠及時大章以溪山勝處良友分
韻賦詩不成者舉以太白遂皆至于醉噫使予忘幽憂
而輕去故土者非茲山也耶歸志其游之始至正二十
年也

遊鍾山記

宋 濂

鍾山一名金陵山漢末秣陵尉蔣子文逐賊死山下吳大帝封曰蔣侯大帝祖諱鍾又更名蔣山實作揚都之鎮諸葛亮所謂鍾山龍蟠即其地歲辛丑二月癸卯予始與劉伯溫夏允中二君遊日在辰出東門過半山口寧寺寺舒王故宅謝公墩隱起其後西對部婁小邱部婁蓋舒王病溫鑿渠通城河處南則陸脩靜茱萸園齊文惠太子博望苑白烟涼草離離蕤蕤使人躊躇不忍去沿道多蒼松或如翠蓋斜偃或蟠身矯首如王虺搏人或捷如猿伸臂掬磔泉飲相傳其地少林木晉宋詔

刺史郡守罷官者裁之遺種至今抵圓悟闕宋勤法師築太平興國寺在焉梁以前山有佛廬七十二今皆廢唯寺為盛近燬于兵外山門僅存自門左北折入廣慈口丈室謁欽上人上人出三人自為賓主適松花正開黃粉糝觸人捉筆聯松花詩詩未就予獨出行函道側會章君三益至遂執手翠微亭登玩珠峯峯獨龍阜也梁開喜道場寶誌大士葬其下永定公主造浮圖五成覆之後人作殿四阿鑄銅貌大士實浮圖浮圖成見五色寶光舊藏大士履神龍初鄭克俊取入長安殿東木末軒舒王所名俯瞰山足如井底出度第一山亭

亭顏米芾書亭左有名僧婁慧約塔塔上石其制若圓
楹中斷為方下刻二鬼擎之方上書曰梁故草堂法師
之墓有螭扁法定為梁人書復折而西入碑亭碑凡數
輩又有張僧繇畫大士相太白贊顏真卿書世號三絕
又東折度小澗澗前下定林院基舒王嘗讀書于此院
廢更剏雪竹亭與李公麟寫舒王像洗研池亦皆廢又
北折至八功德水天監中胡僧曇隱來栖山龍為致此
泉今甃作方池池上有圓通閣閣後即屏風嶺碧石青
林幽邃如畫前乃明慶寺故址陳姚察受菩薩戒之所
又東行至道卿岩道卿葉清臣字也嘗來遊故名有僧

晏坐岩下問之張目視弗應時雉方桴粥聞人聲憂憂
起巖草中從此至靖壇多歲矜先生遺迹復西折過桃
花塢詢道光泉舒王所植松已逝惟泉紺淨沈沈如故
日將夕章君上馬去予還廣慈二君熟睡方覺呼燈起
坐共談古豪傑事厠以險語聽者為改視明日甲辰予
同二君游崇禧院院文皇潛邸時建從西廡下入永春
園園雖小衆卉略具揉柏為麋鹿形柏毛方怒長翠濯
濯可玩二君行倦解衣覆鹿上挂冠鼠梓間據石坐主
僧全師具壺觴予不能酒謝二君出游夏君愕曰山有
虎近有僧采菽逐虎入舍僧門焉虎爪其顙顙有癥可

驗子勿畏往矣予意夏君給我挾兩騶奴登惟秀亭亭
宜望遠惟秀永春皆文皇題榜塗以金又折而東路益
險予更芒屨倚騶奴肩蹠蹠而行息促甚張吻作鋸木
聲倦極思休不問險濕牒牒據頓地視燥平處不數尺
兩足不隨久之又起行有二臺濶數十丈上可坐百人
即宋北郊壇祀四十四神處問蔣陵及步夫人冢無知
者或云在孫陵置至此屢欲返度其出已遠又力行登
慢坡草叢布如氍毹不生雜樹可憇思欲借裊褥卧不去
坡古定林院基望山椒無十五弓不翅千里遠竭力躍
數十步輒止氣定又復躍如是者六七徑至馬大江如

王帶橫圖三山磯白鷺洲皆可辨天闕夫容諸峰出沒
雲際雞籠山下接落星澗澗水漉漉流乎武湖已湮久
三神山皆隨風雨幻去四望久之擊石為浩歌歌已繼
以感慨又久之旁厓尋一人泉泉出小竅中可飲一人
繼以千百弗竭循泉西過黑龍潭潭大如盎有龍當可
屠側有龍鬼廟巨陋由潭上行叢竹翳路左右手開竹
身中行隨過隨合忽腥風逆鼻羣鳥哇哇亂啼憶夏有
虎語心動急趨過似有逐後者又棘針鉤衣足數躓咽
喉焦甚幸至七佛菴菴蕭統講經之地有泉白乳色即
踞泉漸嚙衫袂落水中不暇抹三嚙神明漸復菴後有

太子岩一號昭明書臺方將入岩游菴中僧出肅面有
新癡詢之即向來采舞者心益動遂舍岩問別徑以歸
所謂白蓮池定心石宋熙泉應潮井彈琴石落叉池朱
湖洞天皆不復搜覽還抵永春園見有核滿地一髻童
立花下問二客何在童云遲公不來出壺中酒飲且賦
詩大噓酒盡徑去矣予遂回廣慈二君出迎夏君曰子
顏色有異得無有虎恐乎予笑而不荅劉君曰是矣子
幸不墜虎腹當呼斗酒滌去子驚可也遂同飲飲半酣
劉君澄坐至二更或撼作僂笑釣之出異響畏脇之皆
不動予與夏君方困睫交不可擘乃就寢又明日乙巳

上人出猶未歸欲游草堂寺雨絲絲下意不佳乃還按
地理志江南名山唯衡廬茅蔣蔣山固無聳拔萬丈之
勢其與三山並稱者蓋為望秩之所宗也晉謝尚宋雷
次宗劉勔齊周永朱應吳包孔嗣之梁阮孝緒劉孝標
唐常棣牟並隱于此今求其遺迹烏沒雲散多不知其
處惟見堯兒牧豎跳嘯于淒風殘照間徒足增人悲思
況乎人事往來一日萬變達人大觀又何足深較予幸
與二君得放懷山水窟一刻之樂千金不易也山靈或
有知當使予將盡游江南諸名山雖老死烟霞中有所
不憾他尚何望哉章君約重游未遂因歷紀其事一寄

二君一遺上人云

遊鍾山記

孫作

鍾山出神州為天下勝固以人然佳麗絕特自為東南山水所宗諸峰聯絡控引淮山拱揖來朝如俯如慕如却如顧如偃如駐如企如附如縈帶如會弁如倚几如按劍如樹羽如旌旄節鉞雲委川赴旅實于庭前有水亦自山來繇亘百里不疾不徐蜿蜒飛舞至方山而北隱如環玦以臨崇牖直走大江是為秦淮江適自西南來東折入于海水與山會又如游龍下上出沒江濤悍擊之衝意者天之所以設險其在茲歟余生長下邑少

負奇氣常恨不覩終南太華匡廬鍾阜天台衡岳退而
載筆紀事以資他日卧遊之觀去年余弟大年自京
師官白水寄詩數篇得覽所謂游鍾山望太行觀華峰
之作不覺心動如與大年肩摩袂接著棕屨挾藜杖以
遊其間復自念予髮種種筋力俱憊而猶有是心此固
平生學道未至之一驗也今年夏余偕郡計至京大
年以內艱在因誦曩詩握手笑曰不意鍾山在吾睫矣
自是日期鍾山之遊秋八月初吉天風乍涼積雨新霽
與大年偕同里程君傳可邱君宗岱天台陶君九成出
朝陽門遇士人四明王君漢章會稽趙君用賓兄子趙

某相與循城而北憇松陰俯流水不五里至寺寺有大
樹可坐數十人盤礴久之訪寺主不遇緣徑而上止翠
微亭前禮草堂禪師塔又西上山門登木末亭謁寶公
殿金錫刀尺具在殿後松柏草木悉如坐具彌覆其上
無直指者歷第一山亭北行三四里皆渾石細路樵兒
牧豎不逢一人其滅沒雲霞而上者蓋僧而已兩厓開
闔中有小亭亭有泉清寒滑甘具八功德數人者列飲
其旁莫不充然有得最後迤北抵磴研空洞之陰時日
正卓午咸解衣祛熱先有老僧坐岩石徐引去之雖就
語若無聞焉衆相顧嘖曰是不為世累者如此吾與子

其媿多矣于是引酒賦詩至酣九成作篆體挂名石壁
將陟峰頂詣七佛庵而日已就晡衆醉不能復往于是
悵然有懷屬余文以記之噫余不知世俗之樂世俗不
知余之樂樂之是非雖莫能辨然千百歲下有同余樂
者非斯文其孰徵焉洪武六年歲次癸丑秋八月二日
江陰孫作大雅記

游采石蛾眉亭詩序

余掾姑孰郡文學之九月始讀太平圖經得覽所謂蛾
眉牛渚之絕景與夫騷人墨客之賦詠思欲一至其處
會客有宋公子昭陳君子復白君子南欣然與俱而采

石長官李振文又以扁舟來迂于是四人者循城而西
道姑溪河不一舍至采石時已昧午便攜水府祠下眺
華光閣捫蘿而上俯見灘石磊磊烟冒霧艇鷗翔鷺集
宛如惠崇洞庭小景上觀瀾登蛾眉其勢益高所睹益
遠大江蜿蜒出天門山直走亭下憤如萬馬奔突以臨
堅城迄至矢亡石盡聲摧氣沮不得已而東折然後滔
滔汨汨以就安流蓋韓南澗所謂倚天絕壁直下江千
尺即其地也天門即東西梁山望之隱如脩眉浮空故
亭之名曰蛾眉前有洲亘四十里至蛾眉而東江復為
一彌望浩渺視天門不啻過之是日天微陰潮已落水

自西來激磯石出沒如古槎如崇牙如伏鼉如暴龜其
淺碎舟其深莫測世傳下有水府晉溫嶠于此出其水
怪理或然也觀瀾之下淺灘之中復有響石說者謂水
激石間鏗鏘清越如石鍾然亭自兵燹無復遺址荆榛
草莽蒼烟落日殆難為懷予昭賦詩一首余既次韻復
和南澗霜天曉角詞還飲季振文家明日謁太白墓賦
長句遂臨大江北望和城日亭午諸生章謹以舟次岸
延止娥眉坐客數人皆沾醉賦詩余又為西江月二闕
歌以侑觴須臾返照入江水波湛然微風不興莫色霽
霽衆客始鼓柁而歸按采石自古為要衝為重鎮為河

山之險天下一則商帆賈舶東西萬里貨財川集南北分
則兵戈戰艦倚疊如山而肝腦塗地故其地之興廢率
與天運相離合兵興來二十餘年民居蕩析而後及見
四海一家八荒通道梯山航海至無虛日民始稍稍如
病而起如蟄而蘓雖江山之雄自如其舊然過者猶不
能不茫然而思慘然而悲愴然而興懷也于是集所自
為詩并凡士君子因是而作者合為一通以覽觀焉而
又記其一時所睹之勝序以冠之俾有考于歲月之遷
謝云江陰孫作序

合翠亭記

王城之曲分汴渠有道稍南出金明背歷朱口庶人之
圃入西雖有林亭沼沚皆樸樸沮洳不足以發翛然之
興獨故將軍楊氏之僧居其北岡喬木翳鬱蔽虧雲霄
望之若不可通迹以登也乃于雜花香草中得微徑委
蛇繞岡趾以升遂于岡之顛得高亭在高林翳鬱中無
復見日惟蒼檜樛枝翳委紛披使人忘懷遠想如在邃
谷之岩上左右烟壑濃翠皆合不復知為朝市人也朝
市之人連甍接廛肩摩轂擊求息一木之陰不可得或
有登茲亭者亦復有吾今日之想乎元祐五年四月十
三日與鄧仲常陳至端誠同遊飲酒賦詩于亭上二友

請予名之因為記云

遊治亭記

貝瓊

君子不觀山川之勝無以廣其志宣其文金陵之山川不一而治亭特據會通之地盡有其勝者乎洪武三年春余客金陵思一至其所以求吳孫權之故迹時預編纂元史早夜不得休及史成謁歸雖可游而不暇矣既抵舍親友相過者屢以治亭為問而茫然莫知所對心亦竊悔之六年復徵為國子助教以為必償向之所願而日與諸生講肄安敢舍其所事以遂吾私哉五月朔有一日休沐之暇遂與二三子道出虹橋西過朝天宮

而所謂冶亭者始獲登焉亭在宮中之土山上山有三
 亭由冶亭而東曰鍾英由鍾英北折而西曰飛龍飛龍
 者元文宗出居金陵時所構及嗣位道士陳玉林名亭
 以榮之歲久與鍾英俱毀惟冶亭抗于古木藂篠間亦
 無黝堊丹漆之飾矣是日也夏雨初止四無留雲東望
 鍾山高挿天半而蟠龍之勢蜿蜒蜿蜒欲挾雲而上下
 其西則大江隱隱然白引一絲依山而東江右諸山起
 伏向背者又若青夫容萬朶厯厯可數而北山石皆瑪
 瑙色方旦時與日光霞氣相射蓋亦鍾山之僕介乎近
 有民廬萬區鱗次櫛比及南北二塔屹然對峙金陵之

奇觀畢効于茲矣境與心會久而忘返不知汨沒埃壚
中者知有此樂否也因為之嘆曰昔六朝皆國金陵若
鳳凰臺謝公墩已湮于荒烟野草而冶亭翼然尚存余
幸得一寓目其上不可以無述乃各賦詩一首且志游
之始

仙宮有山如虎蹲石古不洗泥沙痕山頭冶亭久寂寞
日夜雲烟相吐吞我來登山恐無路雨過新綠如雲屯
解衣亭上坐盤礴身同野鶴初離樊攢青疊翠起相向
挿天喜有鍾山尊蟠龍之勢欲飛舞起伏高下何蜿蜒
大江西來赴碧海腥風五月吹江豚東南形勝此第一

擬問六代英雄魂珠簾羽帳俱已燔荒基草合鴟鳥喧
百年死樹剥鱗甲秋聲夜作波濤奔嵯峨更愛北山秀
霞氣曉射扶桑暎周永何處草堂閉往往月落聞驚猿
山窮水盡見平野人家彷彿淮南村莫愁艇子不復繫
桃葉渡口愁黃昏可憐今古竟何事區區王謝猶爭墩
向來海內俱口口聖主匹馬開中原黃旗紫蓋今始
見青春一氣回乾坤重遊京國非少壯耆老如星今幾
存金鞭走馬白門下燕姬坐調諸王孫一時光彩動左
右豈意零落悲蓬根方今幸樂太平日衰朽自荷皇
天恩平生英氣獨未盡賦詩尚敵曹劉垣長干買酒喚

李白江風山月須吾論

遊山詩序

洪武九年歲在丙辰季秋月朔予休暇無事與典簿永嘉裴中國子生陳芳林與直王綬董璿林岳暨予季子羽出甲第坊迤邐北趨四五里地勢隱然而隆岡連嶺屬實萬歲山麓之旁殺者置闕于上所謂東市之咽喉也予嘗往來而未暇出入上下以窮其勝是日也天風颼颼雲氣行空中類方騎而驅乍䟽乍密日光吐而復翳始懼其將雨倏排而去之萬里無滓端倪呈露行者欣然皆喜乃升高而望之連山拱其南長淮亘其北蓋

其地即春秋之徐漢為鍾離隋置濠州逮口上之龍飛
改名鳳陽而都焉其東則獨山屹然一柱孤撐上為司
厯者觀天之所距獨山東十五里為臨淮崇墉峨峨車
馬旁午人之豐樂可想也其西八十里曰荆山與塗山
對峙天外志稱山產美玉卞和以獻楚王今玉坑尚存
荆山之南則為魯山金碧起伏若走海濤而至于皇
陵信神氣所鍾誕生聖人為中國人民主非偶然矣
蓋自開闢距今越千萬年而豪傑起淮泗間如王霸之
輔漢魯肅之相吳固不足方今日之盛而肇大業于東
南也時宮闕未營朝市之位已定四十八衛列營左右

統以大都督府馬牛馬徧野禾黍紛敷偉哉天下之壯
觀矣又行山北二三里許過雙井黃先生先生東甌大
族守官鳳陽者五年聞予至遂延于退休之所地間寂
無市聲少焉設芳醴薦嘉肴衆亦驩然而留更起步爵
劇飲無筭遂至大醉而罷乃循東山歸路尤峻絕怪石
虎距雜樹蔥蒨于是列坐石上者久之惟綬卧不能起
膳奴掖之而行因顧謂諸君曰予自去年春分教中
都生未嘗一日舍所事而出遊或出游輒以風雨止今
幸償其願而天復假予之美景如此覽山川之勝盡客
主之觀使忘鄉土之思不可以無述也蓋以溪山勝處

良友分韻賦詩規重遊于異日興衆曰唯越翌日詩既
成什予為之序且錄寄雙井云

莆陽比事

江蘇古籍出版社



四庫未收書提要

學經室外集卷四

莆陽比事七卷提要

宋李俊甫撰俊甫字幼傑莆田人是編見宋史藝文志成于宋嘉定間取唐以來上下千百年間凡莆陽事之可傳者綺分璧合釐為七卷名曰比事其同邑人陳讜有序林瑑有跋此則從明人林兆珂宋本翻刻影抄莆陽宋人舊志如鄭僑莆陽人物志以及趙彥勵陸炎所著莆陽志今多散失俊甫此編時見採錄且屬辭有法紀事覈真可與汝南先賢傳襄陽耆舊志並傳也

刻莆陽比事錄敘

昔劉子元有言郡書者體其鄉賢美其邦族施本國
頗得流行置他方罕聞愛異是以寧核無華諸如汝
南先賢會稽典錄陳留益部耆舊文獻皆足徵而至
其詳審該博則以常璩劉炳所著爲尤蓋玉卮無當
不得稱寶而稗官野史徃徃在石渠載筆之外第取
其足爲世風者耳吾莆山川韶秀人物瑰琦事蓋具
郡乘中而宋嘉定間有李幼傑先生取唐以來上下

千百年凡莆事可愛可傳者綺分璧合釐爲七卷名
曰比事備矣所謂風謠歌舞各付其俗魁梧長者莫
非其舊美哉當年之盛如指諸掌其以紐之王教本
乎勸戒非工非儷傳信具存豈惟本國自識典刑即
他方亦已重之如鄒魯者乎顧幼傑去今餘四百年
理度後既不及編而且代更勝國朝麻革除所接光
塵而並輝烈者奇傑累累莫可覩縷不佞沐浴所聞
方欲纂輯而苦未逮伏思幼傑之集岌岌危得之煨

燼中擬爲殺青副諸郡乘乃清江周爾修君慧心閱
覽仰止先進業校讎而授剞劂不佞喜其于私心有
合而于風世有資也爰爲之序

萬厯乙巳七月上澣後學林兆珂孟鳴父謹敘

1911. 11. 11. 11. 11. 11. 11. 11.

11

莆陽比事舊序

邑人陳謙

吾莆山川清淑風俗醇美民生其間率多秀異耻事
末作一歸于儒自唐距今厯紀數百如節行揚芳文
學垂範代不乏人進士擢第則有祖孫首榜魁亞聯
名異科有賢良詞學之英一門有公卿岳牧之盛至
於軼材絕藝隱士高禪聞見軼出殆難悉數固炳靈
之助亦漸靡使然也舊誌間多䟽畧由夫主其事者

期於速成操觚之士不暇博訪遂使覽者不無遺憾
今國家貢士李君俊甫幼傑慨然有志斯事上考史
記旁摭紀錄下至諸家文集行實碑碣書尺悉從采
掇詢于耆儒叅之故老積十餘年心目之勤釐爲七
卷幾數萬言彙聚科分聯比而書又爲綱目於前偶
儷成編尤便披閱可謂勤矣書成適國子博士三山
林公來牧吾郡李君以其書獻一見嘆賞命書史就
抄給以筆札不閱月而畢親翰抵僕諉以序謹自念

齒耄學荒理當退避既而喟然謂士未遇時往往編綴古今以爲選舉之圖講學鬻文以爲俯仰之計奚暇採拾鄉閭逸事以爲前輩不朽之傳後來慕用者之勸也哉是書之成若不過博雅君子爲賞鑒但藏巾笥耳今使君仁賢不薄鄉郡樂其風土之美人物之盛爲之主盟將以傳信久遠使後人更相勸勵斯爲忠孝冠冕言行楷式之歸風化美意實在乎是何必書之幸吾郡之逢耶使君以鼎甲師儒宜爲序冠

顧乃謙抑以筆授僕若又固辭恐幼傑用心之勤與
使君樂善之懿終無以表見是題于卷首云

題跋

僕至郡之三月李君幼傑來訪出其書一編閱之莆陽比事綱目也其言纔千有餘其事上下千百年間可法可勸可喜可愕無所不有於是嘉其工歎其勤也命工就錄全帙延訪儒生徃復訂正凡踰年而書始成乃鋟木以傳後吁僕之力僅如是耳如此山川人物方興而未艾高蹈而遠跨者又將月異而歲不同也幼傑勉乎哉僕老矣自是休影衡茅之下萬事

二下開 七三三 品
棄置行樂餘暇時懷此郡好風南來每聞述一佳話
往往得一解顏而笑蓋於此興復不淺

嘉定甲戌四月下澣玉融林琢書于儒雅堂

莆陽比事卷之一

龍坡李俊甫幼傑纂輯

閩分八郡莆有三邑

福建路古閩中郡今分爲八建劍汀邵福興泉漳
考占星土屬斗牛須女之分莆自太平興國四年
始析福之福唐永泰泉之莆田僊遊戶口合游洋
百丈二鎮置太平軍治興化縣尋改興化軍八年
因轉運使楊克讓請移治莆田縣都巡檢解卽異

僧湏槃所指也

湏槃云此地他時有鼓角聲

郡治北枕陳巖南

揖壺公東薄寧海西縈石室木蘭壽溪環流左右

封疆所至東西僅二百一十五里南北僅一百四

十五里山川人物獨甲他郡

九域志本郡志

莆有三邑莆郡初置領縣一曰興化

今縣治即舊軍治

迨

太平興國五年始以莆田仙遊二邑來屬

按國朝會要九

域志清源志皆云四年以初折戶口言之

莆田在郡治之後鄉六里三

十四僊遊在郡之西南七十里鄉四里二十六興

化在郡之西北七十里鄉三里十一鎮二涵頭黃
石寨二迎仙繫蓼外辜嶺寨隸興化永福二界

郡志

壽水東繞壺山南揖

延壽溪在郡北五里自游洋發源經莆田界瀦水
于延壽十里無湍激聲東入于海林艾軒誌林尚
書大禹墓云出北郭五里有水如帶百堵散處隨
意高下風土奇觀乃如此水異時陳公絳以賢良
對策徐公鐸舉進士爲天下第一由渚而東聲名

晉陽府志卷一
早定即吾家子雲也 郡志

壺公山在郡南二十里圭首方銳聳秀千仞衆山
中最巍特山有八面郡治實南向唐郎中潘存實
詩云雙旌牧清源吟看壺山翠莆舊隸清源故也

按九域志昔有隱者遇老人邀至絕頂見宮闕臺

殿似非人間老人云此壺中日月也因得名 山多靈跡

每油雲覆頂則雨至故鄉諺
得壺山戴頂爲將雨之驗

寺觀相望戶口日殷

閩王延鈞崇信竺乾法一歲度僧至二萬餘莆大
姓爭施財產造佛舍為香火院多至五百餘區郡
城光孝水陸永福附郡囊山梯山龜山塘南廣化
華巖謂之南北二寺烏山陳巖石室妙應謂之東
西二巖為郡人游息之所他如僊遊之九座三會
皆號甲刹 道觀始於祥符盛於宣政佛寺或廢
為神霄玉清宮未幾復舊今天慶觀三殿宏麗甲
於八郡元祐間雷擊殿鵠吻墮內得黑木板文曰

後八十年狄覺奴來守此邦重易殿屋主者以聞
郡守狄明遠視之嘆曰吾小字也以年計之吾猶
未生何其驗耶遂捐俸新之

閩王度僧事見資治通鑑
鴟吻事道觀有

碑記

又有紫澤觀

莆田

福神觀

僊遊

三清觀

興化

福建八郡自莆而南主戶寡而客戶多由莆而北
主戶多而客戶寡莆雖軍壘主戶與臨漳等客戶
視長汀多四之一按舊志太平置郡主戶一萬三
千一百七客戶二萬六百二十八元豐九域志主

戶三萬五千一百五十三客戶二萬八十四視太平間為多以口計者不與紹熙重修莆志主戶四萬四千三百七十六口一十萬八百八十七客戶二萬七千九百八十七口七萬八百九十七比之元豐主客戶增至一萬七千一百二十六今主客丁口日益殷阜焉

干戈不動絃歌相聞

莆介泉福之間負山阻海五季亂離所在日尋干

戈莆獨賴以免迨國初留陳二公繼有漳泉咸知
屬心真主航海歲貢不絕是邦息兵按堵二十年
江南平即納土自太平立郡以來間有唱亂脅從
之夫不兵而滅昔湮槃云吾所居之地永不動干
戈信夫

互見國史
及湮槃碑

莆為文物之地舊矣梁陳間已有南湖先生鄭露
書堂

露一名蘧今廣
化寺講堂是也

唐林藻弟蘊肄業其地歐陽

詹自泉山詣焉原其所倡非在常衮入閩之後也

國家涵養日久迄今有三家兩書堂之謗云

以郡志鄭

家譜
參出

烏石官職莆陽朱紫

湮槃云烏石山前官職綿綿山在郡城東北一二

里自唐距今居山之前登科第者無虛歲由是朱

紫蟬聯不絕其著姓則有闕下林

唐貞元孝子攢之後福帥旂之

族前埭林

唐武衛達之後
朝奉嶽之族

北門林

金紫悅之後郎
中冲之通判

族之北門瓦巷林

今侍郎炎之祖
居後寓姑蘇

坊尾林

司業伯
顯之後

澄

坑林

九牧藻之後
侍講瑤之族

湯埔林

九牧著秘
丞徽之後

烏石林

世知縣
世基

之後自連
江移居

東院陳

柳黃陳

上院陳

西院陳

并唐司直嶸之後
仁之族與延壽陳同出

烏石谷目陳

告院師
立之後北

門舖上陳

通判騰
之後

巖前陳

侍制迪
之後

龍井頭陳

通判
荷之

後殿撰
覺民族

古瀨葉

都官賓之後
相正簡公之族

興化何巖葉

學

前葉

朝散曹之後
判居申之族

義門烏石劉

省元夙朔後吏
部侍郎彌正正

字起晦
之族

北門劉

朝奉覺大中洵直之後
今給事留守槩之族

後塘方

湯埔方

烏石方

荔宅方

前坊方

并禮部仁
載員外仁

逸之後諫議慎言郎中慎從
岳陽守擴元祐黨适之後
觀後方正字仁逸著

後壠方

少監仁岳之後

方倉方

司直仁遜之後提

長官廷範子元房

義門上坊方

侍制偕朝奉

龍井

方坑邊方

評事傑之後南恩守漸之族

北門上郭

方

中奉次彭之後少卿銓

巖前方

中奉尉衙東方

司直祈之後本方山方

後埭宋

前埭宋 烏

石宋

新店宋

并唐員外駙之後待制斐提

後埭

李荔宅李

義門上坊李

錢坑李

并唐蔡王尉之後諫

議欣九江守北門濠邊李即中德昭之後北門鋪

上李

唐江王元祥之後東里黃上東黃并唐御史

元公度郡烏石黃知縣頴之後承後塘黃太學博士宣之

族前埭鄭

虞部籍之後今後埭鄭烏石鄭并朝

伯玉之後邵武守事道特少府衙前鄭樞相僑自

書林鄭

編脩樵之後朱倉王湯塘王湯埔王

東里王

并莆田令保隆之後給事晞亮之族寓溝

頭王同出坑頭王

吏部悅書林王常德守北門上

閣郭彥

朝請大夫成之後

義門歐陽

唐清卿之後族

授

後埭翁

唐補

闕乾度之後族有分居湯升書林者

東黃薛

左史元鼎之後自鳳搏移

居東黃張

梅守熊之後自騰高口移居

烏石蕭

郎中倫之故居其子孫寓潮州

湯埔盧

太師熙載今節使雍少卿憲之舊居皆其地也

古識云白湖腰欲斷莆陽朱紫半水遶壺公山此

時大好看

搜神秘覽云壺公山欲斷莆陽朱紫半訖矣

城東南五里有

港曰白湖自熙寧斷水為橋莆之登第始倍於前

自木蘭創陂疏渠引流南遶壺山而族望益多顯

者水亭蔡

忠惠公之後汀守師言之族待僊遊赤制佃尚書沈寶學戲皆寓于浙

湖蔡

楓亭蔡

並忠惠公之族陳宅陳射靖提刑中復之

族

相府陳

丞相正獻後其族多延壽陳唐御史端居白湖及黃石鰲峯之後賢良

絳待制睦侍郎彥文之族與烏石陳同出多寓于浙

歷潯陳

顯謨閣瑞之族水亭潯

山陳

大中大十後

黃石塘南陳

起居舍人起居楚之族市上陳

機宜宣之族漸守裕之後

州西陳

通判啟

郡前陳

武舉將領前若初之居

街陳

運管匪白之後

江上陳

今監丞

水陸永福寺前陳

端通直夢卿之族

務前陳

承議閣

鼓樓陳

朝奉漢

縣前陳

知縣士邱山陳知縣南僊遊留坡陳唐光州都督宏之後

大中驥豐之族今待山潯陳給事中次宏基之後二

制讜移居縣治東覺民龍華陳安撫吉老之後今龜城陳提舉維綱之後

目移侯山陳通直公言之後西埔陳瓊守太和之族水溝

陳建昌守夢烈之族西園陳金紫開前山陳陳庫陳慶

守可大黃沙陳教授珙之族興化瓢湖陳太卿鑄之後與陳宅陳同

出谷目陳誥院師立知縣昭度之後潯陽白鳧陳推官大上溪

陳碧溪陳并唐員外德之後白沙陳三司判官昭度之後石亭林九牧

薦前埭周僉判晞孟之後上廊周朝奉大夫石麟之後榕巷周太學直學

士偉僉後黃周建功郎烜後以上諸學前龔叅政茂良

後市東龔驛前龔忠政及通判龔屯龔昌萬安

守嗣宗朱紫坊方六房少監仁岳著作仁瑞之後

族留橋方殿撰天若比下坊方龍圖邵瀨口方

龍圖運副同白杜方二金紫峻崎少師會之後方

山方五代長史叔達之族城邊東宅後街方提舉翼

後之北門內方晉江令晞道之後軍學東方龍川令

後已上三龍門方主簿綱興化大松鳳冲方三禮

奉次彭之後與山屏方少卿叱石方評事傑百俊

方待制偕之後與驛前黃侍郎艾水南黃國正伯

與侍郎方巷黃提舉國涵頭前黃後黃唐校書

瑤之後直講君俞御史隱侍郎黼黃亭黃提幹景

吳宅黃知縣暄義井黃狀元定之族橫山黃司直

族蛇坑巖嶂黃太祝顏澄渚黃推官瓊族僂遊

新嶺黃提舉顯提點蘇山黃與提舉興化砦

溪黃

太傅中庸之後與黃巷東里黃同出

何巖黃

知縣脩之後錄叅鍾之族

北門

內林

方巷林

金紫悅朝議鑑之後郎中冲之陳秘監震之族居石亭者同出

陳

宅林

韶守宋可之後以上諸林同出

前街林

九牧煜之後龍圖之平之族

西市

林

柳宅林

柴行林

侍郎光朝之族

學前林

牛皮巷

林

九牧蘊光祿積仁之族後今提舉叔度之族

井頭林

朝請嗣光朝散萱通判觀之族

西

州角林

省元廷彥之後

館前林

提幹璘之族自仙遊移居

縣前林

惠守僂之

後與闕下林同出

朱倉林

橫守叢之後

芹坑林

教授偉之後

南門林

教授浩卿之族與芹坑林同出

澄渚林

九牧蘊藻之後

白杜林

尚書大尉之後與澄

渚林教授白湖林教授鄭莊林縣丞江口林教授

同出之族之族長城林司業震東山林司業伯涵頭井邊林提舉

族之之族馬院林都巡高之後與留橋僊遊石

坑林同出碑林九牧藻之後左司正楓亭林岳守宋席麻前

之族之族自澄渚移居道觀洋林提幹雙林林

林廊守豫之後忠義師道觀洋林提幹雙林林

教授彖興化馬洋林九牧蒂之後著作百丈林九牧

之族之族成材之後司業上溪林教授玠涑坑林唐雷州刺史

迪之少卿濟提舉元留橋東鄭監簿畊老

上

塘並司門塘北鄭司法安邦之族延壽鄭運使廷

津之後與前球鄭同出芬後自潯陽新守浩監簿移居市西鄭耕老之族楓嶺鄭僉判升桃源鄭

與楓嶺俱刺雙峰鄭今慶元令僊遊砦橋鄭楓史肇之後

亭鄭鄭宅鄭並唐散騎良士之後興化龜嶺鄭鮑潭鄭

知院僑溪東鄭溪西鄭湘卿厚夾潯陽鄭庭使

之族以上興化諸鄭縣市鄭教授其孝義坊李江唐

並唐散騎積之後留橋李潮守特正朝請數正之

王元祥倉前李留橋李後高守說仲房分居留

橋水陸院前李亞魁宗師之後與郡西李北門

墻兜李

知縣德輝之後
郎中德昭之族

光孝寺前李

與上同出

水亭李

宗教次升之後與後

涵頭李

唐金吾將軍尚芳之後

洋尾李

湖口令

東匯李

唐江王元祥後

東溝李

知縣夏卿錄參貴族

興化西

平李

唐江王房隴西公楚珪之後

涵頭孔

唐蒲田令仲良之後

圭浦游守象

輔之

上阮

下阮

北阮

南恩守中少尹駁臺簿鵬之族

桃巷阮

僉判砥之後與上諸阮同出

延壽徐

唐正字寅之後尚書鐸之族

東隴徐仲

處士復刑部確著作郎師仁後

龍窟徐

東隴同出

北門薛今肅之居興

化鳳搏洋薛

吉上薛

中散利和之後武舉奕梅守珩之族與上黃北門薛

同出寓南劍沙縣朱倉朱宗簿明叔之後水南林

井朱後朱推官廣僊遊黨田朱唐袁州司馬

今寓縣道觀洋朱運使泳之族後街吳大夫寧

真門內吳教授源推義井吳今連江丞錢坑吳

坑壩吳塘濱吳鳳井吳東郊吳正議詳汀

守廷秀之族已魏塘吳義勇侯可塘吳屯田世僊

遊山泌吳武翼興化縣市吳通判僊遊石碑西坑

羅峰傳中書樞龍圖洪提舉汶水南上余下余

朝議祖僊遊上余光祿積之後給小塘王唐兵部

令佐壺山王迎仙王僊遊東門王諸王並出

後朱紫菴翁唐補闕乾慶之後殿丞壻寺丞鑑光

繭翁提刑點漆林翁諫議承涵頭翁朝請大夫巖

嶠待制煜之族江陰僊遊蘇家巷蘇運使欽之

之僊遊上丘真守煥之後謝倉謝水陸院前

謝教授瑩行尾謝金紫之後江口謝知縣任興化

何巖謝縣丞洪魏塘郭紹興旌表孝大礪郭法曹

族之白湖郭已上三郭同興化東郭錄參連仙遊碧

溪郭即中洪之族上林許唐刺史之後僊溪東許員外尚之

族之松嶺上許下許同出員外尚後僊遊許倉巷許都官禎

碧橋許滁守翼之後騰高口張梅守熊之族僊遊西浦張光

處士弼後坑前張屯田之後倉後姚少監宗之族井頭姚知

廷槐蛇坑姚興化縣東姚並少監之族延壽西劉通

孔修之族今僉涵頭上劉特魁景之族衙前戴教授

呂溪戴知縣桂之族東井戴通判緯之後僊遊上堞戴已上

出義井歐陽

四門詹後剛定時族與義門歐陽全出

館前卓

今推官光之族

長壽卓

吏部厚之族白興化移居

白湖顧

學前顧

計院韓國博紀之族

僂遊上洪

司業中族

楓亭洪

朝議範之族

西市彭

前街

彭

祭酒椿年教授奎之族祭酒後寓天台

上詹

下詹

知縣汝申之族

留橋

柯竹浦柯

運幹岳之族

館前柯

今武舉正將夢弼之族

魏塘魏

評事吉甫之後

館前范

容守薰之後

高屯田

邕守涇之族

僂遊東蔣

寺丞俞通判雖之族

北洋康

今知縣夢庚之族

僂遊縣角廖

著作鈞之族

義井宋

陽夏宋

唐員外駢之後與後隸宋同出

延壽潘

五代尚書丞祐

之後內翰慎脩寓于浙

興化灣溪崔

提幹志之族

柴行丁

知縣彥先之後

興化何巖董

八行公偃錄之族

州後留

僊遊赤湖留

留橋留

井頭留

並鄂國公從效之後丞相正提舉洪之族

合烏山而言亦可謂朱紫半矣凡言某之族者官

雖多只舉其一二或名族之後散居于他者不盡

錄餘如韓莊唐杜楊何盧馬高魯章程伊鮑梁諸

姓有登科桂籍者未詳其系姑闕之

前代名賢皇朝進士

閩士鄉時雖能通文書習吏業不肯北宦唐常袞

爲觀察使乃擇鄉秀民勸以仕進林端州公藻始

擢貞元七年第八年有歐陽詹

韓文公云閩人舉進士自歐陽詹始

史因之及觀閩川名士傳前有薛令之林藻以登科驗之信然豈韓文公偶未之詳十年有

許稷文德元年前有陳嶠

蒲志云光啓四年蓋是年改元文德

乾寧元

年有徐寅陳承明年乙卯有黃滔又明年丙辰有

翁承贊天祐二年有翁在堯三年有陳光義翁襲

明四年有陳淑下逮五季方鎮僭亂不復貢士陳

沈乃間關百里遠詣京師梁開平二年與鄭希閔

同第進士他如林蘊林攢潘承祐鄭元弼陳致雍

陳郁前史皆有傳

以新唐書五代登科記十六國誌參出

莆陽登皇朝進士第者自興國八年王世則榜李欣始至嘉定七年袁甫榜正科已八百餘人特科已五百餘人新第者率題名于郡桂籍堂

名亞虎榜魁占龍頭

歐陽詹貞元八年陸贄榜第二人及第與韓愈李

觀李絳崔羣王涯馮宿庾承宣聯名皆天下選時
號龍虎榜國朝以來亞魁方六人嘉祐六年王俊
明榜陳睦紹聖四年何昌言榜方天若崇寧二年
霍端友榜蔡佃政和二年莫儔榜李宗師紹興八
年黃公度榜陳俊卿乾道八年黃定榜黃艾龍虎榜出

唐史餘見登科
記並莆田人

皇朝以進士魁天下者熙寧九年徐鐸紹興八年
黃公度乾道五年鄭僑以諸科魁天下者嘉祐八

年劉景暘以特奏魁天下者宣和三年鄭測紹興
十五年林洵美淳熙十四年方鎬以武舉魁天下
者熙寧九年薛奕特魁紹熙元年陳從龍登科記
桂籍題
名正魁端平二年吳叔告咸淳四年陳文龍特魁
端平二年王聲叔淳祐七年彭彛甫開慶二年林
濟孫

南宮高第壁水上游

試南宮第一者紹興庚辰劉朔

是年經
賦兼行

為第二者

元祐辛未方叔震分路類試爲第一者紹興壬子

林廷芳以賦魁天下者紹興乙卯鄭厚

唱名日得旨鄭厚省

試詩賦第一名候出官日循兩資陞擢

越辛未劉夙

朔之兄

淳熙丁未

林旂紹熙癸丑吳錫疇紹定壬辰葉大有嘉定甲

戌鄭涇甫

大有三名內如方烈陳士楚龔日章王懽吳彬蔡說劉世鉤方大琮尚多未盡

錄爲別試所第一者紹興乙卯宋椿隆興癸未林

處嘉泰壬戌林益嚴以賦魁者嘉定辛未陳思誠

咸淳戊辰方公權

元祐以前未考

國學兩優釋褐元豐八年林自大觀元年陳璘四年陳伯貺郭千之林正建炎二年許搏紹興元年王晞亮他如鄭廷芬陳膏方廷實薛元鼎盧彖朱泳鄭僑黃艾陳士楚顧杞黃裳鄭真卿傅誠林庚蔡師言李茹陳憺方壬陳舜畊林立節王宗烈方灼吳染劉南叔郭子力許宗旦陳作謀徐伯鯉歐陽偉鄭直公

或陞舍選或中上遊或馳聲詞賦其由是登科者未易枚舉

補魁

方天若鄭重薛元鼎李普明方遂同時中魁者黃

節方阜鳴方武子陳大同林汝賢監補魁劉灼改名

克劉燧方鄭以前當詳考之

四異同科七名聯第

紹興戊午大魁黃公度亞魁陳俊卿林鄧以年七十三爲榜尊龔茂良以年十八爲榜幼皆莆人一

時榮耀以爲四異焉

耆舊記聞

紹興壬午鄉書前七名明年並登第劉夙以詞賦魁省闈林枏以經魁居第五劉洵直第七皆前所

未有也

人物志
劉夙傳

三世登雲四代攀桂

鄭伯玉字寶臣擢景祐第其子叔明叔僑孫至道
亨道事道相繼登第皆及見之提舉方孝能有詩
曰壺公簪紱數如沙三世青雲在一家在當時為

創見也繼有同邑李昂子昭文孫常

常寓姑蘇
不預題名

陳膏子居仁孫卓

陳嘉邵子鶴孫雅

林英子

定孫思明

蔡樞子頤孫師言數言

劉朔子起

晦起世孫希仁 僊遊許貞子巽孫堯夫 陳公

言子大卞孫安仁性仁顯仁 陳驥子豐孫謹

興化方次彭子晞道原道安道深道孫綰並三世

登科

桂籍堂題名
氏族類藁

陳絳子動之說之動之子侗睦侗子彥恭皆相繼

擢第或爲詩云自從曾祖初攀桂直至曾孫不歇

枝 興化黃中庸之後徹徹子府府子安石亦四

代登科

鑑明錄桂
籍題名

父子一榜昆季同年

陳與京子國瑞同登紹聖四年第與京終德化令
贈正議大夫國瑞朝請大夫直顯謨閣福建路轉
運使今家有連桂堂

桂籍題名

元豐二年方公袞次臯

安道原道叔姪四人同第郡守謝履賀以詩云一

榜君家桂四枝清朝榮盛似君稀

游洋志

天聖八年陳動之弟說之 慶厯二年吳乘弟秉

六年陳藻弟琪 熙寧六年陳孝純弟中復 九

年徐銳弟鐸 元豐二年方安道弟原道 元符

三年蘓煜弟棫 鄭升之弟敏之 紹興二年林

宋臣弟宋攷

兄宋卿亦登崇寧第

三十年林嶽弟準

隆興

元年鄭揆弟搏 淳熙五年余元一弟崇龜 他

如李昂弟冕 蔡佃弟佃伸 陳驥弟騶駢皆相

繼登科餘見三世登雲鳳穴諸郎闕不盡錄

登科記

皇子喜硯宮嬪遺錢

方慎言字應之咸平三年舉進士赴廷試時皇子

年尚幼因覲慎言所用硯喜之慎言期試畢爲獻
迨暮皇子至慎言以衣袖潔硯跪進之皇子持入
以奏真宗嘉其有禮唱名日皇子立御案旁指慎
言曰多髯者是也已而深蒙東眷時謂慎言結知
于上已基于此

郡志

黃泳字宗永年三歲書一過目輒成誦大觀二年
應童子科徽宗親摘詩如南山之壽以發誦泳應
聲曰不騫不墜上以墜字爲問對曰詩人不識忌

諱臣安敢復道上大悅時尚垂髻以儒冠見有侏
儒傳粉戲于上前脫其冠曰閣梨子乃求官耶泳
即頓首跪謝曰臣何罪而免冠乎且臣實非僧故
以儒服見此曹非男子耶安得為婦人飾上笑而
奇之乃命厯見后嬪爭遺以金錢菓餌越明年賜
五經及第終通判郢州

郡志

翁承檢應童子科

改名襲明擢第同中是科者彭師尹鄭夢麟洪天
賦蘇方子郭懿傳倣翁季孫傳廣陳詔翁陳壽翁

陳巖翁陳槐公劉文瑞

進士甲科諸試優選

翁承贊字文堯擢唐朝乾寧進士第四榜下唱探

花使詩

按秦中歲時記進士杏園初宴謂之探花宴差少俊二人爲探花使遍遊名園以得

名花爲先今翁諫議集有榜下使唱探花使詩云洪崖差遣探花來檢點芳叢引數盃深紫濃香三百朵明朝爲我一時開詳此詩是榜下即預探花使非杏園初宴之日也今俗謂廷試第三人爲探

花郎皇朝甲科鄭褒陳絳翁緯李宗元李昂鄭充林

瑀陳鑄蔡襄鄭璘薛利和陳安國林讓林英方子

容黃降朱紱林端方晞道許敦仁黃玟林震方亞

夫林閱廖鈞陳起宗彭澤宗林虞蔡戡余崇龜劉

槩方芹之

改名泳之

林旂阮砥龔日章黃景淵黃宿林

益嚴張茂發吳彬 兄弟同中者陳說之弟動之

繼中者方慎言弟慎從劉夙弟朔

登科記桂籍題名依他本劉

朔下尚有王邁卓得慶陳堯道許一鶚方應發李夢龍丘猷趙時愿黃鏞方澄孫翁歸等

甲科中教官者崇寧間林孝淵隆興間方崧鄉乾

道間王由魁淳熙間林肅 中大法者治平間李

昭遠紹興間蔡洸 中武藝謀畧科者靖康間葉

顗 武舉絕倫中第者開禧間陳若初 武舉上

舍出身者嘉定間柯夢弼 銓試第一者十餘人

惟崇寧間方昭特賜進士出身以上姑據聞見者

載之餘當考

肅顗仙遊人
餘莆田人

鳳穴諸郎龍門羣情

父與子偕第進士者莆田李欣子宗元宗閔 方

峻子士寧子容方嶠子仲宇輔宋

初名寅

李昂子

昭度昭文 林茂先子程穰植利 林孝澤子榕

枏 黃靜子公度庚 劉洵直子槲棠 張羔子

埜林秀 僊遊陳覺民子磷宋輔 傅楫子諒友

誼夫 傅牧子誠誠餘見三世登雲四代攀桂諸

門者不重出

桂籍
堂記

林英子彥伯為鴻臚寺卿素有風裁擇婿皆名士
後并登第辟雍博士胡份承議郎吳公懋從仕郎
陳惟仲辟雍博士趙資道特科蔡叔庠時人有詩

云九棘冰翁才吐鳳一門玉倩喜登龍

鑑明錄按趙資道撰

吳公懋墓志云懋官終朝請大夫資道以直秘閣知台州鑑明錄所記特據當時所見耳餘未考

再登詞學首擢賢良

翁承贊有詩名唐乾寧三年擢第明年中宏詞鄭

谷贈詩云名高五七字道勝兩重科

十國紀年郡志雲臺編

方叔震興化人元祐六年中乙科紹聖四年中宏

詞

登科記

陳絳字伯華咸平二年登甲科景德四年中賢良

初絳與夏英公竦同試時以二十八將爲題英公
忘其四就絳問焉既而絳擢第一英公第二

青衣告夢紫氣呈祥

劉朔字復之與兄夙賓之齊名時稱二劉紹興乙
卯朔聚徒東巖院一夕夢青衣人攜文卷上題省
元二字果繼其兄魁南省號大小省元

人物志

翁點字沂伯肄業廣化寺夜醉擊寺鐘忽覩一人
狀貌詭異呵曰汝爲誰此豈鳴鐘時也耶點曰汝

謂我為誰其人曰能對吾一聯當語汝乃云折破

磊文三石獨點應聲曰分開出字兩山單

石獨山單皆花

名其人領之曰正郎言訖不見即寺青衣神也後

果擢乾道第終朝請大夫提點江東刑獄

耆舊記

王誥與弟誥寓福平精舍夢青衣童指階前柱云試

問梅福尋真隱聊為東坡訪故居旦書于壁後王

誥擢元符第終福州古田尉誥擢政和第終惠州

歸善令其言始驗

家譜

紹興丁巳秋試揭榜譙樓有紫氣光焰亘天人異
之明年擢第十有六人狀元黃公度亞魁陳俊卿
叅政龔茂良果符前兆

見龔叅政行狀

興化夾漈溪一

夕白氣屬天久而不滅未浹旬夾漈鄭樵以遺逸
召二劉公夙朔之先有虹闔其家升堂繞几蜿蜒

如綬後二公皆以文章名世

詳載游洋志并二劉公墓銘

附見辛卯試歲八月十五日夜有僊遊東鄉後坂
士人陳詠于試案上枕藉而臥夢一廟宇如僊侯

廟然見一青衣神贈一聯云譙樓紫氣行將見策
問元來是識詩占得魁星屬蒲壘來年奪得省元
歸次早陳詠大書黏于簾前柱上觀者如堵有後
生嗔怒何不寫作狀元遂改省元字作狀元然神
言豈妄是時葉大有魁解次年葉大有魁南省其
時陳詠得夢頗自負及第三場策問末果有譙樓
紫氣行將見之語與所夢合不知是符葉大有省
魁不意神之謔人也如此

大魁祖孫雙元文武

徐寅字昭夢登唐乾寧第梁祖受禪再試進士第
一梁祖曰是賦人生幾何者耶三皇五帝不死何
歸此爲何語盍改之寅曰臣寧無官不可改賦遂
拂衣歸閩梁祖怒削其名至皇朝其孫鐸復魁天
下徐著作師仁序其父刑部集曰五代國朝吾宗
廷試擢第一者二人正字寅吾家之伯祖也尚書
鐸吾先君之諸昆也故詠莆陽盛事者有云龍虎

榜頭孫嗣祖鳳凰池上弟聯兄

徐鐸字振甫熙寧九年擢進士第一時同郡薛奕
爲武舉第一神宗賜詩云一方文武魁天下萬里
英雄入彀中莆陽名重天下自是始鐸官至吏部
尚書奕以銀川寨之役沒王事累贈防禦使

郡志人物

繅酬大梁珠叙合浦

徐寅嘗謁朱全忠誤觸諱全忠色變殺其主客時

寅恐不得脫乃作過大梁賦以獻

前志誤作畧曰過太原賦

畧曰

千金漢將感精魄以神交一眼吳兒望英風而膽落全忠大喜令軍士誦之一字酬一縑不復責前事梁王嘗自言夢淮陰侯授以兵法一眼吳兒指

李克用也

東坡志林張齊賢志

林藻字緯乾省試珠還合浦賦賦成假寐若有告者曰何不叙珠去來意寤而脩之曰珠之去兮山無色兮氛氣冥冥海無光兮空水浩浩珠之來兮

川有媚兮祥風習習地有潤兮生物振振果中第

及謝主司杜黃裳曰叙珠去來處若有神助

唐據言閩

川名
士傳

覆試再第聯舉俱魁

黃滔字文江唐乾寧二年崔凝知舉放張貽憲等

二十五人及第惟滔與程晏擅場餘皆濫中人以

爲言昭宗命陸扆覆試放趙觀文以下十五人以

滔等十人所試賦義理精通宜躋異級並再與及

第褚載寄詩云龍泉再淬方知利火浣重燒轉更

新

唐據言唐
登科記

李謚妙齡穎悟以文鳴于時年十七魁鄉舉次舉
再魁鄉薦 後有方亞夫三舉鄉書兩為第一尋
中甲科 葉立功鄉舉聯占首選次舉登第 陳

宗起聯中五薦兩為賦魁擢嘉泰壬戌第

亞夫與
化人立

功仙遊人餘并莆田人又連中四舉者
多矣惟黃顏榮鄭畊老方復後登科第

感激銘硯憤悱投盃

林藻弟蘊唐大厯中李成公錡為福建泉州汀州觀察使始至興學校獨孤及作新學碑有曰比屋為儒俊選如林而藻蘊兄弟猶以縵胡之纓化為青衿之語為憾因銘硯泉石刻志業文未幾藻舉進士蘊擢明經歐陽詹繼之故當時有藻蘊橫行

歐陽獨步之語

閩川名士
傳泉南錄

許稷字君苗莆田人挾策入京時舍人陳諷四門助教歐陽詹校書郎邵楚萇侍御林藻在焉閩中

舉子以故事宴鄉先達詹以稷鄉人邀與之俱酒
行藻戲曰今日之會子何人斯稷投盃憤悻噉酒
而去入終南山肄業三年出就府薦以貞元十八
年擢第歷尚書郎終衡州刺史

閩川名士傳

莆陽比事卷之一終

莆陽比事卷之二

龍坡李俊甫幼傑纂輯

致身揆路列官從橐

葉容僉書樞密院事叅知政事知樞密院事尚書
左僕射兼樞密院使觀文殿學士少師謚正簡

陳俊卿同知樞密院事尚書右僕射兼樞密院使
左僕射觀文殿大學士太師魏國公謚正獻御賜
清忠亮直之碑 龔茂良叅知政事資政殿學士

少保清源郡公謚莊敏

鄭僑同知樞密院事觀

文殿學士太師蔡國公

十朝綱要中興百官題名

附見陳文龍

黃鏞

潘慎修諫議大夫翰林院學士

咸平初考唐制置翰林學士楊徽之

邢晏夏侯僑呂文仲首領是選畢士安潘慎修繼焉八年間纔六人而已陳靖諫議大

夫李欣諫議大夫

李歆刑部侍郎

方慎言

諫議大夫

陳睦中書舍人寶文閣待制

方偕

天章閣待制

蔡襄翰林學士給事中吏禮侍郎

端明殿學士謚忠惠 徐鐸吏部尚書 方會給

事中工部侍郎顯謨閣待制 陳次升諫議大夫

給事中寶文閣待制 朱紱諫議大夫給事中寶

文閣待制 許敦仁工部侍郎御史中丞 陳彥

文兵戶部侍郎顯謨閣直學士 蔡佃徽猷閣待

制 蘇煜禮部侍郎徽猷閣待制 傅楫中書舍

人龍圖閣待制 傅誼夫兵部侍郎 蔡洸吏部

侍郎戶部尚書徽猷閣學士 林大鼐諫議大夫

吏部尚書 宋棐禮部尚書數文閣待制 王晞

亮工部侍郎給事中 林光朝中書舍人工部侍

郎 陳居仁中書舍人文華閣直學士謚文懿

黃艾工部侍郎中書舍人刑部侍郎徽猷閣待制

黃黼刑兵部侍郎 余崇龜中書舍人兵部侍

郎給事中 蔡戡寶謨閣直學士 劉彌正吏部

侍郎

宰執歷侍
從者不載

今侍郎陳讜數文閣待制 給事劉榘寶文閣侍

制

二公姑書
見歷官

附見方大琮葉大有劉克莊陳堯道

方應發

省部寺監館學臺閣

省起居郎林震薛元鼎

起居舍人陳絳陳士楚

薛元鼎

司諫陳絳

正言陳絳方軫林震

檢

正傅洪

左司許懋林之平方邵林正

右司方

養林正林之平林一飛

檢討林一鳴今陳卓

編脩鄭樵彭椿年劉夙林一飛陳士楚今陳卓

剛定陳彥恭林寔陳豐歐陽盼林一鳴

部吏部郎方蘋陳磷卓厚鄭濟林成材朱宗王悅
姚宗之林枏薛元鼎彭椿年陳士楚鄭梟傅誠

司封郎陳士楚方銓 司勳郎林震 考功郎鄭

濟蘓棧黃公度方廷實陳士楚蘇十能 戶部郎

陳彥恭林一鳴薛元鼎 度支郎李德昭薛元鼎

陳守 金部郎林冲之 倉部郎朱宗趙伯達陳

膏 禮部郎陳絳許搏方廷實陳士楚 祠部郎

傅友諒林成材 主客郎林冲之 膳部郎陳沆

陳仁璧傅友諒 兵部郎鄭濟林師悅 職方郎

陳昭素方峻黃從正翁彥升蔡樞方慎從 駕部

郎王尋方昭鄭蒨朱宗 刑部郎徐確徐發陳彥

恭方廷實方銓陳守 都官郎許貞方慎從方嶠

林冲之傅淇葉賓方士寧方蕃 比部郎方蕃方

天任鄭蒨 工部郎陳絳陳守 屯田郎方龜年

郭琪余象劉若虛吳世延李昭用鄭伯喈方任方

峻薛利和葉賓方慎從林一蜚 虞部郎徐昌燧

鄭椿 水部郎蕭綸 六部監門傳誠今蔡開

六部駕閣顧杞黃伯剡蔡闢

寺太常卿林定林茂先 少卿方嶠林震陳膏

丞葉賓鄭濟姚宗之彭椿年陳士楚蘇十能 博

士徐昌燧陳瑞鄭子莊黃中庸林自張式吳廷言

黃宣許貞葉賓方慎從鄭伯喈李昭遠鄭濟姚宗

之許吳今劉棠蘓十能傳誠 大社令方秉哲

宗正少卿方廷實傅琪 丞陳覺民陳開林冲之
徐確陳士楚方銓葉元澣 簿王回薛元鼎陳守
傅誠陳卓 光祿卿陳鑄 衛尉少卿鄭濟陳侗

丞鄭蒨 大理少卿朱宗方銓 正陳彥恭

丞薛倬翁鑑陳甲王回吳志寧陳安國王尋蔣俞
王壽方慎從鄭蒨李昭遠方纂方蔚王晞韓陳芾
司直鄭伯玉薛倬方祁 評事陳彥芳黃長裕
魏吉甫陳航吳師尹 鴻臚卿林英朱宗 司農

卿朱宗 少卿陳膏傅琪 丞朱宗陳守方輔宋

陳顯仁林一鳴葉元澣 簿林一鳴許知新 大

府卿朱宗 少卿陳膏傅琪 丞陳顯仁陳守

簿宋鈞

監殿中丞徐昌圖薛巒方慎言方孝錫翁損陳鑄

鄭蒨 將作監陳守 少監姚宗之 丞陳顯仁

葉元澣 簿方希益鄭伯奇林國輔方祁 軍器

監鄭梟 少監薛元鼎陳士楚 丞方晞韓許知

新陳憺 簿姚宗之方昶鄭寅

館秘書監陳致雍林震 少監方天若方廷實

丞林徽陳悅之陳勳之方慎從鄭伯喈吳世延薛

元鼎 著作郎廖鈞陳淇許頴方天若 秘書郎

唐翁襲朋皇朝陳高許癸 著作佐郎方儀方慎

從鄭伯喈吳世延許貞王侗方仲守陳珙林自徐

師仁劉夙 校書郎唐黃璞皇朝黃肇黃諭翁緯

黃理李昭物方慎從鄭伯玉鄭叔明鄭至道葉傳

許搏方天若黃靜黃隱徐師仁黃公度林枏 正
字唐徐寅皇朝方通方邵林自方天若林宗鄉許
搏黃公度方翥劉夙劉朔林枏劉起誨 史館編
修顧天倪徐師仁方天若 秘書省刪定方畧
館閣校勘黃君俞陳侗林震

國子祭酒彭椿年 司業洪中黃隱林成材陳高
蘇棫林伯顯林震薛元鼎彭椿年 丞方永王悅
薛元鼎蔡闢 博士徐昌圖鄭元興林仲舒陳豐

王履吳世延鄭蒨林成材蘓棧李德昭顧杞蘓十
能傳誠蔡闢 簿鄭畊老陳士楚彭椿年蘓十能

陳懌 正林震黃伯劑 錄蔡樞顧杞姚宗之

太學博士陳開方甸黃宣林閔鄭伯喈林震蔡伸
姚宗之傳誠顧杞蔡闢 正蔡伸林自林處薛元

鼎蔡開 錄林自方秉哲 書庫官方灼 四門

博士唐黃滔 四門助教唐歐陽詹 國子直講

黃君俞 宗子博士方伯鎮余祖奭林利方翼吳

公懋方通朱叔明陳驥林宋卿陳顯仁 諸王宮
教授方侗方公袞劉棠

臺侍御史鄭濟 殿中侍御史唐林藻陳嶠皇朝

黃黼黃隱鄭伯玉方禧卓厚陳膏 監察御史王

回卓厚許禎黃隱林之平陳膏許搏方廷實傅淇

臺法方廷實 臺簿阮鵬

閣右文殿修撰方天若陳覺民 秘閣修撰林震

黃沔 直龍圖黃隱林積仁蔡佃林之平王悅方

邵傳淇 天章侍講林瑀 直寶文鄭梟 直寶

謨方銓 直秘閣許懋蔡櫟林震陳守鄭廷芬林

孝澤陳蒂 直顯謨陳國瑞 直徽猷方廷實陳

起宗林杅宋煜

建炎以前未詳所考曾任
宰執者侍從者歷官不載

林家九牧陳氏五侯

唐林披一作丕字茂則一字茂彥莆田人年十五

自寫六經百家子史千餘卷年二十以明經擢第

爲汀州漕掾郡多山鬼披著無鬼論廉使李承昭

器之奏授本州別駕知州事累官太子詹事贈睦
州刺史子九人曰葦曰藻曰著曰薦曰煜曰蘊曰
蒙曰邁或名莫曰旣俱爲刺史號九牧林家或云

旣爲處士并其父號九牧云今楓林有林氏伯仲

九侯墓

閩中名士傳林氏
續慶國唐史叅出

陳洪進字濟川仙遊人方五季亂離盡有漳泉之
地開寶中沙門行雲謂人曰此去五年後陳氏一
門當有五侯泉人疑洪進所管二州何以容五侯

豈能取汀建以自益耶建興國三年洪進納土改

武寧軍節度使同平章事子文顯房州刺史文頊

登州刺史文顯通州團練使知泉州文顯徐州刺

史知漳州一門五侯終如其言

談苑通鑑長編隆正集清源志子孫

寓福州 仇奉直大夫扁朝請大夫直秘閣守廣信提

點坑冶大雅英州僉判

見樽齋集

名公論薦賢士交遊

文潞公彥博富鄭公弼薦陳侗 蘓文忠公軾蘓

黃門轍薦林豫

王文恭珪陳古靈襄薦黃君俞

孫中丞覺薦黃顥

司馬溫公薦黃中庸

韓魏

公琦薦鄭伯玉

杜沂公衍龐莊敏藉薦方偕

孫中丞覺曾文昭肇薦朱紱

陳學士無擇薦薛

利和

楊龜山時薦林師益

劉康公正夫薦林

冲之

王樞密綸賀樞密允中薦鄭樵

並行狀
人物志

陳侗知陝州蘓東坡劉忠肅並送以詩其弟陳睦

知潭州坡以詩別之

見二
公集

方子容舊與東坡遊坡

集有和方南圭詩及守惠陽坡方謫居常留郡齋
家藏文集古畫多所校正題跋今手跡俱存 吳
世延工詩多與周濂溪倡和 王回與鄒道卿友
善鄒以言事貶平時交友莫敢之願回槩然爲治
裝且慰安其母使者以聞追詣詔獄人爲回懼回
處之晏然獄具削其籍遣還鄉回徒步出國門其
子追及問以家事不答而去見實錄 黃降字從善後
名隱字仲光與山谷厚善有賀降被召及走答從

善同年詩 方公衮與韓忠獻相善韓公嘗語富

文忠曾宣靖曰閩中人材如公衮不可多得公衮

嘗錄韓公言行曰魏公遺事 黃穎學於陳古靈

靈愛其文行置於毗陵經社 傅楫未第時從孫

中丞陳古靈遊陳門人許安世江衍之流皆以文

藝冠多士陳不之許獨稱楫曰傅元通真金石人

也 方元案與程伊川同處潤學義均仲仲後伊

川歸洛書問不絕至以方弟呼之家藏伊川手迹

十餘絺其三絺晦庵刻於白鹿書院 王晞韓與

胡致堂有膠庠之舊後宦遊南北致堂嘗貽書晞

韓曰每追思雪冬槐夏齋亭談會繁臺夜飲一斗

不醉那可復得耶 方耒以從張南軒朱晦庵遊

及耒罷尉善化南軒以序送之

見集中

嗣帥潭辟耒

置之幕下晦庵嘗大書廉勤公恕四字以貽之後

過莆聞耒卒往哭之且賻其墓葬

以上見行狀人物志雲南見錄

游洋志

出鎮閩藩持憲鄉郡

莆之帥本路者自屯田郎中李忻始今帥廳壁記
忻所作也繼有工部郎中陳絳殿中丞陳鑄樞密
院直學士蔡襄右司郎中許懋朝散郎陳覺民權
右文殿修撰蘇煜敷文閣學士陳俊卿再以資政
殿大學士知寶文殿待制陳居仁再以觀文殿大
學士知直徽猷閣林枏顯謨閣學士鄭僑長樂人
聽壁記
提點本路刑獄者陳覺民方廷實覺民兩爲鄉郡

使者凡過郡邑非公事未嘗與僚屬交一談人甚
憚之廷實知民俗利害奏除月輸免行錢和買抑
配及以便宜開常平救泉民之旱飢云

人物志

牧守隣邦倉漕本路

守泉州者陳靖方慎言蔡襄方穀陳覺民蘓煜林
伯顯蔡橐林震林之平林大禹林枏傅淇方銓

泉州

太守壁記襄覺民淇三公守
泉日母俱九十鄉人異之

漕本路者蔡襄陳國瑞陳覺民徐確朱宗方天若

林孝澤子枏提舉本路常平者洪中林郁陳啓期
林師悅黃國鎮方翼方畧陳覺民蔡戡姚宗之他
未詳

列郡帥守諸路監司

帥東京開封府蔡襄 西京河南府方偕阮駿洪
中 南京應天府蔡襄 京東西路襲慶府鄭濟
方劭 京西北路潁昌府陳次升 河北西路真
定府朱紱 秦鳳路鳳翔府李忻李宣 淮東路

楊州府林震陳吉老宋棐 淮西路壽春府朱紱

張式陳彥文 浙西路臨安府蔡襄方偕蔡戡

浙東路紹興府陳靖方會方慎言陳彥恭宋棐

江東路建康府陳靖陳俊卿鄭僑劉桀 江西路

隆興府陳彥文陳俊卿龔茂良蔡戡 湖南路潭

州府陳靖方慎言方慎從陳睦 梓路潼川府翁

彥升 福建路福州府

見出鎮閩藩條

廣東路廣州府陳

睦方會陳覺民龔茂良 廣西路靜江府蔡戡

守京東東路密州薛文 濟南府林成材林震

登州陳鑄 萊州陳方陳次升 京東西路徐州

蔡伸陳次升 東平府方會林震 京西北路河

陽府陳絳 順昌府蘓煜 汝州陳鑄林成材林

震 河北東路冀州林豫 德州李持正 恩州

陳淬 河北西路德信府林豫阮沂 廣信軍林

豫 河東路平陽府林積仁 保德軍林豫 永

興路河中府方會 陝州陳侗 同州李忻 鄜

州林豫 解州李欣 慶州陳彥文 儀州李欣

淮東路亳州鄭濟傳楫 宿州陳淬 楚州李

昭用陳彥文 海州鄭濟 泰州吳公懋 泗州

陳彥恭林震吳公懋黃隱 滁州薛璟許翼 真

州邱奐 通州宋棐蔣雖 連水軍林豫宋邦光

淮西路廬州林震 蘄州林震 和州李德昭

蔡伸 濠州張式薛世清 光州傅誠 無爲軍

方天若 浙西路平江府陳靖陳維德陳芾 鎮

江府林震蔡洸陳居仁蔡戡 湖州陳侗 常州

葉容 嚴州許搏方通宋鈞 江陰軍宋藻蔡戡

蘓十能 浙東路慶元府林成材林枏 衢州鄭

濟王悅劉夙 婺州陳靖 溫州林之平劉夙王

悅傅淇 處州陳淬葉容 江東路寧國府蔡洸

傅淇陳讜 徽州陳居仁蔡戡 池州葉元澣

信州林枏陳守 饒州鄭卓 廣德軍陳次升薛

世清 南康軍林冲之林孝澤蔡誠 江西路贛

州張式黃艾 吉州蔡洸方崧卿 撫州許搏林
宋卿林廷彥陳守 江州李昭遠林師悅徐確陳
彥文余崇龜陳卓 筠州林積仁 興國軍方崧
卿薛儵 南安軍方崧卿黃隱 臨江軍林冲之
建昌軍林師悅陳夢烈 湖南路衡州許稷余秀
實 道州方信孺 永州翁黠 邵州林蘊林豫
黃沃 全州薛安靖 桂陽軍葉元幹 湖北路
鄂州陳居仁鄭梟蔡開 常德府林一鳴王進之

德安府蔡伸陳芾 岳州方櫟林宋卿林叔度

辰州蔡洸 靖州薛世清林叔度 荆門軍黃

黼 成都路眉州陳彥恭 嘉州方慎從 夔州

路達州方慎言 忠州陳恪 恭州林宋卿 利

州路閬州蘓欽 巴州蘓欽 福建路建寧府陳

靖洪中陳覺民陳方陳闡李德昭蘓煜陳俊卿龔

茂良鄭僑陳居仁 泉州見牧守
隣邦條 漳州鄭清方

慎從陳方宋觀陳次升方穀方銓陳顯仁方翼王

晞亮林孝澤陳守 汀州陳淬陳恢陳奎吳師尹

吳瑤蔡師言 南劍州鄭禧方翼方醇道李持正

邵武軍林豫鄭事道林若虛蔡開 廣東路韶

州薛利和阮僑林宗可方信孺 循州陳孝洵宋

煜 潮州方慎從陳鑄方畧方綦薛利和李持正

翁子禮林元宗陳裕之 連州陳惟德阮鵬方補

封州方維蘓洸 肇慶府陳懌陳可大林元忠

翁彥升傅淇 新州陳懌顧天鈞鄭守浩蘓洸葉

元汴方信孺 德慶州吳庭秀王進之余茂實留

洪 南恩州陳懌余祖奭阮中方漸薛利和黃公

度陳豐方盛 梅州方次彭方漸薛珩游輔陳希

輿張熊徐楠 南雄州陳鑄阮之才 英德府阮

中阮鵬葉元汴陳光祖 惠州王尋林俛方子容

陳膏 廣西路密州吳贊范薰 邕州田涇薛世

清陳光祖 象州陳義和游輔陳諒 融州余茂

實 梧州吳世延徐楠陳起 潯州陳端鄭思永

陳諒 貴州傅汶陳謹鄭東 宜州徐楠 賓州

宋煜 橫州林叢林寶儉 高州李悅仲 雷州

陳惟德陳啓期薛利和蘓洸 鬱林州徐楠 廉

州龔嗣昌陳祐之 瓊州方畧陳大和薛元肅

昌化軍黃顯薛景黃球林叔坦葉元澣 吉陽軍

林寶慈 萬安軍龔嗣宗

監司總領淮東蔡洸 淮西蔡戡 湖東蔡戡

轉運京東陳靖林震 京西李忻陳靖林震方崧

卿 河東方寅 陝西李欣 淮東劉彌正 淮

西林震傳誠 兩浙許懋陳國瑞林正 江南陳

靖 江東林杅蔡戡鄭梟 江西林豫林師說鄭

梟林杅龔茂良方銓 湖南陳守劉桀 湖北鄭

梟 成都鄭庭芬 夔路蔡樞傳謙受 利路蘓

欽 福建見倉漕本路 廣東李忻方慎言林豫方畧林

師說林孝澤林光朝林杅蔡戡薛元肅葉元汴

廣西李忻方寅方崧卿 提刑京畿林積仁蘓棫

浙西陳睦傅琪方銓陳芾 浙東林豫宋棐林師

說姚宗之傅琪蔡戡 江東翁點 江西姚宗之

翁點今陳讜 湖南蔡戡鄭濟 湖北今蔡開

夔路翁點 福建見特憲鄉郡條 廣東方慎言陳中復

陳覺民龔茂良方廷實林光朝方崧卿葉元汴

廣西林光朝方信孺葉還 兼轉運提舉京畿林

震 京西方甸林成材河西陳顯仁秦鳳鄭元輿

淮東蘓煜 淮西蘓棫 河南林儔蔡樞 兩浙

方天若 浙東蘓械 成都蘓煜方嘻 廣東陳

中復方監方臨方甸 廣西黃顯 提舉常平京

畿黃靜 京東陳中復林成材 京西林希覺方

寅蔡樞黃靜 河東方會林積仁 淮東鄭濟劉

彌正 淮西蔡樞蘓械方翼 浙西陳睦徐確薛

元鼎 浙東方天若宋藻姚宗之 江東鄭僑陳

士楚 江西林積仁鄭僑傅琪陳守 湖北蔡確

鄭廷芬陳芾 潼州鄭廷芬 福建

見倉漕
本路條

廣

東林枿蔡戡葉元汴 廣西陳中復 提點坑冶

九路陳彥恭王沔趙伯達 提點市舶福建余茂

實許知新陳寔 廣東陳淬林孝澤留洪宋煜葉

元潏陳叔度

建炎以前未詳

兩淮分節聯州秉麾

蘓煜元名從木從亘改賜今名字天寵與弟棫有

聲大學同擢進士第後煜提舉淮東棫提舉淮西

父大中迭過其子時人築花萼樓于兩淮之界

謝克

家撰墓志

傳汶字元魯提舉江西弟淇時爲浙西憲

母夫人年幾九袞兩路更迭迎侍之

行狀

方慎言守泉州弟慎從守漳州有賀以詩曰梓里

塢飛皂蓋棠郊花萼照朱襦又云晉室曾推二

陸榮未如方氏弟兼兄佳辰花縣聯符印

慎言宰蘭溪慎

從繼

此日常郊接旆旌

行狀前詩見鑑明錄後詩見陳悅之文集

陳

諒字友仲侍郎謹兄也諒嘗通判循州侍郎亦通

判于廣後侍郎守貴諒亦守潯潯貴相望纔二驛

子姪更相省聞唯諾之聲相聞二州之人榮之

行狀

繼守翁孫同漕父子

蔡禱字子強擢大觀第曾祖襄嘉祐間以密學士

知泉州宣和間禱以直秘閣繼守泉州禱爲政有

祖風時太母令人劉氏眉壽康寧父金紫傳未老

休官泉距莆纔三舍安輿往來時人榮之

行狀

林孝澤字世傳擢宣和第子杅字子方擢紹興第

父子并漕廣東直秘閣漕本路閩廣人榮之初杅

在廣東陳正獻寄詩云雙闕門高襲慶餘相望再
世擁軺車清名益重先君子遠俗爭看行秘書醫
國十全姑小試蠹民五瘴想先除炎州莫作經年

計狗監傳聞誦子虛

析凡八任
監司帥守

方監子廷實俱

擢進士第監嘗提舉廣東後廷實復爲廣東憲廷
實族子崧卿嘗漕廣西今其子信孺復爲廣西憲
林豫子師說並嘗任廣東江西漕浙東憲

對御講經入館著史

林光朝字謙之登隆興第爲國子祭酒時會孝宗幸太學以禮部侍郎李燾執經命光朝講中庸凡爲天下國家有九經一章玉音嘉獎賜三品服不

旬日除中書舍人

人物志

徐師仁字從信登大觀第尋爲校書郎遷著作郎東觀文集無不經目作表志列傳樂章落筆數千言時修國史極天下之選得四人倪若中劉大中

汪藻而師仁居其一

汪藻撰墓志

大小金紫伯仲從官

方峻擢天聖第官至職方郎弟嶠擢景祐第官至太常少卿後並以子贈金紫光祿大夫鄉人謂之

大小金紫

家傳

李欣字公愉與弟歆俱擢進士第爲諫議大夫歆爲刑部侍郎又有父子祖孫俱至侍從者陳睦子彥文傳楫子誼夫蔡襄孫佃曾孫洸從孫

戡

家傳氏族言行類藁

賦傳渤海詩播契丹

徐寅以能賦爲唐末知名進士渤海高元固來閩中求識寅言本國得斬蛇賦人生幾何賦家家以

金書屏幃云

探花集
人物志

蔡襄字君謨登天聖第爲三司判官時范仲淹貶知饒州余靖上疏論救尹洙請與同貶歐陽修貶書責司諫高若訥皆貶蔡襄作四賢一不肖詩記其事中都人士爭傳寫契丹使至密市以歸後張

中庸使北見幽州館中寫襄詩于壁云

言行錄謂
寫歐陽詩

於壁按此詩乃襄所作歐
陽特貽書耳言行錄悞

十年八座九任五馬

林大鼎字梅卿登紹興第爲臨安教授改諸王宮

教授自是六遷爲吏部尚書十年至八座

家傳

林震字時敷登崇寧第三持使節歷知濟南東平

府廬陽汝泗蘄新潤泉州凡九任五馬

行狀

附見

林豫字順之擢熙寧第歷知保德廣信邵武軍邢

邵鄴冀州凡七任

墓銘

瞽識狀元盜知儒者

徐鐸未第時有瞽者過延壽掬溪水飲曰是地有
出狀元至白杜家塾聞侍郎方會誦書聲曰吾得
狀元矣留宿而反翼日過鐸曰此真狀元昨日者
非後果然

郡志

黃璞字德溫唐大順二年擢第號霧居子自福州
候官移居莆田涵頭今居里尚仍候官曰黃巷巢

兵入閩焚蕩室廬至璞居曰此儒者戒戒令滅炬

家傳

亞聯名相樞同朝

紹興八年黃公度爲進士第一人陳俊卿亞之里

社揭以旗云粉榆未三里魁亞占雙標

耆舊紀聞

乾道三年葉容爲左僕射陳俊卿同知樞密院兼

叅知政事二公對秉鈞樞時人榮之今郡治有兩

台霽色之詞

中興百官題名志

特賜睦帶號爲方瓢

陳睦絳之孫熙寧間爲監察御史天聖以來高麗
職貢稍闕至是連歲修貢中國之使不踰海者幾
百年始命門下侍郎安燾往聘又謀爲介皆畏縮
不行乃命睦睦慨然絕無難色神宗曰卿奉命即
行可嘉除起居舍人特賜仙花金帶使還奏言本
朝故事惟寶文閣直學士以上乃服金帶前以使
事不敢辭今願還所賜特旨令服之後錢勰楊景

畧援例上竟弗許

國史
行狀

方偕字齊古爲三司鹽鐵判官使契丹先是敵宴
使人酒器有剖大瓢之半托以金容三升前後無
能飲者偕使時其主滿酌屬之曰以侑歡也偕一
酌而盡敵大驚喜遺以名馬號其器爲方瓢後宴
中國使必出以寘諸器之右

仁宗實錄東軒
壁錄莆陽雜志

歧公歸朝梅妃入侍

陳洪進代張漢恩爲留守後有泉漳之地乾德元

年間道奉表二年朝命其地置平海軍授洪進泉
州刺史平海軍節度使泉漳觀察處置等使太平
興國二年八月入見崇政殿賜錢千萬銀帛一萬
匹兩三年四月表獻所管二州得十四縣戶十五
萬一千九百七十八隆平集云縣十二戶一十一
萬二十一今從長編兵一萬八千七百二十七尋
加同平章事封岐國公四年舉族歸朝後遷至使
相卒謚忠順先是留從効爲清源節度藝祖受禪

假道奉表稱賀賜勅書獎諭三年加開府儀同三司檢校太師未至而卒明年進封鄂國公謚曰恭累朝以功臣後錄其子孫凡十人今並錯居于郡

多登科者

清源志莆陽志十國紀年十六國志天下大定錄五代史通鑑長編本朝實錄

留氏家牒參出

梅妃姓江氏莆田人九歲能誦二南詩語父仲遜曰我女子期以此爲志父奇之名曰采蘋開元中高力士使閩以選入侍大見寵幸妃能屬文自比

謝女常淡粧雅服姿態明秀性喜梅所居欄檻悉
植之榜曰梅亭梅開賦賞夜分尚顧花下不能去
上戲名曰梅妃有蘭簫梨園梅花鳳笛玻璃杯剪
刀綺憲等賦上嘗與妃閱茶顧諸王戲曰此梅精
吹玉笛作驚鴻舞一一光輝今闕茶又勝我矣妃
應聲曰草木之戲誤勝陛下設使調和四海烹飪
鼎鼐萬乘自有憲度賤妾何能較勝負耶上悅會
楊妃有寵遷於上陽東宮作東樓賦以自寓一日

上在花萼樓命封真珠賜妃妃不受以詩謝曰桂
葉雙眉久不描殘粧和淚污紅綃長門自是無梳
洗何必真珠慰寂寥上得詩悵然令樂府度爲新
聲名曰一斛珠後安祿山犯闕妃死于亂乘輿東
還得其屍于溫泉池側梅樹下葬以妃禮上自製
文誄之後題妃畫像云憶昔嬌妃在紫宸鉛華不
御得天真霜綃雖似當時態爭奈嬌波不顧人今
世圖畫美人把梅者曰梅妃汎言明皇時人即此

也

此傳禁石林得之朱遵度家
乃唐大中二年七月所著云

白衣直講緋袍進士

黃君俞字廷僉少強學著書二百卷名動京師劉
敞得其書謂似兩漢儒者嘗試開封第一同時學
士大夫絕不敢與比肩而君俞乃四黜於禮部內
翰鄭獬中丞滕元發叅知王珪交章論薦新進士
許安世等二百餘人上書闕下乞輟所得恩命命
君俞上乃召試舍人院除國子監直講時方子通

贈以詩云紫書夕降御床邊門下褒衣繞數千捧
檄喜隨親色動授經榮勝主恩偏相如好賦真童
子賈誼多才患少年道在不須憂絳灌一時卿相
盡知賢密學士陳襄復薦於朝曰君俞雖蒙擢用
未盡其能遷文院校書改館閣校勘林尚書撰莆
陽風物賦謂白衣平步入直講是也
神宗實錄黃廷堅墓記
陳沔宣和中以布衣入檢討弟洪亦布衣校正睿
思殿文字淮南招撫使淬其兄也
人物志

薛利和字天益寶元初中甲科時北使適至願觀
唱第詔第一甲皆賜緋莆陽預是科者利和及陳
安國林讓利和還至平床嶺有詩云傍人笑我無
藍袖今日朱衣嶺上歸後以子交貴累贈金紫光

祿大夫

莆陽志
人物志

二紀四相七年三元

乾道二年葉容拜左僕射五年陳俊卿繼之八年
梁克家爲右丞相淳熙十六年留正又繼之葉陳

皆莆田人梁留並居晉江晉江與莆田舊同郡里

人詩云兩州三驛路二紀四台星

本朝元輔表中
典百官題名耆

舊紀
間

乾道五年鄭僑以興化人擢進士第一先三年則

永福蕭國梁後三年則黃定二邑相距只介一山

福人歌之曰相距都墟無百里七年三度狀元來

耆舊紀間
登科記

明經五人學士一門

徐昌晉寅之曾孫太祖朝守國子博士累遷殿中丞與兄昌嗣昌燧等五人皆以明經入仕邦人榮之慶厯間侍講林瑀過其里門題曰桂枝坊蓋取

丹桂五枝芳云

鑑明錄
人物志

黃璞唐崇文館校書郎子仁漑三史擢第仁藻著作郎仁渥太子正字仁滔御史裏行仁渭秘書佐監仁渢亦以武舉狀元顯時父子五人並歷館職

號一門五學士

人物志

蒲陽比事卷之二終

莆陽比事卷之三

龍坡李俊甫幼傑纂輯

御筆賜字詔書不名

蔡襄皇祐五年間摹寫真宗聖製奉神述既成御
筆賜字曰君謨襄進詩謝上詔答云省所進古詩
一首爲御筆賜字君謨者朕嘗日罷朝間燕多以
經史書藝頤神因見唐高宗賜戴郝李崔四臣之
字旨義皆有誨諭卿詞令根于溫厚筆力極于神

妙名以本其所贊字以伸其所輔偶御毫而援翰
俾中璫而特賜良以將厚意表殊寵也敷陳謝懇
發爲詩文重增嘉歎襄勒石序云歷考故事未有
列官侍從而宸毫賜字不緣名品而象服及親獨
臣恩榮前無此例

見賜字碑象服
及冠帔事見後

陳俊卿字應求淳熙九年以少傅致仕十一年十
月上以俊卿生日遣使賜手詔云卿垂車梓里諒
多燕適眷言舊弼渴想良深誕序將臨耆艾可慶

賜卿金器香茶至可領也式彰異數徃績茂齡其
益保頤以昌壽祉故茲親禮宜體至懷題曰付陳
少傅而不名俊卿摹刻于石叙云昔唐代宗之於
郭子儀本朝太宗皇帝之於呂端一以社稷元勲
一以太平名相若時體貌度越彝章顧臣何人敢

當此禮

手詔
刻石

荔陰孫子楊葉弟兄

方慎從字惟之登景德第守嘉州日嘗于公圃手

植荔枝賦詩有留取清陰待子孫之句大觀中曾

孫禧以殿中侍御史持節蜀部巡歷至嘉父老尚

有能誦其詩爲禧賀者

都官墓表
殿院行狀

林藻與弟蘊俱擢唐第名動京師歸經梨嶺題詩

云昨向嶺頭題姓字不穿楊葉不言歸弟兄各折

一枝桂還向嶺頭睽影飛

閩川名
士傳

冲晦先生褒光處士

徐復字復之一字希顏寅三世孫博學尤長于易

康定中元昊復叛詔求有文武才可用者叅政宗
綬以復薦仁宗召見崇政殿訪問世務命講易初
終四卦又問今歲值何卦西兵何如復對歲值小
過而太一守中宮兵宜內不宜外

詳見卦推西夏
條

命以官固辭乃官其子留復登聞鼓樓歲餘求歸
禮以束帛賜號冲晦先生東歸遊杭之萬松嶺因
居焉每與林和靖往來杭人稱二處士翰學沈邁
榜所居曰高士坊太守蒲宗孟題其舊隱云冲晦

先生不屑官布衣謁帝布衣還尚嫌姓字騰人口

惟恐文章落世間大隱不妨居市井高吟何處問

家山平生客意江湖上雲自無心水自閒

龍川志
石林避

暑錄通
鑑長編

張弼字舜元操尚介潔不求聞達嘗謂易學久晦

乃盡去傳註獨誦繫詞二十年一日釋然而悟引

鼓自撾于是著成一家之說紹聖二年尚書省以

其書上詔付秘書省賜號葆光處士三年部使者

以方臨等舉狀奏聞勅授泉州教授告詞云大臣
言爾行義尤深于易學官考所著書發明象數出
于自得從臣部使者繼以爾言宜命以官往職訓
導時弼年六十餘矣

實錄人物志黃穎所作弼傳
黃襲易解序紹聖奏劄語詞

出參

湘鄉門人艾軒弟子

鄭厚字景常一字叔文號湘鄉先生

以官終湘鄉
令故云

舍法行學者宗王氏新義文格卑弱厚推原古意

參以時事雖場屋之文亦有經世之術詞賦典麗
秀傑追琢坡谷閩中士子一經指教皆爲當世聞
人龔公茂良嘗謂吾莆文字以湘鄉爲開山祖既
第之後執經問業不離左右厚嘗考試福州一時
名士如林之奇陳誠之鄭鏐李樛之孟仲叔季皆
在選中人謂三山名士一網打盡表所居曰名賢
坊

耆舊紀聞
游洋志

林光朝號艾軒先生以聖賢踐履之學爲己任窮

經討古浩然自得四方樞衣從學者歲率數百人
乾道淳熙間莆中名士多出其門丞相周益公誌
其墓云始予與劉賓之同年進士暨仕于朝識陳
正獻公賓之博洽剛介正獻道德隆重每論莆中
人物賓之曰艾軒吾師也正獻曰艾軒吾益友也
後見七閩之士人人喜稱艾軒方奏名南宮時朋
友門弟子宦達已多徃徃交賀于朝以其有所抱
負庶因仕以行道也艾軒歿後莆人同請于郡立

祠城南每歲春秋太守率諸生有事祠下一郡之人莫不奔走起敬郡爲榜其居曰師儒坊

陳正獻
撰祠堂

記周益公撰
墓志參出

唐家遺裔孔聖諸孫

李丹唐宗室蔡王尉八代孫以朝議郎祠部郎中爲虢州刺史貶泉州莆田令卒于官州刺史王審珪銘其墓曰崑山玉碎漢水珠沉天喪賢宰號慟民心子孫因家于後埭子崇校書郎朱梁受禪李

氏仕者志易告身崇歎曰吾寧能爲劉國師耶遂

棄官歸曾孫忻與弟歆列仕皇朝俱至侍從歐陽

公修唐史自忻歆諸子而止並列名宗室表令其

裔多登科者

唐書表國朝實錄通鑑長編家傳參出

又江王元祥

之孫襲

游洋志云子誤

則天時寓泉之南安襲孫隴西公

楚珪嘗爲雲麾將軍後又自南安徙居興化縣之

西平遂爲西平李

游洋志謂其先有封西平王者誤按西平東平皆地名唐表別

有西平王郡志又載江王之後有曰翔者尉蒲田

遂因莆田家焉令子孫多錯居于郡

按唐表云翔即纂之四代

也孫

孔仲良宣聖三十八代孫唐以儒林郎守泉州莆

田令因家于涵頭有寶歷二年告身尚存裴度書

押周益公朱晦庵題跋仲良裔孫幼夏嘗修孔傳

纂闕里祖庭記本家雜記猶子孚又今祀郡學香

火

忠惠之家孝友之門

蔡襄故家在郡南五里淳熙三年賜謚忠惠郡爲
表其坊曰忠惠之家王龜齡有過端明故里詩云
懷章南過蔡公鄉駐馬遙瞻數仞墻丹荔株株經
品藻喬松葉葉惠清涼四賢詩出人爭氣三諫章
成國有光真是濟川三昧手清源遊戲作虹梁

謂公

守泉日作
洛陽橋

林攢唐真元間爲福唐尉親死廬墓感白烏甘露
之祥廉使李若初上其事詔賜雙闕以旌其廬時

號闕下林家今所居曰孝友坊貞元旌表林氏里
曰孝義里王龜齡過其居詩云唐室遙遙孝友門
屹然雙闕至今存當時但下思親淚不爲恩波及

子孫

唐史孝友傳闕川名
士傳歐陽詹甘露述

艾軒舊莆志序云太

守鍾離公松偶一日道人物山川且欲按圖而求
之以縣北三里有故家爲林氏出南郭可五里蔡
端明有舊第孰視雙闕者不覺斂容過蔡公之門
或立馬徘徊不忍去以南北通途數里乃得此若

求之井邑聚落所得又益多此圖經所由出也

郭義仲遊太學聞母喪跣足三千里哭輟嘔血家
貧甚及治喪雖故人有饋不肯受聚土爲墳廬其
傍赫日方中甘露霏霏而下郡以聞于朝有旨旌
表其閭淳熙重榜其門曰紹興旌表郭氏義重六
試禮部得官再調德慶錄叅卒父軒記其事曰一
夫以孝聞天子爲之改容且至大書其門以褒勸
旌異之莆之東北隅惟林氏爲故家雙闕今無恙

南北衝

衝道

由是出必立馬停輶而後去三百年來

有郭君孝子視昔人無媿色云

郡志並家傳祭出

附見

黃大器興化人事親孝芝產于廬者三鄭夾滌爲

文記之

游洋志

黃琮喪母哀毀不食甘露降于總

帷三日

人物志

黃提舉國鎮之子希閔廬父墓人

號爲孤廬黃家

太學生彭受廬墓有白鵲之祥

郡表其坊曰孝行卓異

並莆田人

弟兄入館師生齊名

陳侗弟睦治平三年上令侍臣舉可充館閣之士
於是韓琦曾公亮歐陽修趙概等所舉蔡延慶等
二十人侗睦預焉已而睦除秘閣校理侗除館閣
校勘

通鑑長編劉
芬撰墓志

劉夙弟朔在孝宗朝俱入館

而朔特以不試除正字

二劉
墓碑

葉正簡陳正獻當國日以林光朝劉朔首薦朔師
事光朝至是同召告詞云爾朔直諒多聞而果於
從政爾光朝學問原本而志于仕道指陳當務之

急興予見晚之嘆

行狀及
告身

學爲置祠民競立廟

郡庠陳正獻龔莊敏祠以德望立蔡忠惠林孝子
以忠孝立二鄭厚樵林光朝二劉夙朔以儒學立
方儀以伏闕上書請建軍學立前太守趙彥勵王
居安生祠以撥贍學田立軍學碑

陳希造與父吉老捕劇盜于武平之義竿口死于
難汀之六邑人競爲立廟 宋旅擢大觀第知剡

縣越盜犯剡旅拒戰死之邑人祀焉 林豫歷知
七郡悉有遺愛其治邢州邊徼之民生爲建祠敵
服其威名嘗出緡錢修之
國史郡志郭
江志行狀
循良爲冠清白相傳

黃琮字子方校書璞六世孫登元符第嘗宰閩清
凡官有泛科及民者以已俸代輸百姓立祠靈應
寺有閩清清過伯夷清之謠府帥黃裳漕翁彥國
風力凜然琮以剛正逢怒既而反舉以京削時陳

麟翁谷皆以治邑有聲號三循吏琮後通判漳州
年五十二休致而去給事中傅崧卿薦琮云政和
宣和間循吏有三琮爲之冠乞特起用之琮竟不

起

長樂志
人物志

陳靖字道卿好學通古今利害事歷

七郡凡賦斂害民者悉奏罷王偁循吏傳云國家
治尚忠厚廉平之吏代不乏人今獨著循良于篇

自國初至靖康所傳纔十一人而靖預焉

東都
事略

林孝淵字全一擢崇寧第倅泉日按舶貨吏循例

歸龍腦一盒孝淵厲聲曰公則官物私則商貨何
例之有反舶庫納之弟孝澤居官所至以廉平稱
守臨漳一夕視事竟有持燭送至闌內者孝澤曰
此官燭也何可用之私室亟命持去楊誠齋銘其
墓曰清風肅而冰之玉之式訛彼貪尚或怛之孝
澤子杓尤清介有過客題其墓云青紫紛紛總是
官有誰姓字落寰間羨君清勁如松柏千古風聲
凜歲寒

並見家
傳墓志

林達秘書丞徽之後居官清白

司泉舶有遺鮓十甕者達不逆其意受之他日家人發視乃白金也達嘆曰昔人畏四知予獨畏一

心遽還之

家傳

許稹仙遊人登景祐第仁宗朝舉

天下廉吏凡四十九人稹居其一

國史

坊名襲桂嶺號歸仙

方殷符唐禧宗朝爲王府諮議與其子廷範自光山來宰長樂遂家于莆田刺桐巷廷範六子是爲六房方自齊卿擢皇祐第子穀復擢熙寧第郡榜

其坊曰襲桂既而容武舉及第子天若族子旬同
擢紹聖第天若子劭復擢大觀第弟天任擢政和
第 又有林氏由長城來居是巷自然之擢熙寧
第弟冲之擢元符第冲之子郁擢宣和第朝請渙
之子震擢崇寧第朝奉澤之子霆擢政和第衣冠
聯延復榜其坊曰朱紫

人物志載爲
陳嶠事誤

陳乘擢乾寧第陳光義擢元祐第所居號孤單嶺
及第還鄉遂改爲歸仙嶺蓋仙遊登唐第者自陳

乘始而光義繼之邑人故以名其嶺云

郡志

布衣入幕草澤上殿

邱奐字明遠紹興初詔山林遺逸有謀議可裨國家者赴都堂議事郡以奐充選進書數千萬言得旨堂察奐上沿邊利害二十餘劄丞相呂忠穆公奇之屬淮甸有警忠穆都督八路奐以布衣入幕未幾奏授以官張魏公亦器之奐嘗談兵劉錡座上錡喜曰吾生長兵間知兵惟子子蓋天授非紙

先是祥符間林楮藻之裔孫以草澤召授本軍教
授勅書云爾居閩越之俗爲鄒魯之儒頗飭行藏

聞于鄉黨宜殫麗澤往教州庠

人物志

承議延賞特科奏薦

卓厚字德載興化人擢熙寧第崇寧間歷官臺省
轉承議郎而卒朝廷特官其子

行狀

蘓棫字公美

徽宗時由尚書郎爲辟雍司業上奇其才將擢寘
翰苑而卒自奉議郎贈二秩官一子一弟且勅後

不得援例

王之奇
撰行狀

莆田阮南雄之才阮南恩巾方封州維興化林通

判兌皆由特科至員林郎任子他未考

郡志

自擢御史宜爲舍人

傅淇字元瞻擢紹興第官中都未嘗造權貴門適

大臣去國事闕言路臺諫空者累月會孝宗命以

六院姓名來上皆下當上意時淇已代去上閱班

簿獨指淇召對敷奏詳明上嘉歎即除監察御史

時六察皆闕官獨淇一人糾察廢務風采凜然上

喜曰傅淇朕自擢也

行狀

陳次升字當時登熙寧

第紹聖初爲御史首論勅榜反覆事當國者不悅
後乘間欲出次升爲河北轉運使上曰一漕臣之
職豈無其人陳次升敢言不當去朝廷尋除左司

諫

通鑑
長編

陳睦任中書舍人元豐六年冬高麗王子嗣位命
睦作慰問書睦草詞進呈神宗手札依擬定本不

復竄易一字明日對大臣曰陳睦宜爲中書舍人

國史

遺橘仙翁贈花山神

興化縣砦溪仙人巖上有野橘其實無時得者以爲瑞慶歷間陳方黃中庸元祐間方亞夫薛審皆以九日遊巖人得一橘並登第後鄭厚鄭樵繼得之厚試魁南宮樵以草澤召厚登巖嘗賦詩云短帽依然九日風巖頭的的問仙翁神仙料不私將

橘乞與陳黃方薛公 舊云碧桃無實熙寧中徐

鐸寓上庠偶碧桃生一實鐸見而得之明年廷試

第一

並郡志

方詠次彭之父天禧間置義齋于壽峰虎蹲崗四

方賢士如陳秀公

升

夏英公

疎

曾宣靖公

亮

皆不

遠而至與其子弟肄業其中一夕山神獻花七枝

置几上是歲七人同薦已而相踵登第後曾陳二

公位台輔夏公至樞密使詠以子貴贈朝議

郡志

就賜袍笏特命冠帔

黃穎字仲實元祐舉經明行修天下勿就者二人
穎其一也時哲宗閱舉籍以弗至問中書孫覺對
曰某臣所弗識穎實識之因陳其學行詔畀以官
就其家賜袍笏主劍浦簿嗣太守方全道以京削
薦穎請以畀同列後令長泰卒于官將死囑子公
坦曰吾寧瑾道側不願受人賻汝其遵吾命乎及
士民爭賻金帛公坦一無所受有哭以詩曰誰能

抱清節死亦照人寒白髮古君子青衿舊長官俸
錢還藥盡旅櫬到家難若葬路旁上自然神物安

坦後擢第官至承議郎

阮駱作
黃穎傳

蔡襄慶歷間以起居舍人知制誥侍御史呂景初
吳中復馬遵坐論梁丞相適罷臺職除他官襄封
還詞頭不草制其後屢有除授非當者皆封還仁
宗嘉其有守曰有子如此毋賢可知特賜仁壽郡

太君盧氏冠帔以寵之

實錄忠臣
言行錄

以詩名家有文行世

許稷工於歌詩爲晚唐所稱蔡襄詠草詩云時平
生戰地農情入春田王禹玉謂其言干教化非野
火燒不盡春風吹又生之比襄孫楹亦工詩如竹
靜深留月花多不辨香曙分林影外春盡雨聲中
皆風人所贈炙盧篆題梨嶺馮唐廟云五原塞外
驕兒悍萬死臺前女子多聞道中郎知魏尚不教
天子憶廉頗至今人誦之今列諸家于左

徐寅雅道機要并詩八卷

黃滔泉山秀句三十

卷

集閩人詩自唐武德至天祐末見唐藝文志

翁承贊諫議詩前後集

孫勣爲序唐藝文志載詩一卷

畫錦詩集

邀齋閑覽云槐黃黃舉子忙謂槐之方花乃進

士赴舉之時翁諫議有詩云雨中柱點望中黃勾引蟬聲送夕陽憶得當年隨計吏馬蹄終日爲君

忙載本傳鄭良士白巖集十卷

字君夢唐昭宗時獻詩五百篇授補闕見唐藝

文志後歸隱于白巖

翁氏父子詩

父緯子悅承贊之後吏部侍郎孫覺爲序方守

裡仙巖集

詩三百篇字裡借之祖父

方慎言詩五卷

如題靈巖寺弄月池

有官遊難作重來約一枕泉聲老不忘之句

鄭伯玉北鄭錦囊集烏山

三賢集

鄭伯玉著作陳琪提舉方孝能謂之三賢

蔡傳城南集二十卷

吟窻雜錄二十卷

襄之孫官至朝散大夫

吳世延詩二十卷

字延之一字季叟登寶元第

方澤詩集

字公悅多與黃魯直唱和山谷詩集有呈方公

悅方惟深詩集十卷

紅梅古柏舟下建溪等詩大爲王荆公稱賞至書之座間

李元文雲齋廣錄程致道北山集曾公卷南遊紀舊胡珵蒼梧集周知和垂虹詩話漢皋詩話見聞

錄多方臨詩集

中元祐第

林震集句詩七卷

震號介翁長于集句

所用詩凡三百八十家嘗有客舉陽關詞勸君更盡一杯酒令屬之震曰與爾同消萬古愁如山先寺晚春有云青山有恨花初謝流水無言草自春皆的對也徐師仁跋其集云冒次應餘五色線世

間爭認百家衣第豁李惟
遜中橋居士吳敏爲序

李昭文詩卷

登皇祐第
離州推官

林采卿涪陵唱和集

字朝彥登崇寧第朝請大夫
在涪陵與吳敏鄧雍相唱和

林廸詠唐史詩一編

字吉夫登紹聖
第朝散大夫

方絢濯錦詩

十卷

字君素父子容欲任以官辭與
弟康隱居西山號濯錦先生

二鄭詩集

鄭厚

鄭樵

方醇道編杜陵詩評一卷

南劍守
字子華

方煜荆南叢

錄

字仲誥紹興壬戌奏名有詩
二百篇及詩話鄭夾澤序

陳惟剛燕山集二

十卷

字毅老登崇寧
第朝散大夫

方通詠史詩十卷

真言之孫
登熙寧第

朝請大夫

方擴岳陽唱和序

字端立登紹興
第朝散大夫

方廷實壽

山居士集

如書亂床頭無甲乙鳥鳴窓外自宮商之白

黃徹碧溪詩話

十二卷

字常明登宣和第知平江縣陳俊卿序

鄭揆熊掌詩話

登隆興第

知惠安縣別號蒙卷

方略詩一卷

字作謀潮州守

方翦正字詩三十

卷

字次雲登紹興第

方士舉詩一卷

字元勳登紹興第通判興隆府

黃鐘

詩二十卷

字器之登乾道第興化人

林案詩五卷

字子容登紹興第台州教

授林彖詩集

號萍齋有詩數百篇

傅共註釋東坡和陶詩解

仙遊人紹興壬子奏名

宋煜捧腹集

字伯華待制隸之子朝議大夫

方銓續

編杜陵詩評五卷

登淳熙第興化人

以上科名爵里已見

氏族及互見別條者不盡錄

歐陽詹文集十卷

字行周見唐藝文志李詒孫爲序韓愈爲哀詞李翱爲傳墓在

莆田靈巖寺西平洋山

陳嶠文集二十卷

字廷封登唐文德第黃璞閩

川名士傳六卷霧居子集六卷

並見唐藝文志徐寅賦五

卷探龍集五卷

見崇文總目

黃滔御史文集并詩十五

卷東家編略十卷

登唐乾寧第

陳致雍海物異名記五

禮儀鑑曲臺奏議

五代時人仕僞閩入南唐以通禮及第

陳靖勸農

奏議二卷經國集十卷

熙寧元年吳充以勸農奏議上下篇奏聞神宗詔藏

之中書復宣索經國鄭褒文集三十卷希閔之孫登咸平第

陳絳文集十二卷登咸平第方慎言文集十五卷登咸平第

林瑀徐復周易天人會元紀慶歷間奉詔同修蔡襄莆陽

居士集三十卷 林伸東軒集十卷三傳正經登嘉

祐方晞道筆峰集字明之登治平第徐確刑部文集登元

豐第吳公懋文集字敏功登元豐第傅楫集三十卷

陳之邵壺山集三十卷登熙寧第奉議郎壽州簽判龍學陳軒爲序陳

次升謹論奏議二十卷 方輔宋陳巖居士詩文

集十卷

嶠之子

徐鐸文集三十卷易談二十卷羣書

總要一百卷

吳世延文集十卷

陳太卞文集

二十卷

陳琪烏峰遺稿十卷

卓厚集十卷

方會六家謚法

政和間奉勅編修

蔡傳雜文及時政議十

卷黃君俞六經闕言

黃廷堅云著書二百卷當是此類

鄭叔僑

文集二十卷

字子正伯玉之子登元豐第承議郎

林震文集一百卷

禮問三十卷易傳十卷易數三十卷易問五卷經

語千字文一卷

林豫筆峰草錄十卷

鄭事道

小莆川集

字希仲登元祐第朝奉郎

方龜年羣書新語十卷經

史解題四十四卷

登景祐第元祐中

黃卷離塵不夜編一

卷

紹興壬子奏名迪功郎涵之後

王英歷代皇王寶鑑

字偉卿登景祐第鎮

江教授又有天文地理存古等書

方元家文集十二卷

峻之子元祐辛未奏

名方絢濯錦集二十卷

陳師立宣僊集

字可權登崇寧

第傳諒友冰廳集

字仲益歌詩賦頌表牋傳序歲銘記誌之文甚工孫內翰觀云

觀公之文蔚若武庫魁奇偉麗九易十鼓觀公之詩隱若大呂震越渾鎗歌周頌魯

張弼祿

光易解九卷

黃裳龔原爲序

彭與易傳

紹興丁丑進書補泰州文學

許

允成孟子解 林自周易解莊子解詩文十卷

疑字

獨陳易詩頌雜文十卷易解並先天圖說石門蟬

蛻集 李昭遠九江集二十卷

昭文從弟

徐復遘防策

太乙主客立成歷洪範論 方甸文集三十卷

方天若文集五十卷 林冲之木鴈居士集 徐

師仁壺山前後集七十卷

確之子

方通文集二十卷

禱誌十卷詩書義解三十卷 方适楊王類義詩

文十卷 方軫奏議十卷

通之子

陳驥安處士文集

十卷

登元符第通判温州漳州

黃琮文集二百卷

著作多韓氏體鄭廷

芬易索隱六卷覆瓿集二十卷奏議三卷八行論

蒙三卷

字國華登大觀第

蔡樞文集十卷

翁績文集

字熙

戴方廷實蓄德齋文集并奏議

黃考功云公美自登朝著以至北還

京淮慷慨論事無慮七十餘奏如請建皇廟其言峻直時上富于春秋此人之所難也

陳豐

舫齋文集

驥之子少能文尤長于詩李昉漢老嘗得豐詩于泉南精舍恨其不與山谷諸

公同時因與定交丞相陳康伯薦豐學識高明足以通達國體文章典雅足以潤色皇猷得旨除刪

定勅令官尋除國子博士

林廸文集一百卷

王晞亮過庭遺

錄五百餘篇 方擴小蜡堂集十卷 林大鼐鐵

硯集 鄭樵溪西集十五卷 夾漈書目五十八部

五百九十餘卷 經旨類七種 詩辨妄書辨訛書考春秋考夾漈書傳春

秋傳跋正 禮類六種 謚法運記儀鄉飲禮圖器服圖駁儀議 樂類二

種 樂府諸序 校讎類十種 圖譜有無紀羣書會紀樂府諸序

古系地錄求書關記書月正記 譜系類五種 氏族校讎論志書倫載求正外記

氏論氏族源氏 天文類五種 分野記補正王希明族志改姓錄

畧天文 地理類四種 春秋地名圖百川源委圖郡縣遷革志春秋列國圖 名

物類二種

註釋詩名物志

方書類六種

本草成書本草外類鶴頂方採治錄

畏惡錄

食鑑

小學類九種

六書論編字始連環象類書六書譜續汗簡音韻釋文論

梵書石鼓

卞經緯韻

小說二種

集說該典

又有歷代通志二十畧

天文地理六書七言音韻郡邑氏族禮樂職官選舉謚法器服刑法食貨藝文校讎圖譜金石灾異

昆蟲草木鄭厚湘鄉集存古易一卷藝文折衷一卷

陳昭度西軒集十卷刻舟集三十卷

字元矩登紹興第

黃

泳四印居士集

黃公度知稼翁集十二卷

洪邁陳俊

卿鄭至道諭俗編

字保衡登元豐第知韶州序鄭至道諭俗編樂昌縣有劉阮天台洞記

卓犖

河洛元虛二圖纂數圖解六一卷

熙寧中三舍貢士

陳俊

卿詩文集二十卷奏議二十卷

宋藻烏山集五

十卷羣經滯穗百篇中興十君論

龔茂良靜泰

堂文集并奏議

王悅春秋解五經質疑

鄭耕

老中庸解周易解

字穀叔號友堂

黃鍾史要三十五卷唐

宋類文三十卷荀楊續註周禮集解定齋文集何

巖風土記

林光朝文集三十卷易解論語中庸

解詩書語錄莊子解

薛璚邊防十論考古集十

卷

字卓然興化人登紹興第永福簿

林處詩解補闕禮經總括西

漢登微釋奠解

仲之孫朱熹爲記

黃亨漁樵謬論七卷

之

後登宣和第營道縣尉

郭雲盤齋石并文集一百卷

黃補

詩解論語解人物志十卷白樂天詩年譜一卷

彦字

博號吾軒涵之後乾道奏名

方萬斗居文集十卷

字盈之登紹興第

李

綸文集十卷

字維之登紹興第漳州教授

劉夙奏議一卷史記

正誤二卷春秋講義一卷注漢書續博古論 劉

朔春秋紀年圖易占圖書註注唐書 劉起世八

象圖

子廌之

薛元鼎詩文講義二十卷

蔣錕朴齋

遺稿二十卷

字元鼎登紹興第

謝洪文集十卷

字範卿登紹興第

二吳中庸論

源字清甫登乾道第落字和甫淳熙奏名又有樸論十卷

黃艾止

堂雜著三十卷書講義二十卷春秋講義十卷通

鑑論斷五卷聖政史斷五卷奏稿外制三十卷

留洪詩文集

字處厚登紹興第

莆陽比事卷之三

終

莆陽比事卷之四

龍坡李俊甫幼傑纂輯

元祐黨籍慶歷諫臣

崇寧三年六月籍元祐黨人以司馬光爲首凡三百九人刻石於文德殿門東壁復詔天下州郡各

立石莆預是籍者六人陳次升

坐前後爲諫官言事及辯宣仁誣謗

畧見疏彈子厚

朱紱

坐辨范純

禮劉安世呂希純及當時有德條

不載王回

生與鄒浩交通見賢士交游條

黃隱

坐向司馬光學術見學尊司馬條

林

豫

坐二蕪所薦見名公方适及上對策乞復元祐後

論薦及忠談蕪軾條

附見當時有德條

五年詔除中外黨碑

通鑑長編黨籍傳丁未錄

慶歷初歐陽脩王素余靖俱除諫官蔡襄賀詩云

御筆新除三諫官喧然朝野競相歡當年流落丹

心在自古忠良得路難必有謀猷裨帝右直須風

采動朝端世間萬事皆塵土留取功名久遠看三

人以詩薦於上亦除諫官時號爲一棚鶻

出記聞言行錄

王鞏見聞近錄按呂原明雜記云君模自福建漕召爲諫官知福州王遠以詩送之忘其首聯云好

將公道口去沃聖君心民困魚思水兵
驕隼在林天涯一樽酒不爲別離斟

漆林書堂福平別墅

漆林書堂在郡北蒜嶺南即唐少府監翁巨隅家

塾子諫議大夫承贊水部郎承祐猶子秘書監郎

襲明皆於此肄業成名已而承贊銜命至閩與侍

郎蕭頊同尋舊書堂頊有詩

詩見翁氏家集郡志

歐陽詹書堂在福平山下

郡西北二十里一名北平

始詹家晉

江遷於莆與林蘊兄弟肄業靈岩後改築於此詹

遊蜀間以詩寄蘊云村塢如延壽川原似福平無

人共相識獨自故鄉情

本集注云延壽即蘊別墅福平即予別墅

元和

才子章孝標邵楚長並有詩寄題

後黃滔黃楷

陳蔚歐陽碣有東峯書堂

陳嶠許龜圖黃彥修

有北岩精舍

鄭樵有夾漈書堂

黃滔集郡志游泮志

丐者留詩異人與語

方子容字南圭少游京師遇丐者拱立道側子容異而禮之其人留詩一聯云君家桂樹成翠陰子

子孫孫邁古今後子容與其孫畧簡輿霖繼登第
今所居有翠陰堂桂陰堂皆以詩名云

白杜
堂記

林孝澤初貢京師道遇異人藍縷坐古木下積雪
沒臍殊無凍色孝澤與語即期以貴顯孝澤前行
問後至者皆無所見其年登第後果秉麾持節一

如所言

義門老
人庵記

真忠夢復純孝成之

林蘊字夢復劉闢帥蜀辟推官闢謀逆蘊責以順

逆之理闢怒械於獄將就戮呼曰危邦不入亂邦
不居得死爲幸闢陰誡人勿殺以刃磨其頸蘊叱
曰死則死爾我項豈頑奴砥石耶闢曰此真忠烈
之士釋之後因說滄帥程權歸闕除禮部郎官劉
侍郎伯芻表薦云抗忠辭於蜀郡劉闢改容陳大
義於滄州程權歸闕尋除邵州刺史終于官

唐史本傳

閩川名士傳

鄭褒字成之舉進士至輦下會詔罷去過滁上王

元之留褒俟秋而行褒曰褒有母老向之去數千里別數百日者欲干名而顯親故雖遠且久若在母左右今詔下將及闕吾母必計程以待遲一日即貽母一日憂元之曰生有純孝足警世之為人子者為之泣而賦詩云褒也甌閩士文高行益脩干名逢詔罷歸計逼親憂鷗鳥終相狎公卿漫欲留刺桐花下宅蘭蕨奉晨羞後登咸平第判福州以便終養

王廣州集

陳鑄字師回擢天聖第康定初

守南雄歸以母老不復請郡求通判福州以便侍
養一時名公宋景文曾宣靖富韓公文潞公咸以
詩送行至七十有二篇蔡忠惠為序云

莆陽居士
集游洋志

減奠祈雨捐生築陂

陳豐字宜中乾道元年間以國子博士守南恩公
勤清儉田野無秋毫擾歲旱祈禱切至請詞有云
願俾微臣特減數年之壽令茲闔境普沾三日之
霖僚屬請改之豐不從果雨是歲終于官百姓為

之巷哭至今祠焉

南恩圖經循吏政迹門

王悅字習之為

時名儒初諸經講解尚寡悅獨能討究疑義學者

爭傳誦之登紹興第為吏部郎出知衢州歲旱禱

雨請詞云願減十年之算化為三日之霖纔得雨

卒衢民哀之為立祠塑像于徐偃王廟大書二句

於碑事聞詔贈直龍圖閣令廟號王龍圖祠

信安志祠

堂行狀
叅出

木蘭陂在郡南五里其源自永春仙遊而下合澗

壑之水三百有六十東入于海陂之下流溉田幾
萬頃塘無瀦水遇旱歲入不能半治平間有莆田
錢氏女始議堰陂出家貲募役水勢衝激陂成而
壞者再錢不勝憤赴陂流死至熙寧間侯官李長
者宏應募而至陂始成今陂上有義廟李長者錢
氏女合祠焉

莆田志

思遜捧表澤辭致仕

林孝淵倅泉州太守鄭司業謁告歸覲孝淵攝州事

會建炎登極時守臣該捧表恩鄭亟還已無及謂
孝淵曰公青春未艾某年且老所愛惟一孫願以
與之孝淵慨然無靳色他郡有類此者守佐輒交
訟至降旨以拜赦者得之聞者益服 又有當奏

補舍其子而官其兄與弟姪者鄭通判剛林肇慶

元忠薛舍人元鼎鄭大監稟蔡寶學戡劉正宇起

晦是也他未考

並行狀

許遜父鎮由德州倅除監察御史未造朝卒舊制

身後致仕者官爲寃實乃殮哭曰人子不能自致
功名必求致仕思以累亡者乎遂不陳乞後擢熙
寧第黃隱直講君俞之族子擢治平第官至殿
中侍御史臨終戒家人毋得請致仕時徽宗聞而
異之特官其一子靖康初追贈直龍圖閣復與一
子入官林震字時隱兄震欲以郊恩官之震曰
丈夫當自致身此非吾志也後擢政和第

並人
物志

坊坡隱叟萍齋逸士

徐壽仁字子由師仁之弟好讀書尤長於詩遊場
屋不偶晚傍所居築坡種菊自號菊坡隱叟命其
臺曰澆酒菴曰夢蝶軒曰觀魚蓋慕莊周陶淵明
之爲人陳正獻梁文靖皆嘉其風操文靖詩曰莫
問歸休定何日先生無日不歸休

人物志

林豸字商卿介潔自高六經百氏無不該貫平生
不踐舉場自號萍齋乾道四年監司以不求聞達
薦既召辭不行得詔旨特賜進士出身添差鄉郡

教授有詩數百篇行於世後有草堂先生方東白

漆林先生翁亢近是焉

人物志

恥附秦黨弗詣蔡門

王晞亮字季明紹興元年釋褐初秦相檜爲學官

晞亮爲學錄及秦當國以晞亮舊識除剛定官兼

權太學博士尋以其不附已罷授福建帥屬居選

調十九年方改秩既又投閑五年泊秦歿時朝廷

以國子博士召不四年至給事中

墓碑

方廷實字

公美紹興九年爲宗正少卿秦檜方力主和議廷實被上命宣諭三京是時上方以陵寢爲念廷實爲上言臣到西京必首先朝謁尋朝廷亦遣宗室士褒張燾同謁廷實還秦預使戒之曰見上時幸母及他事且約以美除廷實曰欺君之事吾不恐爲也及對上歷歷泣涕言之力求補外出提點福建刑獄丁母憂服闋除廣東提刑卒于官

中興紀事云宣

諭時爲監察御史揮塵錄謂自省郎出使又云廣東之命廷實以其父監嘗提廣東學以卒不忍往

奏乞降旨起行謝表云三舍教育先臣之遺愛猶存一哭平安慈母之音容未遠讀者哀之

朱宗字成德累遷太府卿是時徽宗尊寵潜邸之舊併錄其子如溫萬石何志同之儔皆超進大官宗父紱亦舊學之臣宗不自言亦無有爲宗言者蔡京同州里持國柄逾二紀凡附已者輒躋顯仕而宗終不一詣其門

行狀

方价

舊名儼

字子嚴擢熙

寧第大觀初宰壽之安豐用翰苑特薦召審既至蔡京以价不肯私謁報罷尋卒侯官已而挂冠里

居二十年終朝奉郎徐師仁酌曰當衆人奔競之時惟思靜退於舉世混濁之際獨守潔清

行狀

陳驥宣和間爲國子博士一時附蔡京者皆得美

官驥恥爲之屈不肯一見遂就部再授通判年六

十二挂冠而歸

溫州倅廳雙絲樓述

方軫慎言之曾孫宏

放有文采以父通任太廟齋郎時蔡京當國軫抗章列其過云睥睨社稷內懷不道效王莽自立爲司空效曹操自立爲魏公將視祖宗神靈爲無物

玩陛下不啻如嬰兒專以紹述熙豐之說爲自媒

之計上以不孝劫持人主下以謗訕詆誣天下自

古爲臣之姦未有如京今日之甚文多不載坐是削籍

編置海外

通鑑長編史臣云編管嶺南不見的月日按家傳蔡京乞推究在大觀元年九

月十九日軫放置在閏十月二十七日靖康元年五月十六日復有旨收叙揮塵錄云竟俎貶所者

誤令附月日以補國史之缺

傅楫字元通擢治平第爲中書

舍人時曾布當國於楫有汲引恩冀其助已楫歸

然守正凡于朝廷命令有可疑進退人才有未當

必反覆極論之如抹王邁古范純禮之類皆人所
難言不合者因是中傷之而揖不知卹也

國朝實錄併家

傳衆出

羨餘不獻券旁自焚

葉容守毗陵日樽節浮費甫年餘積至二十餘萬
同列有謂兩浙二漕共獻羨餘二十萬平江鎮江
各十萬人賞一官公何惜而不獻容曰某生平惡
人獻羨餘他人競欲做好官某只圖做好人聞者

媿服狀

吳公誠字君與擢大觀第官至朝奉大夫仕宦三十年終始檢勅凡衣服布帛家人所須悉自鄉里市致未曾取之民奉祠日計所受俸自費用之餘皆委於官凡千緡家人或以爲言公誠之曰國家艱難無以助用度悉取券旁焚之死日家無餘貲其清介類此子廷秀廷表官至守貳

王廷堅墓志

坊表孝義里名文賦

林昭度隨計卒於舒城妻翁氏年二十一守義事舅姑以孝聞教督二子嗣宗嗣先俱擢第郡以翁氏有至行表其里門爲孝義之門

載林氏家譜

又有

趙子乙妻王氏世居睢陽年三十守義事其姑秀容縣君唯謹靖康失守王氏以堊土自毀背負姑携幼子避地而南他子引裾累累展轉亂屍間越四年始達溫陵徙居于莆終焉一時名士二十餘

人陳正獻龔莊敏林艾軒陳西軒鄭湘鄉鄭夾漈林尚書黃考功徐菊坡方正字鄭監簿王左司

徐侍郎
林參議

皆以詩表之有云疇昔干戈百戰場縉紳

墮節半蒼黃如何婉婉閨房秀能麗精神日月光
其子伯愚伯達並登第至今仕進不絕人以爲節

婦之報

艾軒撰行狀
木蘭家譜

朱鄴以能賦名舊傳徐寅作雷出地上震賦破題
未成鄴應聲曰陰伏陽回地震出雷今所居里曰
文賦以鄴得名云 唐貞元間林藻歐陽詹以詞
賦與中朝名士相軒輊至本朝盛時蔡襄方蒸陳

睦黃君俞朱紱黃隱傳楫皆以詞賦名世見於三

元元祐諸集

國史郡志參出

南渡以來有林鄭黃劉諸公

大鼎厚公度夙朔是也劉正字云鄭出語險處視蜀道易處抵秦川林乃拔奇摘怪窮討極取枝枝相亞葉葉相並自以爲王勃吳融如可作未應爲獨步

魁大廷南宮大學者

前後相望云

歌播清風頌傳甘露

蔡襄漕本路自大義渡抵臨漳夾道植松七百里
郭公甫歌曰六月行人不知暑千古萬古搖清風

閩人刻碑頌德官禁剪伐載於令甲云

莆陽長樂清源志

許懋字敏脩登慶歷第漕兩浙衢民私釀繫獄久
不決懋至出之囚感泣競詣佛寺飯僧祝壽甘露
降于州人謂德政所感作甘露頌

信安志郡志

舟危物負地震神扶

吳稟字可中父世寧客遊蜀卜築青城山號青城
居士及卒稟尚未冠謀迎喪季父憐其少留不遣
稟日夕悲悼竟沿峽扶柩歸舟危於旋渦幾覆溺

若有物負之者時以爲孝感所致九江范安之作
吳孝子傳一時名士多爲跋稟卒以子贊贈奉議
郎 徐膺字思文母死廬墳旁蔬食三年時登山
巔焚香籲天甘露再降墳左有深塹非役千夫不
能塞一夕有聲若雷旦視塹已平矣隣里嘆異從

父鐸爲記

人物志

余祖奭字景召

舊名祖禹

擢元符第倅蘭日地大震公

私廬舍盡毀祖奭當顛危之際若有神物扶置隙

地人異之後官至朝議贈金紫

載莆陽志并家傳參出

又

陳洪進佐張漢思爲清源留後政事皆決於洪進
漢思患其專因大宴伏兵將誅之酒數行地忽大
震屋宇將傾坐立者皆不自持有密告洪進即引
去衆皆罷散方震時門外宴然不知也

清源志

紙貴徐寅字寶君謨

徐寅乾寧初舉進士試止戈爲武賦有破山加點
擬戍無人之句侍郎李憐奇之擢第嘗作人生幾

何賦四方傳寫長安紙價爲高者三日後歸隱壽溪以漁釣爲樂有詩云賦就成都振大名斬蛇功與樂天爭歸來延壽溪頭住終日無人問一聲至今以先輩名其居風物賦云千古寶君謨之書三

日貴徐寅之紙

詩史鑑明錄

蔡襄工書人得其字以爲珍藏時尤爲仁宗稱愛嘗親製元舅隴西王碑命襄書之後又命襄書溫成后父張堯封碑襄不肯書曰此待詔職也又高

宗嘗評書法謂襄爲本朝諸臣之冠歐陽脩以爲當世獨步蘓軾以爲近代第一李之儀亦稱爲一

代師表云

東都事畧六一集東坡志人物志韻語陽秋

今待制陳謹

字正仲得古筆法尤工大書四方求者踵至其道勁處不減君謨

帥服宰賢漕稱尉直

黃琮宰閩清方嚴不畏強禦時方興道藏帥命十二縣分疏斂民縣各數百萬琮獨不應命既聞他

縣皆辦廼自詣郡以已俸四月輸之帥雖不平然

心服其賢

夷堅志

徐確字居易昌嗣之曾孫登元豐第尉江陰歲潦傷田漕檄確往視確以實告令不喜白漕曰尉意也確曰吾知驗實而已果非實敢避其罪漕以確辭直即曰尉愛民如此令獨不愧耶令大慙

人物志

箕仲少恩當時有德

林師說字箕仲漕廣東韓京以措置盜賊知循州

頗驕愎師說乃上章列其姦狀後數歲師說里人陳士宏以檄見京京曰監司直須還此老第於我

少恩耳

行狀

陳次升字當時擢元符第初在言路時當國者多

誣謗宣仁

英宗后高氏

次升一日奏事畢前言曰宣仁

保佑聖躬功德巍巍若以姦人疵毀輒有議論不惟有虧聖德亦恐大失人心矣上曰無之次升曰臣敢爲陛下賀及上遣呂升卿往察廣南次升又

言曰陛下保全元祐臣僚今廼欲殺之何耶上曰
無殺之之意次升曰升卿廼惠卿弟元祐中負罪
致仕其人資性慘刻善求人過今將使按於元祐
臣僚遷謫之地理無全者於是升卿罷行劉元城
曰陳當時有德於元祐人多矣

通鑑
長編

方适字彥

周少隸籍於大學元祐后廢迺對策殿廷曰始陛
下之迎后於西宮也天下之人舉欣欣然而相告
者無他得君母也及陛下之遷后於北宮也天下

之人舉處額然而相告者無他失君母也臣誠願
陛下力排羣議還后於西宮則道路籍籍之言息
矣詳定所以聞會上特命收留而考試官竟抑之
時陳瓘覆考歎曰是何舉人敢直言如此邪及徽
宗即位適瓘因論事復對上誦前語上謂之曰卿
力搜訪其人適竟不肯自達瓘亦莫知其姓名後
復上書譏切時政入元祐黨籍終宣義郎

通鑑長編
宗寧

黨錄丁未錄元
祐黨籍傳衆出

減丁蠲米罷權削輸

蔡襄知福州奏減閩人五代時丁口稅之半福興
泉漳不權鹽酒比屋許用銅瓦皆襄之力也莆之
苗斛六餘萬建炎盜起漕司算其軍糧食猶剩二
萬五百入之福州莆於是猶有剩米每增量民間
斛面以足數葉容當國劉夙力懇於朝廷得從半
減請猶未已容袖書以進乃盡蠲之

已上見國史
及葉行狀劉

墓志

鄭禧字春卿通判漳州會王荊公變役法遣

謝職方勾管役事謝召諸郡倅就議衆論紛紛咸主科差舊謂閩人非他郡比力倡免役之議謝用舊言奏上其法行之至今不改

行狀

林之平字國衡擢崇寧第歷監察御史建炎間國家窘乏時朝廷議行鈔鹽權酤於閩之平奏閩不過數郡州縣藉鹽綱以爲供億之費編民資麴蘖以爲伏臘之養上從其議罷之

行狀

陳靖爲江南

轉運使江南自李氏橫賦於民凡十七事名曰沿

納而國朝因之民貧不能輸靖極論其弊遂詔罷

其尤甚者數事

名臣傳東都事畧

林雱字德溥通判福

州適朝廷議計僧口給食籍餘財輸戶部雱白帥

張澄曰閩中地瘠民貧州縣色色取辦僧寺若餘

財悉籍則郡計必斂於民遂以利害條奏朝廷從

之俾閩無橫斂雱之力也

人物志

林杓守信州罷

民間物力錢五千緡漕江西罷諸縣無名色錢十

萬緡漕福建奏罷諸郡物力錢如汀州無額經總

制錢漳州諸縣稅色等錢悉爲除豁 蔡戡字定

夫擢乾道第漕廣東漕司歲買銀十萬兩銀非土

物舊分配行戶徃徃破產戡罷去之廣人醵金置

酒相慶榜於通衢謂之太平會

行狀

龔茂良奏減

四川酒課錢鹽引四十七萬餘道

鄭僑奏減福

州古田編重之賦 鄭梟奏罷鄂州地鋪生口冰

雪等錢十七項爲緡幾二萬 方崧卿奏罷吉州

米運力勝錢歲萬餘緡減放諸色月解錢歲六萬

八千緡 今給事劉棻奏免福建路沿海郡漁業
稅錢

宋藻進論林井上書

宋藻字去華紹興初進十論上時語執政曰有氏
宋者與汪藻同名所進篇篇可採遂以布衣召見
而占對如響上悅甚特命爵以京秩試編修官政
府以藻上書不先白沮之注廬陵尉尋擢八年第
終浙東提舉

狀行

林井字才美時上孝宗書條陳邊事稱旨賜官授
楚州戶曹掾繼擢淳熙第唱名之日上謂宰執曰
林井以上書得官今復中第亦見朕不妄與人以

官

狀行

恐負宿諾就尋前約

葉容在富沙時與同年林攷聯事厚善約昏林攷
卒其家卑弱容仕寢顯來議婚者皆貴閥容嘆曰
死生廼見交情吾與林君諾矣何恐負之卒以女

妻其子且命以官

家傳

蔡襄初與劉屯田異約婚後登侍從異沒襄出守
于福州就尋前約異家以非偶辭襄曰古人挂劍
尚有心許吾與劉君義氣相求兩家之好雖在髫
鬢媒聘未行其言豈可食耶今所不足者不過謂
奩具凡女家資遣悉爲辦治使仲子授室而歸

友義不忘相婚力却

陳士宏字毅夫登紹興第初官泊頭永嘉陳少南

謫惠陽一見士宏如舊識書抵艾軒曰毅夫吾黨之友吾得毅夫不至有索居之嘆一日疾革謂士宏曰吾病且死敢托後事葬吾某處卒士宏爲治喪假窆于所指之地尋得旨歸葬士宏護送數百里惠陽人義之黃芻字秀野莆田人艾軒高弟與二劉公友善擢紹興第調懷安簿未上卒家貧二劉公葬之先塋之側表曰黃懷安墓銘其坎曰欵耶欵耶吾黨有若人而反乃爾耶千百載道旁

其敢以無禮施之懷安之草木是必有鳴鳴然者
耶 鄭稟字景實登乾道第與彭奎及其弟璧善
奎官嶺南夫婦俱歿稟極力拯援歸其柩葬之仍
買田與璧及兄子闔其不忘友義如此

行狀
家傳

林霆擢第後太宰余深叅政許將慕其才名爭欲
妻之霆曰貴不期驕若人之女安能事吾母乎力

却其婚

人物
志

莆陽比事卷之四 終

言部出三卷四

三十一

莆陽比事卷之五

龍坡李俊甫幼傑纂輯

力止童貫合擊大淵

宣和末童貫大興燕雲之師欲引蔡樞爲謀議官
樞毅然不從以書止之曰天下無事垂髫戴白不
見兵革一旦爲國生事驅民萬死一生之地傷害
和氣莫此爲甚他日國家多事自此始矣既而僅
獲空城而靖康之禍作人始服其遠識云

張九成
撰墓志

朱宗紹興初漕本路建安盜起制置使辛企宗捕
討無功方議募兵檄取錢米數十萬宗貽書責之
曰擁兵彌年州縣轉餉費百萬而誅責不已民在
壑矣公自爲之吾不能復爲下石也會朝廷更遣

他將而盜平

孫尚書覲
撰墓志

隆興乾道間龍大淵曾覲以舊僚憑附陰進退士
大夫劉夙爲著作郎輪對首發其端退復上疏切
諫疏入亟求罷留之數十不可出爲湖北安撫司

叅議官時龔茂良爲右正言亦兩上章論列不報
改除太常少卿後葉容當國有所進擬命未下而
外庭已傳播陳俊卿在政府聞之以告葉容翼日
同於榻前極論上曰朕何嘗謀及比輩必竊聽而
得之耳卿言至忠當爲卿出之退未及門已得旨
出二人於外天下快之

葉正簡陳正獻龔
叅政劉夙著墓志

忠談蘓軾學尊司馬

林豫嘗爲蘓軾所薦後軾下御史獄豫適賜對時

神宗問誰所薦豫曰蘇軾問何以識之曰臣經由杭州軾爲倅因會客識之又問是日所談何事豫頽首曰臣子所談無非忠孝識者韙之

郡志

黃隱元豐中爲監察御史初入對時方尊尚王氏學上問隱學術隱以司馬光對上知其不撓遷殿

中侍御史

狀行

經授高麗卦推西夏

蘓軾爲太學博士會高麗遣子入學講周禮時五

經皆置博士惟周禮闕員俾械兼之而議論該貫
徽廟嘉獎每高麗使至輒私饋械械必聞于上而
後受後除考功郎駁南曹僞官八十餘人五府有
以親故囑者械曰吾職在奉公終不以私恩廢公

法出爲京畿提點刑獄

王之奇
撰行狀

林瑀擢天聖第侍講禁中瑀深于易太元爲宋宣
獻晏元獻所稱他日推易卦氣言夏人當逆命果
有西師時上因令與徐復同修周易會元紀而賜

五品服寵之

祖無擇撰行狀

徐復與瑀同學易東游淮淝

慶歷初范文正過潤問復以衍卦推之令夷狄無
動乎復爲言西方用兵及罷兵歲月無少差異西
事起仁宗召用復以京房易卦對曰今年月日所
配當小過剛失位而不中其在強君德乎上復問
變故與前世何若對曰如唐德宗居奉天時耳上
驚曰何至此復曰君德不同願陛下無深慮德宗
忌刻其德與凶會故至于是陛下恭儉仁恕西人

之變起自元昊而陛下不得已應之時與德宗同而德與之異卦氣雖凶不久自定矣上稱善

東都事畧

龍川志石林避暑錄通鑑長編及家傳參出

疏彈子厚詩諷荆公

陳次升元符末爲諫議大夫首論章惇在元祐間廢斥不用及紹聖擢任元輔不思竭忠報稱乃陰懷私忿以復仇寃甚至誣人以悖逆俾朽骨銜怨於地下子孫禁錮於炎荒又言其迷國誤朝殘人

害物而陛下入承大統肆爲異論又爲山陵使大
舛輿陷于淳淳惇坐是謫潭州章六上再貶雷州

國朝實錄
通鑑長編

薛利和剛直不媚權要王荆公當國欲用利和提
舉廣東茶事先是廣東未嘗權茶利和謂此法立
民受無窮之苦以詩諷曰一路生靈隄頓貧廟堂
康濟豈無人君王若問茶租法請把租錢乞與民
由是下遷廣西侔茶法卒不行

狀行

永嘉理學高密儒風

劉夙嘗教授溫州朔次攝學事於科舉外以義理之學淑人陳傳良葉適以諸生見夙得其文大稱賞曰是必以文名天下者後四十年葉公誌其墓曰吾邦之士披山通谷浚泉源而達之川流其尚有聞二公之力也陳謙過莆留詩石塔云長劉提正律折衝陳堂堂少劉峙其躬凜凜百鍊剛獨立百世後共分淵孟香近市人不知公論在八荒永

嘉名士其推原理學於二公者如此

陳開字明發擢熙寧第教授密州時蘓文忠治密
深見器重諸生乞留更七年而後代密之儒風盛

於曩時云

行狀

方會字子元擢熙寧第教授建州

閩士聞風至者幾千人廩餼不足部使者上其狀

詔賜田以贍之且增秩

國朝實錄

媼冤獨察卒誣立辯

蔡高襄之弟擢景祐第尉長溪民媼二子漁於海

而亡媼告縣指某氏爲仇縣吏難之曰風波之中
豈知其非溺乎且屍既不得何以爲證高獨曰媼
色有冤吾不可不爲理廼陰察仇家得迹後七日
獲屍海上驗之果殺也遂捕仇家至則服罪至今
長溪人喜道其事

歐陽六一集

方偕爲御史臺推直官有澧州逃卒匿民間傭以
自給一日誣告民家事魔馳神歲殺十二人以祭
州逮其族三百人繫獄事久不決聞于朝廷詔遣

借就劾借令卒疏所殺主之名按驗皆無狀一日

之寃辯解

通鑑
長編

誰能寫心爭願識面

方慎言知潭州秩滿潭人德之相率畫其像慎言
曰吾衰朽之容不足過飾然此心憂勤汝安能得
之耶遂賦詩曰借問城中推妙手誰能寫得使君

心

行
狀

一葉容宰上虞歲饑經發常平米賑糶方春勞農民

爭遮道拜曰知縣德政如此吾願一識其面

家傳

胥不受餽吏至質衣

許巽字少陽擢乾道第在官清儉同僚目爲耐貧
翁後以秘書郎守滁時監司鄰郡互送月至三百
餘緡巽悉付公帑積至一萬四千餘緡胥吏畏服
有以白金餽者胥不敢受曰秘書知措身何地

行狀

方偕善飲酒後聰明過常時宰福清吏嘗乘醉白
事明日覆之吏隱其一偕曰更有某事在吏叩頭

謝罪迨終任吏無所容其奸至質衣以自給人至

今誦之

東軒
筆錄

鄭伐妖木王去淫祠

鄭濟字輿梁擢元豐第爲端溪令先是縣官踵死
濟至或曰縣解古木爲妖當具牲牢禱之濟曰木
詎能爲妖耶非在祠典祭之淫也戒工伐木迄無
他異方耒字耕道擢乾道第尉善化邑多淫祠
有茅將軍廟枯木仆而復立民施財旁午耒伐木

爲薪聚管熬廟民惑乃定

南雲
見錄

王回字景深登熙寧第爲荆南松滋令邑多淫祠
以人祭鬼謂之採生行旅不敢過回捕治甚嚴其

風爲之變

國朝實
錄家傳

蔡襄漕福建閩俗尚鬼襄至

凡巫覡主病蠱毒殺人者痛爲禁止其風始息又

作五戒以教諭之襄去民爲立德政碑

通鑑
長編

戀德有旗寫像以帛

林圻守信州知物力民錢爲民患閱舊籍爲緝五

十萬力主罷之斥公帑代輸既代就道邦民數千

揭竿裂帛曰戀德旗送出境

信州祠堂
德政碑

林積仁字元美擢紹聖第知平陽府尋提點京畿

刑獄既去人皆罷市泣送靖康初平陽父老詣闕

乞積仁爲太守遂以秘閣修撰再任郡民迎拜合

沓以帛寫像家置祠焉

林艾軒撰行狀于元忠元
方孫叔坦叔度至監司守

貳

埋瘞七千原減二百

宋藻提舉浙東未期年重造明越梁湖廢堰更造
三衢義倉罷猾胥六百六十九人永嘉有風濤之
變藻躬行阡陌埋瘞七千餘尸召對語移刻上獎
諭曰卿甚勁直來日當再引見

行狀人
物志

陳鶴字聞野嶰之孫擢宣和第倅廣州海寇猖獗
帥命督捕鶴盡擒三百餘人兵官貪級數請悉誅
之鶴原其脅從二百餘人宋藻狀其行事謂入仕
三十年前後四任雖止縣佐郡丞陰德在人多矣

人物志

邱奐居劉太尉錡幕下沅州解降因四十
有七人闔府咸謂宜殺奐曰溪洞嘯聚間或有之
既降而殺永絕懷來之路不若奏朝廷處分錡執
其手曰叅議當于古人中求之既奏俱貸死隸諸
軍後多立功奐卒以子贈中散大夫

人物志

莆陽比事卷之五終

莆陽比事卷之六

龍坡李俊甫幼傑纂輯

太守德政郡齋盛事

莆自置郡以來二百餘年以賢二千石稱不爲乏
人殿中丞李餘慶所記僅二十餘今補其闕風節
則李及曹脩古廖剛儒雅則張讀汪待舉林栗王
居安功績則潘時趙彥勵政事則何偁葉端衡鎮
靜則居時升傳自得朱端學其餘不可殫記

郡齊素多盛事傳自得守莆子伯壽伯成晨夕肄業不出齋閣傳每謂人吾家二瑞物果同擢紹興癸未第並中教官伯壽又中詞科位樞密伯成今以從官守藩何偁子澹試禮部第一今爲樞相觀文殿學士汪作礪子義端廷試第三人終給事中義和義榮同擢第義和官至侍御史義榮大理寺丞

論忤都水請拒廉使

林伸字伸之登嘉祐第熙寧八年調永靜幕官內
侍程昉陳屯田實邊之策欲閉舊河以說朝廷得
爲都水使者勢熾傾一時新開葫蘆河於孟家口
墾民田發屋廬墳墓滄景德棣之間俱被害人莫
敢言伸親視舊河深新河狹水勢趨下不可以力
勝條其利害以聞昉以阻壞河事劾伸褫一官或
見伸奏曰位卑言峻是速禍矣伸曰伸知爲民計
不知爲身計身危民安雖去無憾終朝奉郎家傳

黃宣宣和間宰遂平李彥以承宣使按括京東西
公田欲籍遂平田供延福內藏宣屢執奏至三降
御札遣中使覈實宣以身捍之遂平獲免彥誅梅
執禮奏既黜附彥之人如宣宜有褒異特與一子

官

郡志

黃琮宰泰寧內臣楊安時爲廉訪使者數干以私
皆拒不答嘗切齒思報會奏事京師每見朝士必
詆以惡溢之言及入侍徽廟問在閩時屬縣有賢

令否安出不意錯愕失對惟憶琮一人姓名極口

稱贊上喜即日召赴都堂賜章服改員外安時既

出方大愧悔

人物志

徐確守九江中貴人使具舟

載花石確拒之曰吾州有糧綱船爾陳瑩中方謫

居確書抵蔡京曰瑩中久廢宜平前寃少伸忠義

之氣瑩中聞曰不意莆田有此公也

郡志

義揭講席名錄御屏

黃艾字伯著丞秘書時上在嘉邸艾爲王府贊讀

四年嘗著無逸立政周官講義發明周公輔成王
緝熙之學上深喜之至書之黼素爲六軸揭於講
官之右上即位艾乞宣索六軸寘內殿焉

狀行

陳膏居仁之父擢政和第靖康時教授汾州金寇
逼郡官屬走竄獨膏與太守張克戩死守後歷遷
殿中侍御史以不受當路風旨改太常少卿然甚
爲高宗所嘉至大書屏間曰陳膏長厚有古人風

子居仁行
狀神道碑

賑饑釋盜發廩貸民

龔茂良字實之帥隆興歲饑新喻盜起憲司發兵
掩捕茂良奏曰皆饑民耳朝旨徑委茂良招撫給
以錢米悉潰去全活無數

狀行

陳闡字伯通登皇

祐第知建州境內有爭糴者縣指爲盜以聞闡曰
一日聚數百人何盜遽如許耶此不過以饑爭食
耳推驗果無狀遂杖而釋之

人物志

方慎言知泉州歲饑大發廩貸民奏蠲丁稅父老

相與泣曰微方公我輩無以生尚何有子孫哉自

是生子多以方兒爲名

近世厚
德錄

屯田利害吏部條例

陳靖爲太常博士時太宗命有司議均田之法靖
以爲未可卒行請自兩京東西千里檢責荒地逃
田官籍之募人耕佃從屯田制置所給印紙令州
縣勸課分殿最候數歲盡罷官庄屯田悉以賦民
然後量人授田度地均稅上謂呂端曰秦滅井田

廢經界而兼併之民起至今使貧富不均朕欲復古而未能前此言利害者衆矣惟靖言與朕合下其議三司以靖爲西京勸農使

名臣錄
經國集

葉容爲吏部七司弊事未去容上疏陳三弊一曰隱占缺員二曰引例異同二曰據摘小節又與本曹編集號曰七司條例事同而例異者存一削一由是升降予奪始定矣孝宗嘉之令吏部鏤板頒降他日又見便殿賜坐因曰吏部條例朕亦置在

禁中嘗徧覽之

家傳

諷蔡霽威願劉終惠

蔡襄鎮福唐政嚴肅毫髮不容故人陳烈先生少
同筆硯一日維舟亭下不入謁留詩曰溪山龍虎
蟠溪水鼓角喧中宵鄉夢破六月夜衾寒風雨生
殘樹蛟螭喜怒濶慙懃祝舟子移棹過前灘守亭
吏錄呈襄遽以記謝過曰先生既以詩誨之不若
耳提面教之也先生竟去襄自是少霽嚴威

輸付
名談

劉朔初調温州戶曹歲大饑疫太守委朔賑濟朔計口受錄以其餘散粥糜挾醫到門親切脉煮藥晨往晏罷徑入徐出所活數萬人道旁弃兒常百計募嫗乳飼聽無子者擇取將代士民請于郡願留以終惠既去里居賢士大夫及緇黃工商數千輩拜泣于道

行狀及葉涵撰墓志俊宰福清福之文邑月責羨錢無經賦朔至盡罷之

聽訟使兩詞自詣無呼追者市食挂錢于門民當其物持錢而去邑庭常空失械索所在

復塘五所築隄萬金

蔡襄漕福建莆有陂塘五所自豪民請築爲田塘
下田皆爲旱地襄奏古塘灌田千餘頃可活八千
餘家及築爲田纔百頃止贍官勢戶三十餘家利

害灼然後五塘皆復民立祀塘側

國史莆陽居士按五塘名勝

壽西衝太和屯前東塘今惟勝壽仍舊西衝太和已廢屯前東塘并失其地矣

王保隆

保大間爲莆田令開下坊塘溉南洋田百餘頃仍

築隄其上因家于莆給事晞亮其後也

今塘西靈石塘刻誌

莊柔正登元豐第宰福清築天寶陂溉田五十頃

人物志

陳居仁守武昌郡民居室並臨江歲有水患乃築隄名萬金後水至不復爲災

神道碑

方慎言漕兩

浙會錢塘江決數十里慎言疊石築隄以殺潮勢
璽書褒之

家傳

林豫守冀州黃河北決盡收老弱

幼稚廩以官粟募少壯者築隄官與之傭應役者
日千計民賴全活

狀行

李昭遠字復之擢嘉祐第

守九江郡有甘棠湖唐李渤所爲也熙寧間洪水

壤隄昭遠築新之孔平仲記曰自唐至今三百有
餘歲其成始與終二千石皆李姓甘棠之名蓋以
遺愛也他日民之思侯豈後於勸耶

沼甫志九
江文集

葉訊截舌徐治啗心

葉賓登景德第宰南安民牛爲盜截舌以聞縣賓
陽叱去陰令屠之果有告私屠牛者賓謂告者曰
截牛舌汝也訊之伏罪丞相容其三世孫也

蔡端
明集

徐確爲永春尉俗喜屠牛確嚴禁止會令之子病

思啗牛心屠者市一犢將殺之犢銜刀奔尉治確
適造縣庭犢仍走庭下確令跡所往爲驗治屠者
送承天寺爲長生牛提點刑獄祖無頗刻石記其

事

壺山集

上稱仁勇獨名清謹

陳俊卿紹興三十一年爲殿中侍御史金人將渝
盟時舊臣惟張忠獻公浚謫居湘湖俊卿乞起浚
禦敵內侍張去爲陰阻其謀俊卿抗言去爲阻撓

請按軍法斬之以作士氣上爲愕然曰卿可爲仁者之勇遂以浚知建康敵兵渡河俊卿受詔旨措

置浙西水軍于是李寶始有膠西之捷

神道碑

李欣初爲階州推官自知州以下坐買馬得罪而欣獨免由是以清謹知名

國朝實錄通鑑長編

葉容初爲

建州錄叅郡委領苗稅帑吏攬丁每先視輸一日私饋斛米造常幕器皿容悉却之時季弟在側曰胡不白諸府庶杜此風容曰絕之則已沽激邀名

非我志

行狀

兵不伐木賊無犯境

王氏媪家有名荔甚珍護之黃巢兵過欲斧之媪抱木號泣求與木偕死賊憐其意不伐後屬宋氏

名宋香至今結實其核若有斧痕

蔡端明譜名宋公荔枝公名誠

年八十餘世傳其木已三百歲蔡有謝宋評事荔枝詩云兵鋒却後知神助年壽高來況主人

余祖奭守南恩時海寇卓全高領徒千人沿海灣標掠祖奭內嚴控扼而外示閑暇賊引去曰郡守

仁厚長者毋犯其境部使者以聞被召

行狀

宋斐

字材成宰邵武劇賊毛湮龍始出就招所遏需丁壯負荷小嘑意即肆屠掠斐令空邑遁去盜至無所獲乘夜羣譟入卧内斐徐起喻遣不爲調一夫

民以全活

人物志

孝感馬周疑釋霍光

劉洵直字子浩年十二喪父十六喪母已知苦學篝燈几筵之旁號慟輟即讀書率至夜分一夕族

父聞其哭聲甚哀問之答曰讀馬周傳至其言少
失父母犬馬之養無所施悲感不能自止諸父奇
之後登第至平江倅

人物志

今子掣制置江淮棠位

朝列

徐師仁幼敏悟甫七歲過外祖家外祖坐之膝上
讀霍光傳疑光何以爲不學無術師仁曰伊尹放
太甲而光不知非無學耶外祖大驚後登第官至

著作佐郎

汪龍溪文

黃氏義學陳公義莊

黃問字公裕侍講君俞之父通五經于居廬之南
爲義學聚四方英俊立五規以警之一曰修身謹
行二曰立志抗節三曰潛心經術四曰留意世務
五曰限月收功既卒右丞皇甫泌謚之曰義成逸
士黃君俞墓志方泳與弟洞創義齋招致四方名士
洞以三禮中科泳子次彭次夔次臯繼擢第次彭
六子踵世科者四晞道原道安道深道也醇道辨

道以任子官醇道子煜煥辨道子車翼孫雄晞道
曾孫庇士舉原道曾孫鷹元孫發深道子綰綰猶
子銓銓子淙次夔子叔震叔震猶子牧皆擢第鄉
人榮之

方氏家譜

他如鄭砥西齋鄭安正友堂林國鈞

東井書堂皆招名士與子弟誦學其中後砥子濟
曾孫稟元孫爚安正子箕老耕老國鈞子褒充並
以進士成名

行狀
郡志

陳俊卿薦於宗黨有南園義莊族之貧者歲分遺

有常數女未嫁者給以資不能葬者助其費至今

行之不改

家傳

陳居仁家置義莊給族黨之貧者

及其孤甥從子

神道碑

今子芾守姑蘓卓守九江

林伸兄弟七人其貧不能自給者三猶子女不啻

三十餘伸捐俸入爲三房畢婚嫁族黨窘乏者悉

周之或曰盍爲子孫計伸曰吾蓄書數千卷苟有

賢子孫足矣不賢多財適爲累耳

離塵不夜編
又行狀參出

游洋林朝散髦有姑蘓義莊每歲冬分給族黨甚

厚

再世歸隱終身高卧

蔡傳襄之孫通判南京一日謂其子曰故園松竹
其日夜挺拔而望吾歸乎遽上章請老時年四十
三縉紳高之子樞字子應擢政和第累官朝散郎
守職方員外郎年纔四十有五慨然歎曰先公掛
冠之年吾已過之詎可無功久冒寵乎即丐致仕
知友謗其所居堂曰世隱

張無垢文集

鄭伯玉爲殿

中侍御史以親老棄官就養退居二十餘年日與平生故人更唱迭和郡守俞希孟題其隱曰綠野孫事道亦有隱操嘗守邵武謂所知曰吾三世青雲今年逾五十佩太守章足矣即請歸優游田里以詩自娛御史許景衡貽書曰知足高風丕激頽俗其爲名輩推重如此

並行狀

林震兄震與秦益

公有庠序之舊未嘗干進入仕四十年歷官止五任年六十致政而歸鄭夾漈以詩美之云千載清

風去不留何人能伴赤松遊乞骸直到骸歸日告
老須臨老盡頭元亮田園何處有子平嫁娶幾時
休湖州別駕發深省掛却朝冠便自由

行狀夾
涿集

陳大卞字仲循登治平第官至奉議郎以明堂恩
褒贈二親拜且泣曰吾不能與時俯仰黽勉在官
者正爲吾親今褒贈既及可以休矣遂致其仕時
年五十六游定夫贈之以詩云即今年纔五十餘
脫去簪紱弊旌如聖時搜選動空谷策足要路爭

先趨廟堂故人握重柄僵者可直瘠可腴倦倦風
義數寄語掉頭不顧甘如愚

大卞與章子厚有舊
章當軸屢招以書竟

不往故云徐鐸文
集墓志游酢文集

方惟深字子通舉鄉貢第一見抑於禮部即棄去
樂吳中山水居焉以吟咏自娛荆公得其詩謂精
詣警絕自是隱然有聲東南與樂圃朱長文俱隱
吳門士往來者必禮其廬長文晚起爲太學博士
惟深高卧不起有詩云逍遙北窻下幽興在枕几

聞昔傲世士高卧終不起又贈人云終身泉石約
吳門元符初孫集賢傑薦之於朝崇寧間吳郡復
以遺逸應詔深悉不起後有司舉貢籍以年格合

補官就賜勅牒袍笏於家

程俱北山集
胡堙蒼梧集

陳易字

體常與化人初遊太學後歸隱縣之蔡溪巖不下

山者三十年崇寧初下詔舉遺逸八行郡守郭重
以易應詔因具禮聘之易賤謝曰形同槁木詎蒙
刻畫之功心若死灰枉費吹噓之力又表謝云早

粗收於八行晚但了於一心心既已無行復何有
毅然不就轉運判官陳覺民復以行能尤異薦於
朝竟不起巖有石門鄉人號石門先生

徐師仁撰
石門先生

傳先是慶歷中邱惟溥舉八行不就授將仕郎

建學成名造橋獲報

方儀咸平初伏闕下上書乞建軍學

甫自置郡二
十餘年學官

未立故也會得旨賜地始建夫子廟學于軍治東南隅

入貲助成之二年儀與從子慎言舉茂才復拜疏

乞修三禮堂與步廡郎崇經閣復得旨給錢三十萬儀慎言同登三年第六年學成右司諫孫何爲記卽爲立祠于學宮

軍學碑

陳可大字齊賢縣學

久頽壞官不以爲意可大慨然曰學宮之陋吾黨之羞也帥族人合金新之置游學田可大擢政和第官至朝散大夫

仙遊縣
壁東記

洪忠慶歷初以家貲造楓亭沙溪等橋凡七所校書陳高立石紀其事蔡忠惠自諫垣攬轡奏補軍

學助教旌其勞子延孫範曾孫居寔皆以進士成名範官至朝議人以爲陰德之報

郡志

樓名萬卷館闢三餘

方略宦達後所至專訪文籍民間有奇書必捐金帛求之家藏書至一千二百笥作萬卷樓儲之嘗語從弟正字翥曰次雲才性不出戶十年可移吾書入肝鬲矣翥自登第後不涉仕途讀之十六年而後畢林寔家聚圖書數千卷皆自校讐告子

孫曰吾爲汝曹獲良產矣邵康節之後惟霆得象

數之學云

並人
物志

方于寶家有三餘齋聚書數萬卷紹興十六年應
詔進風騷大全集一百卷補廸功郎其族祖梅州
漸嘗謂閩人無資產恃以爲生者讀書一事耳所
至以書自隨積至數千卷手自竄定增四壁爲閣
藏之榜曰富文朱舍人昱爲書其事

不辯誤矢悉焚私書

蔡襄素重義嘗飲會靈東園坐客有射矢誤傷其
人客遽指爲襄矢京師喧然事聞上因問襄再拜
愧謝終不自辯退亦未嘗以語人

名臣傳近
世厚德錄

方慎言爲侍御史時丁謂貶命慎言籍其家得士
大夫書多私請闕通者悉焚之不以聞世稱其長

者

名臣傳近
世厚德錄

薛不希遷徐甘獲罪

薛元鼎字叔雲擢紹興第提舉浙西時被旨相視

太湖元鼎沿江上下盡得江流曲折壅遏狀奏開
運河五十四里許稱旨元鼎曰吾以利民耳初不
敢以勞希遷也 劉洵直通判吳門部使者得詔
旨興水利檄與共事洵直辭且曰是役也非鄭渠
召埭之比吾誰欺已而同列代督役受賞進秩隨
復鑄去識者服其先見

並行狀

徐確以宗正丞出使二浙適歲大水確考禹貢三
江之說得吳松古江以爲太湖東注入海吳松江

正在下流向來潮泥湮塞水溢爲患請自家封渡
古江開淘至大通浦直徹海口七十四里以常平
緡錢米斛十八萬三千餘充調夫之費因令饑民
就食確親執畚鍤以先之水道遂通或以饑民就
役有死者爲言降三秩確曰此役不興饑者當駢
首就死以是獲罪吾所甘心也

狀行

林伸宰新會諸司職田布滿其邑歲歛放租稅十
之九吏持不可伸曰不過爲民一衝替耳人以爲

辱我以爲榮後果符吏言伸恬然不以爲意

離塵不
夜編

荆門獨立歐寧四最

方通字叔時擢熙寧第僉判荆門郡守臨事多任
意通每辯之弗置因治亭名獨立以自見及爲王
府翊善因子軫上書坐謫後復官以朝請大夫老

于家

行狀

林積仁宰歐寧三年民戶增一萬五千餘時以四
最六善課羣吏歐寧爲第一焉墾書褒召除廣濟

河輦運使遷江西提舉

狀行

霆戒他狗葉寧自欺

林霆爲鄧州兵曹與趙不羣同僚時有監司欲逞私憾而囑趙趙謀于霆霆曰吾人初委質豈可以一生名節徇他人及趙知建州謂霆曰某終身不墮小人之域者賴公南陽之一言

狀行

葉容初主南海簿攝尉二廣籍鹽筴充賦捕賞頗重前尉有累捕獲轉至員外者或欲以所獲盜授

容容曰仕塗發軔如造屋建柱石柱石不正屋隨以傾吾方入仕豈宜自欺聞者嘆服

家傳

林公青子鄭母訓兒

林伸宰新會邑民有以獲盜賞迎合其子者獄辭具伸知之責其子曰朝廷數路搜賢能汝不讀書應遜教我欺君何也遂言其子只在廨宇未嘗出

入賞典盡歸獲賊者

離塵不夜編

鄭耕老母林氏子四人耕老其季也父亡林氏訓

諸子曰家事盡以累吾汝等一意向學無負汝先
君之志無謂予婦人而欺予欺予易欺場屋難汝
等學問吾無所取信惟有司不汝遺此吾所取信
也詔四下諸子舉于鄉者凡十而三人同中者再
成名者二人耕老與仲兄箕老也

陳正獻撰
林氏行狀

莆陽比事卷之六終

莆陽比事卷之七

龍坡李俊甫幼傑纂輯

鯉湖九仙龜峰二師

何仙兄弟九人漢元符中自臨汝來居九鯉湖煉

丹成乘九鯉魚上昇

因以名湖

有丹竈藥槽虬迹巨人

武在焉後人號其巖曰何巖水曰僊水山曰九仙

徐著作詩云晨踰九仙山暮訪九鯉湖何氏兄弟

跨鯉魚同時輕舉排天衢山頭雲氣故恍惚三十

六鱗今有無瓊漿白日醉天酒何時華表歸來乎

今山有嘉應侯廟即九仙之父祈夢如響屬仙遊縣又陳胡二公隱迹壺公

山後羽化鄉人祠之禱雨必應

徐寅記屬興化縣

沈陳二師沈莆田人名無了陳仙遊人名志忠二

人雅相愛遊處必俱唐長慶中經行今龜山院北

遇六眸神龜躡四小龜行俯仰其首如作禮者三

遂結庵于此

山曰龜山地曰龜池

後皆跌座而逝沈

賜號真寂陳號廣濟

蒲志九域志龜山院碑

蒲陽風物賦云

九鯉湖邊羣仙子化羽上昇六龜峰頂二禪師真
身不朽

蟒口龍石虎巖辟支

沙門智廣姓陳仙遊人每行日中有二影涅槃指
爲龍樹後身唐咸通間住錫九座山

今爲太平院

山有

巨蟒廣至其所蟒張口如屋廣拄錫坐其中蟒化
爲石今蟒口巖是也或題云錦鱗巨蟒晴如電鐵
鉢禪翁心似灰山側有潭龍蟄其中當亢陽師叱

之龍透石出其石斷如截因名透龍石卒謚正覺

加號慈應

詳見院碑泉南錄傳燈錄

閩中實錄云王氏入閩住

九座山沙門言事多中云騎馬來騎馬去王氏據

閩始光啓丙午終保大丙午云

按慈壽院碑泉南錄長樂志並云

樂答王氏之言

湮槃初隱囊山高巖下跌坐不食行則兩虎隨之

其居曰伏虎庵

今爲慈壽院

九座見之曰此古辟支佛

也因號辟支巖巖有小竅時透異香郭公父詩云

猛虎至今馴片石異香時復降重巖又嘗居西巖

石室

今妙應寺

爲郡人禱祈之所

阮碑
郡志

觀音作禮僧伽告別

沙門省澄姓阮仙遊人禪行高潔乾德中賜號真

覺住泉州招慶從學者千許嘗夜至雲堂有沙門

方熟寐口吐異光澄潛爲作禮翼日沙門謂澄曰

夜來夢白衣觀音作禮此何祥也澄愕然

清源志

方子容妻沈氏事僧伽謹甚子容爲憲守時沈氏

夢僧伽來告別問所往云當與蘓子瞻同行後七
十二日有命時東坡在貶所已而再命責僭耳正

七十二日也

東坡志林

陳僊淘金靈師飲鐵

陳僊不知名今所居號陳巖山山有井深纔二尺
泉甘而清舊傳陳僊于此淘金故號淘金井山頂
石洞廣可數丈有巨人跡石茶竈石碁枰並存旁
又有桃花塢燕子洞云

郡志

沙門千靈唐會昌中辭六祖入閩六祖云逢苦即
住至莆田苦竹山住錫山魃拒之靈曰若能飲鐵
針則吾去不能飲而吾飲則若去魃不能飲自飲
之魃遁去遂于山西北建苦竹院所飲餘鐵針封

貯尚存

院碑

轉水名臺結楓爲亭

轉水臺在興化縣東北窮山之巔有泉迸出東阻
大石西流永福縣界唐末沙門妙雲以鄉民苦旱

至泉所一喝石裂水轉而東溉高仰田數百頃因

結庵終焉今像設猶存禱旱則應乾道賜號慈濟

郡志游洋志與九域志所載微異

湮槃井在莆田元豐橋側舊

記云湮槃南歸同船者渴求水不獲湮槃登岸柱

錫飛泉湧出卽此是也

郡志

楓亭在仙遊縣西南舊傳何氏九仙結楓爲亭處

其上故名

郡志

按漳浦威惠廟集陳王父政武后

朝戍閩因家于泉之楓亭卽其地也

今楓亭亦有威惠廟北望

有墳巋然而長老
相傳爲王祖塋

瑞泉湧石法水供瓶

沙門無際居金仙院

今廣化寺

精持蓮華經石忽湧泉

因立瑞泉庵陳了翁嘗遊詩云飛棟逼天象踈櫺
逗巖烟烹茶引高士汲此石罇泉泉深不盈尺潤

物無頗偏百川有盈涸是坎常泓然

黃御史文及瑞泉詩跋

沙門文偈仙遊縣人修行堅苦日誦金剛經不輟
口所居丈室不燭自明淨瓶水常滿若有神供唐

咸通中造泉州開元東塔爲開元初祖

清源志
泉州錄

雞子名城龍華建寺

雞子城在仙遊縣東北十里莫詳所起又有彭城
蛇灣城相距不遠俗傳雞王彭王越王築城於此

郡志

城山在莆田縣東南三十里舊傳蜘蛛遶山

爲圓城故名山有石巖可坐十許人前臨國清塘

鄭耕老詩云湧金門外盡菰蒲四月行人客上都

六月國清塘上望依稀身更在西湖

郡志

龍華寺在仙遊縣西南隋大業中有沙門自丹陽
來立庵山林幽邃人跡不到有白龍啣白蓮華自
空中來獻因得名今龍井龍池遺跡尚存

詳載郡志并寺

碑記

羅漢化院神人請地

羅漢峰在廣化寺西昔有沙門南遊暮過其下顧
見樓閣層出鐘鼓鏗然榜曰羅漢院遂寓宿遲明
失所在乃詣寺言其故後因以名山旁有佛腸坑

異僧吐出腸胃于此洗焉

郡志

廣化寺梁陳間邑儒鄭露之居俄有神人鶴髮麻衣夕見於堂請易爲佛宇露諾而獻之爲金仙院時永定二年也隋升爲寺唐景雲因白泉之瑞改

靈巖

唐柳公權書額猶存詳見寺碑記

皇朝賜今額爲庵院百二

十餘所勝賞之處不可勝紀唐處士周朴題靈巖上方云碧峰頂上開禪坐縱目聊窮宇宙間白日纔離滄海底清光先照戶窻前又云連雲天塹有

山色極目海門無鳥行

郡志

禪林高僧佛岡戒尼

正幹姓吳得法于六祖辭歸至福州黃蘗山曰吾受記於師逢苦即住其在是乎遂即山立寺爲黃

蘗初祖

畧見十
二祖贊

耽章姓黃入靈石山爲僧咸通

初謁長安悟本价公价稱之由是名冠叢林後居曹山號本寂南平王鍾傳以禮致之不往偈荅云摧殘枯木倚寒林幾度逢春不變心樵客見之猶

不採郢人何事苦搜尋

禪林寶傳

義存姓曾年十二

于莆田玉澗寺出家

今華嚴寺塑像猶存

徧游禪會緣契德

山後歸閩結庵象骨山爲雪峰初祖號真覺

清源志傳

燈錄

有需姓洪正法眼藏二十七傳始出東土六

祖爲曹溪七世爲南嶽八世爲馬祖又九傳而爲

慧南慧南之嗣曰常總常總之嗣曰應乾需得法

於乾者也住福州鼓山雲峰後居東庵猶飾經像

行道禮拜或問故曰吾以爲後學規

徐著作文集續燈錄大懶

和尚務欽乃其法嗣焉

伯新爲語溪中宮初祖鄒道卿黃

山谷與爲物外交鄒題語溪有云語溪老人伯新忘情人也而特愛予草書取紙篋中一無所有乃折寢衣六幅書之黃題語溪詩云同行野僧六七

輩亦有文士相追隨伯新與焉

語溪集

德潛龔叅

政之兄通儒釋學住經山自號寓庵時孝宗召入內說法賜偈云信手拈來說宗乘數百句僧歸寺寂寥一字無着處宣一寓泉州西羅漢禪林謂

之僧中龍象

祖珍住泉州承天法石以肉身菩

薩號爲珍獅子

効常守惠並住潭之大瀉効常

笑容滿面衲子目爲常歡喜守惠三入內說法賜

號冲真密印通慧

他如靈巖詩僧義或華嚴誦

師行標禪鑒休淳翠峰子淵別峰妙雲皆高僧也

高僧畧廣燈錄宣一子淵仙遊人珍常惠欽興化人正幹就常義存有需伯新德潛義或行標禪鑒

休淳翠峰別峰妙雲皆莆田人

莆田黃氏女隋時築室于泉州同安縣東佛子崗

修持淨戒後端坐蛻去真身不壞因立寺曰黃佛
治平中更名鹿苑禱祈多應崇寧間部使者以狀
聞賜號佛應 洪氏女名聖保性喜山水居莆田
將軍巖以禪頌爲樂有和同志云一箇巖龕萬物
周塵中擾擾到無由儂家儘有居山意問着依前
隔數州

並泉南錄又高行尼法勝姓許生身常
出舍利珠圓玉潔人皆異之空寂院碑

鬲虎爭牛蓄猴報鵠

沙門法通唐貞元中居壺山虎邱巖嘗下山遇兩

虎爭一牛通鬲而分之黃御史壺山詩云井通鱸
吐脉僧鬲虎棲禪無了住龜山有鹿爲虎所逐

奔無了無了以杖拂之虎退伏周朴贈詩云雲閑

虛戶外虎跡亂山中

並舊志

自永結庵麥斜巖一

夕山下荷水歸有虎躡後飲其水永回顧徐云適

從何來其渴至此虎曳尾而去

游洋志

向尉忘其名宣和間官莆田蓄牝猴產一子抱持
升屋忽爲鷓掣去母悲號一日詣屠門徑取大鷓

復踞屋置肉懷中如抱兒狀前鵠果來僞墮其肉

鵠下取即就擒至絕吭拆肉乃已

徐著作壺山集異聞錄

鐵舸真人蛟刀勇士

趙昇初師事張道陵隱居鳴鶴山嘗乘鐵舸至莆

田江口今舟痕猶存于石因立祠

按趙本學于張流俗相傳呼爲

張趙舊志云張真人誤

累封顯佑真君翰林學士莫儔題廟

驂鸞閣云羣山帶雨陰雲重滄海連天水氣昏迷

想真人乘鐵舸往來三島鬼神奔

廟記

吳興唐神龍中埭海爲田陂延壽以溉有蛟爲孽

今延壽溪

興毅然曰蛟害吾事將窮穴斬焉乃提刀截

流而下殺蛟興亦不復出數日離陂東下二里得

所持刀于淖泥中名其地曰吳刀由是水旱不能

災鄉人爲立祠今廟號孚應封義勇侯

廟碑記及鄭褒撰吳

興傳

鬼兵佐國神女護使

顯寧公初封佑民侯廟在迎仙驛左熙寧五年閏

兵成熙河神現雲端率鬼兵佐國蜚蜂數萬螫敵
陣遂大捷 英濟廣利公初封助順侯廟在莆田
龍坡建炎元年郡卒謀不軌卜于神不吉乃攘臂
出忽若狂醉自言反狀遂就擒風物賦云助順之
神將摧姦佑民之鬼兵護國 唐持莆田洪渡人
少學禁呪能治病伏虎卒人祠之在尉廨後警捕
雨暘有禱必應封順應顯助昭濟侯告詞云幽明順
助坐繫于凶徒盼蠻應祈潜消于旱魃並廟碑

涓州神女林氏生而神靈能言人休咎死廟食焉

今涓州聖屯江口
白湖皆有祠廟

宣和五年路允迪使高麗中流

震風八舟溺七獨路所乘神降于檣安流以濟使

還奏聞特賜廟號順濟累封夫人今封靈惠助順

顯衛妃告詞云居白湖而鎮鯨海之濱服朱衣而

護雞林之使

白湖
廟碑

東歐神女吳氏能水上布席

禹步治病驅邪五代間來遊興化鼓角山地多山

魘吳力驅除一方賴以安死人爲立祠淳熙賜廟

號昭惠開禧因郡禱雨奏封靈順昭應夫人

游洋志

亭留嘉木田擢瑞蒲

莆田縣治有木不知民二十七根上附一幹枝條
樛曲如虬龍狀福帥王達以嘉木名之有詩云清
陰連日遠翠影共烟浮避暑疑無夏當風別有秋

今縣圃有嘉木亭

閩中記

縣舊以田多生蒲故曰莆田風物賦云擢瑞蒲于

田畝記其舊也

舊志按楚詞天問云蒲萍是營王逸云萍蒲之地補註云蒲即蒲字

蒲水草可作席黃
長睿云蒲古蒲字

烏石荔支通應子魚

荔支見于端明舊譜者十九種陳家紫方家紅游

家紫小陳紫宋公荔支

亦名宋香

周家紅丁香圓丁香

水荔支龍牙雙髻小荔支真珠紅釵頭紅硫黃紅

粉紅中元紅蒲桃荔支密荔支火山惟陳紫第一

郡守俞希孟詩云若把東閩比西洛可將陳紫敵

姚黃後出者皴玉玉堂紅郎官紅游丁香爲最勝

其餘若狀元紅奪先紅紫瓊香步香虎皮班西子
黃香大小江綠瑞堂紅黃玉腕玉勝玉之類亦是
名家

莆陽雜記

遊齋閑覽云荔支譜稱漢初南粵東漢

交趾唐涪州皆貢生荔支未有言及閩者驗之廣
南與夔梓所出僅比閩中之下品今莆陽荔支遂
爲天下第一名賢清話云永嘉柑烏石荔支珍絕

天下是烏石荔支又爲莆陽第一

王梅溪謝林處
奪先紅詩云莆

中荔支勝閩中烏石山前又不同正向鈴齋想風
味奪先人送奪先紅蓋林居烏石嘗爲別院第一

人見王狀
元文集

有詠莆中景云一日兩潮魚蟹市萬家

六月荔支天

迎先通應子魚荆公東坡山谷詩屢稱之邇齋閑
覽云莆陽通應子魚名著天下蓋其地有通應廟

廟前有港港中魚最佳令人必求其大可容印者
謂之通印子魚故荆公詩云長魚俎上通三印此

傳聞之訛也

王得臣塵史嘗辯通印之誤但指驛
左祠爲通應非是紹熙莆陽志云通

應港有小廟政和間所立題曰通應因以名港考
歲月實在諸公作詩之後辯者以爲訛恐未必然

按陳正獻熙寧間人已知荆公之誤且言地有通應廟則廟非政和間之廟陳賢本閩人又嘗任莆田必得其實

有名士問艾軒曰莆中子魚紫菜最好艾軒荅曰荔支蠟房更奇

雨禱龍潭旱祈蟹井

龍潭在莆田縣北碧瀨溪

亦曰龍潁

昔有黑白二龍見

水上因立五龍廟其旁旱禱輒應

又九鯉湖龍

潭太守朱端學嘗命郡寮禱旱取潭水歸迎拜之

次有白龍曳尾見雲端觀者如堵繪圖紀其異

郡志

白龍巖在興化縣巖內寬廣仰視有白龍糾纏其上左右相向頭角爪牙鱗鬣皆具鄉人塑龍公

像其中旱禱即雨

游洋志

蟹井泉穴在壺山巖巖之側其源常竭遇旱州縣遣吏齋禱置器于前泉迺徐出盈器即止時有紅蟹大如錢出穴外則雨必霑足劉屏山倅甫有詩云穴泉類蹄涔幽靈隱其涯髣髴小雙螯控御蛟龍隨

遊齋閑覽郡志

靈龜潭在興化薌林院東歲旱禱

之龜浮即雨

游洋志

陳巖仙字碧瀨釣影

仙篆石在陳巖山面平如削文跡縱橫若篆籀方

正字翦詩云何人登眺眈絕頂一樹一石探幽竒

蟲文鳥篆不可識如讀岫嶠神禹碑

郡志

仙臺峰

石在興化縣遙見五字如鐫勒云日月逝酒漿莫

曉其義迫視之漫不可識

游洋志

仙人釣魚石在碧瀨溪東壁立數仞下閼深潭石

罅隱隱有簑笠釣影在焉方正字詩云瀨寒隱魚

鼈廟古動龍蛇

郡志

臺號越王池名薛公

越王臺在興化縣東四十里據山巔累十餘層礎
石儼然按漢朱買臣傳東越王南行去泉山五百
里居大澤今所歷地多有遺跡宏詞方叔震詩云
聞道騶餘避漢兵竄身巖谷覲偷生如雲甲馬今
何在只見良疇萬頃平舊云越王無諸避地于此

郡志
洋志

薛奎雍熙間宰莆田盡削王氏無名之租于縣治
前鑿池作亭其上既去民思之號其池曰薛公堂
曰思賢坊曰端肅有三賢祠端肅其一焉

郡志

古縣石銘深潭金鍾

張緯慶歷甲申以秘書丞宰莆田再新縣中堂治
地得石銘文曰石敢當鎮百鬼壓灾殃官吏福百
姓康風教盛禮樂張唐大歷五年四月十日縣令

鄭押得銘之日乃皇宋慶歷五年四月十日也自
唐拒今幾三百年物之顯伏固有時至于年號月
日昭若符契異哉

青瑣
高議

游洋民乾道四年鑿井

二丈餘得石有文曰石上狀元明年邑人鄭僑廷
試第一清源石起宗亞之

游洋
志

金鍾潭在興化縣舊傳有二人自嶺外掬溪水飲
謂有金氣尋源至潭見金鍾浮其上二人沒水戴
之一人以繩引鼻繩絕鍾沉不復可致至今風雨

常隱隱有聲

郡志

莆陽比事卷之七

終

音

考

二

